

Charlotte's Web

**CHARLOTTE
EL BUBUU**

**Oidel:
Romana Anastacio**

**Milekiitit a omengiuel:
Masaharu Tmodrang**

**Uluusunga:
Joselita Imetuker**



E. B. White
PICTURES BY
Garth Williams



Table of Contents

Title Page	2
I TUTAU	4
II WILBUR	11
III CHIIS	15
IV CHAMIRENG	25
V CHARLOTTE EL BUBUU	32
VI ULENGULL ER A SKUUL	43
VII MEKNGIT EL CHAIS	49
VIII TEKOI ER A BLAI	54
IX KLIMELENGEL A WILBUR	58
X DUB	72
XI MEANG EL DILUBECH	84
XII CHELDECHEDUCH	93
XIII BLECHELEL A UNGIL EL UREOR	100
XIV TOKTANG EL DORIAN	114
XV CHEREMEL A CHULL	123
XVI OMERAEL EL MO ER A HIMBIOKAI	129
XVII OKDEMAOL	142
XVIII KELEKOLT ER A MOCHA KEBESENGEI	151
XIX BLIL A NGAIS	159
XX KO EL DOSEBANG	171
XXI ULEBONGEL EL SILS	179
XXII SILS ME A KLEAD	188

CHARLOTTE EL BUBUU

Llecheklel: E. B. White

Oidel: Romana Anastacio

Milekitiit a omengiuel: Masaharu Tmodrang

Uluusunga: Joselita Imetuker

CHARLOTTE EL BUBUU is a translation of the book CHARLOTTE'S WEB, written by E. B. White, copyright 1952 by Harper and Row, Publishers. It was translated with their permission.

Produced in cooperation with the Bilingual Education Project for Micronesia (BEPM) and the Palauan Department of Education, Koror, Palau WCI 96940.

Translated by Romana Anastacio in 1980. Restored and digitized by tekinged.com volunteers in 2015. Proofread and revised to the current orthographic standard by Masaharu Tmodrang in 2016. If additional errors are found, please email them to info@tekinged.com and we will release a revised version.

This and many other Palauan books freely available for download as ePubs and PDFs at:

<http://tekinged.com/books>

I TUTAU

Ng dirk tutau me a Fern a olengeseu er a delal el mengetmokl er a tebel el kirel a blengur. E a lechisngekl a Fern e a demal a todeba er a tuangel el oba a otilech. Me ng oker er a delal el kmo, "Ng mo er a demak?"

A delal a ulenger, "Ng mo er a blil a babii el mo omes a ngelekel a babii el milechell er a kesus."

"E ngera me ng oba a otilech?" ng uleker a Fern?

Me a delal a ouchais er ngii el kmo, "A chimo er a ngelekel a babii a milechell el kmal el kekeriei er aike el bebil. E dirrek el kmal mechitechut me ng locha mo diak a belkul me a demam a soal el mo omekoad er ngii."

A Fern a kmal mlo meklou a medal e chisngekl el mo bedul a delal e kmo, "Ke dilu el kmo ng mo omekoad er a ngelekel a babii? E le ngii el kuk kekeriei er aike el bebil?"

A delal a melecha a kall er a tebel e kmo, "Lak moldiu. E a demam a medengei a loruul. E ngike el babii a di ulterekokl el di mo mad e le ng kmal el kekeriei e kmal el mechitechut me ng diak a rofel e bo lsobel."

A Fern a rirurt el tuobed el oltoir er a demal. Tia er a

lotirii a demal e ng lilangel el olengit er a demal me lak lomekoad er a babii e ng kmal el chebuul. Me a demal a mlo dechor a dula er ngii el kmo, "Bo mchelellakl a bo mosuub el mengelmekl er a rengum."

Me ng mereberebet a iuechel a medal a Fern e kmo, "A tekoi er a kodall a diak el sebeched el kilmekl a rengud er ngii." Ng lilangel e mocha omerober er a otilech er a demal.

A demal a diul el kmo, "Fern, ngak a kmal el klou el medengei a rolel a okerulel a babii. A mechitechut el babii el kekeriei a diak a rellii e di mo ongesang. Me morael e lak mongesang er ngak."

A Fern a menga el mocha klou a lengelel e le ng kmal meknkitei a rengul er ngika el ngelekel a babii.

Ng dilu er a demal el kmo, "Ngika el babii a kmal el chebuul. Ng dimlak Isoal el mechell el ua isei. Ka di mngikak el mo er a osisiu el teletael, o kmo ak milechell el kmal mle kekeriei e ke milekotkak?"



A demal a Fern a kmal mle mereched el onger el kmo, "Ng kmal diak." Ng omes er a ngelekel e kmal meknkitei a rengul. Ng mocha mesaod er a ngelekel el kmo, "A kekeriei el ngalek me a ngelekel a babii a teblo el kmal kakerous el tekoi."

A Fern a dirk oltamet er a otillech e kmo, "Ng diak kusa a kakerous er a klengar er a chad me a charm. Tia el moruul er ngii a kmal diak lungil er a chebuul el charm."

A demal a Fern a kmal mlo bekerekard a medal er a lrenges aika el tekoi. Ng dirrek el kmal meknkitei a rengul er a ngelekel me ngika el ngelekel a babii. Me ng dula er a Fern el kmo, "Bo er a blai e bo knguu ngike el chitechut el ngelekel a babii e lekong me bo

momekeroul er ngii el ua ltolechoi. Ng mo mengesang le ng mo tmut a butiliang. E alta e sei kid e ke mo medengellii e ringelel a okerulel e mekekeriei el babii."

A lleta a demal a Fern el mo er a blai e ng chelebill er a kekeriei el box. A lebe ltuu er a blai e a Fern a ngar er a rebai el omekngiis a oecherel. E a tebel a kldmoki el kirel a blengur me ng mengetelaki a bul a kohi me a mekekeald el kall.

A delal a Fern a dilu er a bechil el kmo, "Mlia tilecha el box er a kingellel a Fern." Me ng milecherei a box er a kingal e mocha melatech a chimal.

Ng merola a Fern a mekekoki el mo tmuu el di obreburek a medal er a lengelel. A lekeda er a tebel e ng mesa a kekeriei el box el ngar er a kingellel el ko er a melechetuchel e merereek a chelsel. Me ng chilsngekl el mesa a demal a mocha mekekoki el omkais er a dengebel tia el box. A lebkisii e ng ngar er ngii a becheleleu el ngelekel a babii el omes er ngii. E a sils a melidiich er a dingal me ng ko er a mo bekekerekard e mengchecheldoeh.

A demal a millekoi er a Fern el kmo, "Ng cheremem el mulsebelii. Me mousubes er a telitur er ngak el leko kumekoad er a dirkak el kirel el mad el charm."

A Fern a di kea lemengai a medal er a cheremel. Ng di omes er ngii e omdasu el kmo, "Ngika a kmal el klebokel el ngelekel a babii." Ng mekekoki el chosmerii a box e kmedii er a kingall e mo mechulii a demal, e kuk mo mechulii a delal e lolecholt er a deuil a rengul. Ng luueta el mo otebedii a cheremel e nguu el me melungel er ngii. Ng melungel er ngii e ngii a tmoech a chochedal er a Avery.



A Avery a klou er a Fern er a cheru el rak me ng ko er a ouklou el chad er ngii. A ltoech e ng chellungel er a bosel e oba olsengel e merael el ko er a omekeukel el mei er a uum. Ng di tiloech e oker, "Ngilecha ng ngerang? Ng ngera a loba a Fern?"

A delal a ulenger, "Ng sechelil a Fern, e bo mriso a chimam e mtechelbii a medam e ng mla mo temel a blengur."

A Avery a milechei a kloklel e kmo, "Ka mei mekusang? Ngika el ko er a ngelekel a beab a omdu el kmo ng ngelekel a babii?"

A delal a ulerreched er a Avery me bo lolecholb e ng mochu temel a bus er a skuul el mei.

A Avery a millekoi er a demal el kmo ng soal el oucharm er a chimo er a babii. Me a demal a kmo, "A babii a di mo er tirke el sekukokl el oleong a nguches a ltutau. A Fern a oucharm e le ng mle soal el olsobel er a babii el mle kirel el okodall e mereko e mei me

domengur."

A Fern a dimlak a sengerengerel e le ng di omdasu er a cheremel. Ng mle soal el ma mekelii er a uchei er a lomengur. Me a delal a mlo ngu a chimo er a tut el butiliang el mei me te locha a milk er ngii e ng mocha dengchokl a Fern e oltekau er a cheremel e oltut er ngii el di ua a mera el tolechoi. Ngika el babii a kmal mle kekeriei e ng di kmal mle songerenger me ng mle mereched el mo meduch el tmut.



Ng dirkak lomengur a Fern me a Avery e a bus er a skuul a merema me a delrir a orreched er tir e omail a kelir el donats e te ngmai e remurt el mo er a bus.

Te ngmasech er a bus e a Fern a kmal di kea lesterir a resechelil e le ng di omdasu er a cheremel. Me ng dengchokl el kmal el dmeu a rengul se el omdasu a di

ngii el mo oungerachel a rokui el kirel a cheremel. Me a deuil a rengul e ng mildesuii a ungil el mo ngklel a cheremel er a le bocha lekerd er a skuul.

Tia el ngakl el luidesuii a Wilbur. A Fern a kmal mle soal tia el ngakl a bo le ngklel a cheremel me ng mocha er a classroom e di melebedebek er ngii. Me a lokerir a ngklel a sensei e loker el kmo, "Fern, ngera a ngklel a kot el klou el beluu er a Hawaii?"

A Fern a ulenger, "Ng Wilbur." Me a rengalek er a class a ocherechur me ng kmal mlo merur a Fern.

II WILBUR

A Fern a dimlak a ngodech el mo ruchei er a rengul el ua Wilbur. Me a lekiei e ng di melitaiu er ngii e omeka er ngii e omechiuaiu er ngii. Ng omkokl a letutau el mengeald er a tul el milk e omeka er ngii er a uchei er a lebo er a skuul. Me sei el lengar er skuul e a delal a oltut er a Wilbur a lesueleb. E se el lebo lrei e ng di tmuu el mo er a uum el mo meruul er a tul a Wilbur. Ng omeka er ngii a ltemel a belsoil e lmuut el mekelii er a uchei er a bo lebad. Me a Wilbur a kmal mlo smau er a Fern me ng blechoel el outkeu e remurt el ousemeriar el mo er ngii se el lebo lomeka er ngii.

A Wilbur a di mle mekesai el klebesei el lekiei er a kekeriei el box el ngar er a bita er a stob er a uum e a delal a Fern a kmo, "Ke mo loa a cheremem er a chelsel se el klou el box el ngar er a chelsel a bliil a idungel." Ng mle eru el Sandei el lekiei er a bliil a idungel e a demal a Fern a mocha dmedesii a eungel a klou el kerrekar er a rebai er a blirir e nguklii a klou el kahol el muui er a merat el llel a tuu el mong. Tia el bliil a Wilbur a mla er ngii a tungelel me ng mle sebechel a Wilbur el mo tuobed e me tmuu se el soal.

A Fern a uleker er a demal, "Kele bo lemekerasm a Wilbur a leklebesei?"

A demal a ulenger, "Ng diak. Ke mo omdidm er ngii el kmo, ng mo mekerang."

A Fern a uleba a tul a Wilbur me ng mocha dengchokl er a eungel a kerrekar e a Wilbur a remurt el mong me ng oderesii a tul me ng tmut. Ng di milechachongii a tul e mesululang me ng merael el mo er a blil el mesel er a dngesel. A lebo lultom a Fern e lomdidm e ng mengiis a llel a tuu e mocha duesii er a delongelel e mocha mechiuaiu. Me a Fern a kmal mlo dmeu a rengul le lomes er ngii e ng kmal teletelel a mekekeald er a delongelel aika el llel a tuu.

Se el letemel a skuul e a Fern me a Wilbur a blechoel dmak el merael el mo er a chades e mengiil er a bus. Me a lemei a bus e ng mo ngmasech a Fern e omiroi el melemesumech er a Wilbur. A Wilbur a dechor el omes er a bus el mo cheroid e merael el mo remei. Me ng di mo el mo soiseb er a blil me ng chelsimer e mengiil er a tebedel a skuul. Se el lebo lrei a Fern e ng di mo el mo otebedii a Wilbur me te milil el kaiderurt me aike el lebo er ngii a Fern a lebo er ngii a Wilbur. Me a ta er a klebesei me loldubech er a kuruma a Fern el oltak er a oningio er ngii el mo omais e a Wilbur okiu ullel. Te merael el kmal cheridang e a Wilbur a kmal mla mo mesaul. Me a Fern a nguu el ongesechii er a kuruma me ng mechiuaiu er a bita er a oningio. Ng oldubech a Fern e a lechisngekl e a Wilbur a mla imiit a medal el oubar er a berul a oningio me ng kmal mocha mekekakil me lak Isa el melechesokl a kuruma e longerodech me lemekar a rengelekel.

A ta er a sueleb el kmal mle meringel a sils me a eanged a ungil e a Avery me a Fern a mlo mangedub er a omoachel. A Wilbur a dirrek el ulebengterir el mong. Me a lebo e te mangedub a rua a Avery me a Fern e a Wilbur a mocha metengel. A lebo e ng kmal mekelekolt a ralm me ng liluut el me ngmasech e mechere a Avery me a Fern me te kaikedaob e ngii a mo er uriul er

omoachel. Ng mo me ng mengiis er a tkul a omoachel el olngotk er ngii me ng di dechedechang e dirrek el ungia a rengul se el ledi lebo lebeldebid er a chutem.

A cherengel a sils el me mong e ng cherengel a klungiolel a rengul a Fern me a cheremel er a Wilbur. E le aike el ledak el meruul a ko er a di mo ungil besul.

A uriul er a eim el Sandei el lomekeroul er a Wilbur me le klunga el mesisichang e a demal a Fern a dilu er ngii el kmo, "Ng mla mo klou a Wilbur e mesisiich el sebecchel di menga a ulengall me ng kired el mo oterur." A Fern a kmal mlo mekngit a rengul le ng kmal diak a ngodech el soal el mo ua a Wilbur me ng mildideklokl. E ng di demal a di mle mesisiich el oldubech a tekingel el kirel a oterul a Wilbur e le te mla oterau aike el bebil er a ngelekel a babii e diak a temir el omekeroul e mengetmokl er a chimong.

A demal a Fern a millekoi er ngii el kmo, "Fern, ke mla rullii a kmal ungil el ureor el mekurulii a Wilbur e ng di mla mo klou me kede mo oterur."

A delal a Fern a millekoi er ngii el kmo, "Fern, moudengua el mo er a obekum er a Homer e ng klou a blil a cheremel e oucharm a betok el bedengel a charm me a lta el soal el omechar er a Wilbur. E a lenguu e ng ungil e le ng kmeed me ng sebecchem el mo oldingel er ngii se el lebo el soam."

A Fern a uleker, "Ng tela a ungil el cheral?"

A demal a dilung, "A Wilbur a ko er a mle chitechut el kekeriei el babii me mdu el kmo, ke olterau er ngii el kllolem el kluk a cheral (\$6.00) e dosa el kmo ng dmu el mo ngerang."

A Fern a ulemekedong er a Homer e ouchais er ngii er a cheremel el soal el olterau er ngii. Me a Homer a kilengei el mo omechar er ngii e le ng kmal mle beot a cheral. Me a bocha lekukuk e ng merema a Homer el me melai er a Wilbur.

Me ngiluu el mo er a blil me ng nguldekiar er aika el cheremel.

III CHIIS

Tia el blai el leblo er ngii a Wilbur a kmal mle klou e dirrek el kmal mle mechut el blil a charm. A bul a uldak er a ko er a bul a chemadech el bokso me a dechil a charm me a bul aika el meklou el kerebou me a uos me a bebil er a mekekeriei el charm. A di mo rullii me ng mo ngodech se lebo er ngii a btelul a ngikel el longa a katuu. E sei kid e ng di mo bengud tia el chimo el sers. E a lak e ng blechoel el di bul a chemadech el bokso a detungel e le ng diak lebo lak lolab el me el omekang a charm.

Tia el blil a cheremel a Homer a kmal mle ungil lerruul me ng sebechel el mechesimer a lemekekolt a beluu e mengai a chesmerel se lemekeald a beluu. A chelsel tia el blil a charm a mle blii el ko er a ngar er ngii a kedidai me a eou er ngii. A blil a uos me a kerebou a mla er tia el kedidiul e a sib me a babii a kuk mla er a eou. Tia el leblo er ngii a Wilbur a mle kirel a blil a kerebou el kmeed er a blil a dongu er a sers. Tia el blil a dongu a mla er ngii a didelboi me a sebel me a otillech me a bub er a beab me a baket me a betok el bedengel a klalo er a sers. A rengalek a kmal mle sorir el milil er ngii. Me a bek el bedengel a mekekeriei el charm a milruul a lukir er a chelsel.

A Fern a bek el klebesei el lebo loldingel er a Wilbur. A sib me a debar a mlo medengellii me se lebo e te di mechiuaiu e mecherei me ng mo tmuu. Ng di kmal mle

mekngit a rengul a Fern e le bek el lebo loldingel er a Wilbur e a Homer a kongei er ngii me ng di omes er a Wilbur e diak lebo lolai er ngii er a bliil. Me se el lebo e ng di dengchokl er a kekeriei el kingall el ngar er a bliil a sib e omes er a Wilbur. Ng dengchokl e oureng er a mo oltobed er a Wilbur el mei me loilil.



A Wilbur a ngar er a chesel a bliil e kmal dmeu a rengul e le a Fern a dengchokl e omes er ngii. E ng di dirk oureng e melatk aike el mle ungil el temir er a ledak el mo mendedub e lengar er a kuruma el leko di lluat el mei.

A Wilbur a kmal klunga me ng sokol el omais el mo cheroid. E a bliil a diak leklou le ltobed el mo bedul a bliil a sib e ng ngar er ngii a ongoles el er ngii me ng di kekerei a sebecel lomais er ngii. A bo lebedul a chesel a bliil e ng mui er a koas el medirt el dechil a kerebou. Me ng mocha tuobed el mo er a bita er a bliil a sib e merorael e mengichiil er a Fern le ng mocha er se el taem el leblechoel el mo oldingel a Fern. Ng di milengiil me ng mekelda er a sils e di diak lemei a Fern me ng kmal meknkitei a rengul.

"Ng kmal diak a ngerang el sebeced el remuul er tiang," aike mle uldesuel a Wilbur. Ng milrael el mo omes er a ongoles el kmo ke le lengar er ngii a keles el mlo diak leues er a lomengur er a sueleb. E a lebo e ng di budel a emutii me ng kmang. Ng mo merek e mo er a kboub el sersel a bliil me ng mengkas er a ulkel. A le kea a loruul e ng mocha soiseb er a bliil el mo ngmasech er aika el dechil a kerebou el mo er a bebul e mo dengchokl. Me ng dengchokl el mla mo diak Isoal a cheliuaiu, me a diak Isoal a omengiis. Ng kmal tureka a rengul er a delechor me a delengchokl. Me ng kmo, "Ng dirkak lebo e leru el buil el kchad e tureka a renguk er a klechad." Ng millekoi e milekiis el merael el mo tuobed.

Ng tuobed el mo er a irkr me ng dechor e kmo, "Tia a kmal el chetik el delengchokl e le ng diak a ngodech el sebeced el mo er ngii. E le a lak kbe er a ikr e ak mo er a chesel a blik. Me ng kmal tureka a renguk el di mengibes er a di telkib."

Ng rirengesii e ko er a kekerei el ngor el kmo, "Merrengei, lak molibech e kau a kmal di kau el mengelebus er kau."

A Wilbur a chilsngekl e mesa a debar el dechor er a bita er a sersel a blil.

"Ng diak a orrimel er kau me di mkie er tilecha el kekeriei el dechudech el chutem." Ng millekoi a debar el kmal mereched a ngerel. "Ngar er ngii a mla mecham el sersel a blim me ng sebechem el tuchelii e odbechii el tuobed."

A Wilbur a uleker, "Ke dilu el kmo ngerang? Ke mo mekokokau me ng mo sebechek el mo medengei a omolekoi."

"Ng diak Isoak el omelekl. Ak di dmua el kmo, tiei el kimngar er ngii a kmal el ungil me bemtobed," aika a tekingel a debar.

"Ke dilu el kmo a chimo er a sersel a blik a mla mecham?"

"Choi. Ochoi, tia ikid a kulekoi er ngii," ng ulenger a debar.

Me a Wilbur a milrael el mo omes e a lebo e ng mera el chelam me ng tuchelii e odbechii el tuobed er a bita el ungil el obereberek. Me a debar a kmal mlo ungil a rengul.

A debar a uleker, "Ng ua ngera a rengum se el mngar er a klou el obereberek el chutem el diak mselers?"

Ng ulenger a Wilbur, "Ng soak. A kumdasu e ng soak."

A Wilbur a ko er a mle metitur el onger e le ng smau el di chelsimer.

Ng uleker el kmo, "Ng locha ungil el kukerang?"

Me a debar a kmo, "Bo er aike el soam. Bo mongiis a chemutii, e mongiis a uchul a maiis me aike el soam el dellomel. Bo moilil er a delul a bung e mruret el meliuekl aika el betok el kerrekar me a dellomel aika ia doruul a dengalek."

A Wilbur a kilengei e mocha melechesokl e remurt el meliuekl er a sers. Ng mocha mekekokil el melengtungel el osiik er a ungil lebo er ngii e metik er a mechuu el eungel a ringo el kmal sokol el mengiis er ngii. Me ng mocha tmaut el mengiis er ngii el choredengii a kmal klou. Me ng dirk mengiis el kmal ungia a rengul e a bechil a Homer a mesang me ng oldiu el lomekedo er a resechal.

Ng omekedo er a bechil e kmo, "Ng mla tuobed a babii. Ngike kid el ngar er a eungel a ringo el mla mechereuii a chutem."

A Wilbur a orrenge e kmo, "Ak mla mo er a diak lekirek el ngar er ngii mechelecha e te kuk mo osmerak."

A debar a rirengeii a klou el cherodech me ng oldiu el oldurech er a Wilbur el kmo, "Mrurt el mo metengel el mo er a chysel a chereomel e bertau e ng diak a rolir el betik er kau."

A bilis a tilobed el mo oltoir er a Wilbur e ng tobeda

a Homer el ulureor er a mesil el mong. Ng ulerremenges er a Lurvey el millamel er a sers me ng mochang. A lebeteknga a rechad el merema e ng di kea lodengellii a lebo er ngii a Wilbur le tia el chereomel el lulekoi er ngii a debar a cheroid el Imuut kung me a Wilbur a dimlak lodengellii a chelsel me ng mle bekikl el mo el riid.

A Homer a dilu er a Lurvey el kmo, "Bo er a ullel a mo kokau el olechiis er ngii el mo bedul a bilil e bo kngai a ulengall."

Tia er a bo leketokl a rua Homer me a bilis e a recharm er tia el sers a di mlo medengei el kmo ng mla tuobed a Wilbur me ng udechmall. Le aika el charm a kautulechoid. A debar a ouchais er a kerebou me a kerebou a ouchais er a sib e ng merael ngii el chais el iueklii a sers. Tia er a lebo lodengei el kmo a Wilbur a mla tuobed e te di mlo kedechedechor el omes.

A Wilbur a dechor el di kea lodengei a loruul e le rechad a di okiullel me a rumes er ngii. Me ng omdasu el kmo, "A Isekum me ak tobed er a blik e ng ua isei el klou a cherrodech me a osengelek, e ng bai soak el di kiei er a chelsel a blik."

A Homer me a bechil me a Lurvey me a bilis a melengel er a Wilbur. Me ng kmal meknkite a rengul a Wilbur me ng longela el kmo, "Ngera me a Fern a diak lemei me lesebecheklak e ak kmal chebuul".

A debar a mocha dechor e oked er a Wilbur el kmo, "Mchiis. E moleiu e mchiis el mo er a chereomel."

A bilis a rirurt el mo omangch er a ochil a Wilbur me a Wilbur a oleiu e chemiis. A Lurvey a mlo omdecherm er ngii e tomir e bai mechulii a bilis. A bechil a Homer a

uleldiu e a debar a kmo, "Ng kot. Tia ikid se el kulekoi er ngii. Kau mluut el remurt e mluut el oleiu."


A kerebou a ngar er eou e kmo, "Mrurt el me er a eou."

A sib a ngar er a bab el Imangel el kmo, "Mrurt el me ngmasech."

A debar a kmo, "Mchibiokl e mrurt."

A malk a kmo, "Molechesokl e moloik."

"Alii, ngilecha a Homer," ng uleldiu a kerebou.



"Me ngilecha a Lurvey," ng millekoi a debar.

"Alii, ngilecha a bilis," ng lilangel a sib.

A debar a uleldiu el kmo, "Morrenges a tekingek."

A Wilbur a kmal tobeda a delebengel me ng di kea lodengei a loruul e le resechelil a kmal betok el di chemur a ngerir el mo er ngii. A rekmo, bemetengel, bemngasech, moloik e mordekekl me ng di kea lodengei el kmo ngera er ngii a lebo lerellii. Ng longela el di mlo chiuosechel a medal me ng di kea loes a ngerang. Ng mocha oureng er a Fern el kmo, "a le ngar er tia e ng sobecheklak e a kmal chebuul". Ng oureng e a lechisngekl e a Homer a dechor er bita er ngii el oba a baket el ngar er ngii a sub el kmal ungil a bul. Tia el sub a mle derengir a rua a Homer er a lomengur er a tutau me ng bek el bedengel a ungil el kall a ngar er a chesel.

A Homer a uleldars er a baket e kmo, "Bu, bu, bu, bu."

A Wilbur a milrael el mo kmeed.

A debar a ngar er a telia e kmo, "Lak obong. Tilecha el baket a di loba el omaol er kau el leko bo mkeed el chesmerau."

A Wilbur a dimlak lorenges a tekingel a debar e le bul tia el sub a kmal mle ungil me ngelmut el merael el olekeed el mo er a Homer.

A Homer a di mekekakil el omekedong er a Wilbur e merael el mo bedul a chesimer me a Wilbur a di okiullel.

"Ke mo ouuchel er a rengum er a uriul," ng millekoi a debar.

A Wilbur a mla mo diak lomekerreu me ng di merael el bedul tia el baket el kmal mocha kmeed er a blil.

"Ke kuk mocha mechesimer. E a tedeb el demedinges a diak a belkul er a bai lak dechelsimer me demededaes el sebeched el remuul a soad e desiik a keled."

A Wilbur a di diak lorrengees.

A lebocha er a chesimer e ng mlo tmuu a Homer el ochubel a sub er a blil a kelel a Wilbur e mocha ngubetii a mlecham el kerrekar me bo lemededaes me lesebechel a Wilbur el mo soiseb.

"Ka mluut el omdasu er a uchei er a obom tuu." Ng uleldiu a debar el mo er a Wilbur.

A Wilbur a di uluumechad er ngii e mo soiseb. Ng soiseb el mo er a ongolet me ng melim a sub e menga e kmo, "Ng kmal ungil a renguk el mla me remei."

Ng menga a Wilbur e a Lurvey a mocha meleel er tia el telemall el sersel a blil a Wilbur. A bocha lemerek e te mo chelireuakl e melaiu er a ulkel a Wilbur.

A Lurvey a dilu el kmo, "Ngika a bekerurt e mesisiich el babii."

Me a Homer a kmo, "Ochoi, ng teletelel a mo ungil a

bedengel e mo klou el babii."

Ng orrenge a Wilbur e kmal ungia a rengul er a dinges me a ungil tekoi el kirel me a ulkel el lolaiu er ngii. Ng ungil a rengul e ng di kmal mesululang er tia el rurt er ngii me ng dirk mellomes e ng sokol el mo bad.

Ng mocha mechiuaiu e omdasu el kmo, "Ak locha a kmal dirk kekeriei el dirkak lebo el sebechek el chemiis el di mo ngak el obekak."

IV CHAMIRENG

A bo el kukuk e ng kmal mle klou a chull e mekngit a eanged. Me oaol er a uum er a blil a Homer a di mlo olsesiseb. Tia el klungel a chull a ulechiis a sib el ulemdor er a uchul a kerrekar me te chiliis el mo er a chelsel a blirir.

Tia el sils e a Wilbur a ulemdasu a mo mengiis er a chelsel a blil me ng kmal mlo chetil er tia er a leme tia el kmal klou el chull.

A kot e ng ulemdasu a mo omengur er a euid el klok me a tedobech el menga a tebetbil a donats me a blauang me a budel a chemutii e melim a milk.

A uriul er itia e ng mle soal el mo milil ngii me a beab el Templeton a ngklel el kiliei er a eungel a ongolet. A Wilbur a dimlak Isoal el milil el obengkel a beab e ng di dimlak a ngodech el sebechel el ousechelei er ngii.

E a eai el mo er a etiu el klok e a leko ng mo mechiuaiu e omekngiis er a sils.

E a etiu el mo teruich me a ta e ng mo mengiis er a chutem e osiik a ungil el sebechel el mengang.

E a truich me a ta el mo sueleb e ng ulemdasu e di mo chelellakl el dechor e omes a eaes a bo el reboreb a

kerrekar me a hats a longetab a bngal a dellomel me a bebil er a mengelekel a charm a lemesesebesebek.

E a sueleb e ng mo ousueleb el menga a beras me a der el malk el ouasech e melim a mekelekolt el ralm.

A ta el mo eru el klok e ng mo mechiuaiu.

E a eru el mo edei e ng mo mengkas aikei el mekekad er a bedengel er a kbekbel a blil.

E a edei el mo eua e ng di mo dengchokl e melebedebek aike el mle ungil el omililir er a ngar er a mo e mengichiil er a Fern.

E a eua el klok e ng temel a blengur. Me ng mo menga derengel a kelel a Lurvey el blauang me a ringo me a cherredoched el chemutii me a derstelkib er a bek el bedengel a kall.

A Wilbur a ulemdasu aika er a uchei er a lebo lebad. Me a lebekiis er a tutau e lsa el klou a chull e ng kmal mlo chetil. E le rokui el mle soal el mo meruul a di mlo diak lsebechel.

Ng milrael el mo ultom el omes er a eanged e a lebong e a deribek a di soiseb el me subechii er ngii. E a lomes er a bita er a blil e ng kmal dekimes me a ongolel a mui er a ralm. Me ng omdikm el osiik er a Templeton e diak lesang.

Me a Wilbur a ulemekedong, "Templeton. Alii, ke dirk ngar er tilechang?" E dimlak longer me ng kmal mlo mekngit a rengul a Wilbur.

"Ng kmal elii me a chelecha el kungard er a chelebuul me a kerior," ng millekoi a Wilbur. "Ak dirk a ngeasek e diak a mera el sechelik er tiang. Me chelecha el leklou a chull el locha di chull el mo kebesengei e ng ngultebechel el diak lemei a Fern. Ng mera el dirkak kues a chelebuul el mo ua tiang." Ng di millekoi aika el tekoi a Wilbur a longela el kmo, "Ng di chelsel a eru el klebesei e ng mocha me ng eru el klangel."

A Lurvey a mlo melecha kekel a Wilbur me ng mengerodech el mo me ng ochubel a kekel a Wilbur e ngotechii a baket e a lomes er ngii e ng ko er a ngodech el di chellellakl. Me ng merael e kmo, "Ng locha smecher a Wilbur."

A Wilbur a dimlak lesecher me a dimlak lesengerenger. Ng di mle soal a lebo er ngii a sechelil me lidak el milil e le ng kmal mle seselk a rengul el di ngii el tang.

Me ng ulemekedo er a debar el dilengchokl er a bliil a sib el kmo, "Mei me doilil."

"Komeng, komeng e kau, e ng kmal diak lsebechek," ng ulenger a debar. "Ak mengeald a kleai el ngisek me lebo lsebechel el omeu. E ak choit e ng obangl me ng mo diak a rengelekek."

A Wilbur a dilu, "Ak uoi mlo mekngit ku e ng dimlak kudengei el kmo kemengetmokl a kuk mo bebil er a remo mesebsab a dellomel."

Me a Wilbur a mocha mengedecheduch er a sib el kmo, "Ng diak komei me doilil?"



A sib a ulenger, "Ng diak a rolek el leko milil el obengkem. Le kot e ak kmal kekeriei me ng diak lesebechek el longeur a sers el leko soiseb er a blim, me a lmuut kung, ng diak Isoak a rebabii. A rebabii a diak a belkrir."

A Wilbur a dilu, "Mekera el diak a belkmam? Ng diak a charm me a klalo me a ngii di le ngera el diak a belkul. A rokui el tekoi a di ngar er ngii a belkul. Ngar er ngii a meklou me a mekekeriei a belkul e ng di diak a diak a belkul. E le bolak a belkul e ng diak lengar er ngii er tia el beluulachad."

"Bo mluk. E di lekau el ta el milil e ng diak Isoak el milil el obengterir a rebabii," aika tekingel a sib.

Ng kmal mekngei a rengul a Wilbur me ng mocha

mechiuaiu e orrenge er a chull. Ng mechiuaiu e a Templeton a merema metengel er a kerrekar el mle ulsirs er a blil a Wilbur. Me a Wilbur a uleker, "Templeton, mei me doilil?"

A Templeton a chilsngekl e kmo, "Milil? E meludeu er a isngel me ng ouedikel a chesemel. Ngera el tekoi a milil?"

A Wilbur a kmo, "Ng belkul a kmo, kede remurt, e melechesokl, e kausekool, e loldeu a rengud."

A Templeton a ulenger, "Ailecha aike el kot er a chetik el tekoi. Ng bai soak el osiik a rokel a omenga, e omerebart er ngak el osiik e melengtungel a ungil mo kelek. E le ngak a di chad er a blengur e diak kchad er a omilil me a klekoel. Me ngak e tia el me menga a klungiolel a kelem e le ng diak a btelum el di ma kmang." A Templeton a di miltengel e chibiokl el mo dibus. Ng siliseb er a ta er a belsibs el rokel el mo tmoech er a le ngar er ngii a ongolel a Wilbur.

Ngika el Templeton a mle cheblad e meduch el medideuekl. Me ng riruul a rokel el okiu a cheslel a chutem me ng di misii a chimo el sers el melai a soal e diak a mesang. Ng blechoel el omais a leklebesei e bai bad a lemellomes.

A Wilbur a milsa a Templeton er a lechibiokl el tmuu er a belsibs el chutem. E a lluat el omes e ng oltmedum er a btelul er bita er a ongolel a Wilbur. E dimlak lemeketeket e ng ngosecha er a ongall me ng omengur el di menga er a chull. Me a Wilbur a omes er ngii el mla mo deblechelech e bai diak lechebur a Templeton e bai di ngii el chubur el di diak a resechelil me a diak a soal el milil el obengkel. Me a selengerngerel el mo uldak er

a kngtil a rengul e ng kmal mlo olengoech a bedengel me ng choitii el mo obengkangk er a bebul a dechil e longela el mengebechub.

A iieta er a sueleb e a Lurvey a mlo ouchais er a Homer el kmo, "Ng locha smecher a Wilbur e le ng di mechechiuaiu e dirkak a lekeli er a kekel."

Me a Homer a dilung, "Bo mongilmii er a asbring."



Me a Lurvey a ngilai a asbring el mocha omngim er a Wilbur. Ng milekengii a ngerel a Wilbur e otuu a asbring el mo er a omerkolel. A Wilbur a kmal mle chetil a telemtemul aika el kar me ng uim e kmo, "A di leua isei a klengar er ngak e kele lak klemelemii."

A lengelta a sils me a beluu le milkelkang e a Wilbur a mechiuaiu el diak a ngodech el rrenges, ng di roklet a okul a kerebou me a sib el meringet a kekel. Me ng

mechiuaiu el mocha olengenganged a medal e rongesii a mengemengemed el kmal el ungil el ngor el dirkak el ta el rengesii el ko er a dmua el kmo, "Wilbur, ng soam a lebo er ngii a sechelim? Ng meketeket er a kumes a kumngamk er kau er a klungiolem me ng soak el mo sechelim."

A Wilbur a di milekiis el mo dechor e kmo, "Alii, ke techang?" Ng merirekrik e losiik er a millekoi e kmo, "Ke ngar er ker el diak kusekau?"

Ngika el millekoi a ulenger el kmo, "Ngak e tie el ngar er a bab, me bo bad e molengull e ke kmal mesaul a bedengem me a klukuk e bochu dekaseoes e dechadecheduch e mosekak kung."

V CHARLOTTE

EL BUBUU

Ng mechiuaiu a Wilbur e ko er a kmal kemengeta a klebesei le ngii el di kea a iietel a medal el di omdasu er a ngor el rirengesii e lmuut ku me ng songerengera e le ng dimlak a ta el kall el lekelii.

Ng di milekekerekar e le tia el blil a charm a di blechoel el ngar er ngii a meseserechakl er ngii. Me se e lemekar e ng melanges er a chelsel a blil e omdasu el kmo, ng locha bekord mla mo tela el klok e le ng di orrechd el leko di lebo ltutau.

A lluut el mekar ngii el Wilbur e ng rirengesii a Templeton el mengard a kboub. Ng oreses er ngii el kmal el klungang me ng kmo, "Ngika el Templeton ngera me ng blechoel el omias a leklebesei e mengard a kbekbel a blirir a rebebil er a recharm? Ngera me ng diak lebo leua rubdois er a recharm el mekar a lemellomes e chachiuaiu a leklebesei me lak lolekar e longesang er a remechiuaiu?"

A kuk el lluut el mekar e ng rirengesii a debar el merereek e ongelengoll. Me ng milekekakil a Wilbur el mengululau el mo er a debar el kmo, "Ng tela el klok?"

"Ng bekord locha, .locha tedobech er a sueleb er a

klebesei, e kau ngera me ke di mekar?" ng ulenger a debar.

"Ng betok ak umdasu," ng dilu a Wilbur.

"Eii. Ngak a diak e mengesang er a uldesuek. Ak bai di mechesang el mengaet a ngisek." Aika lullekoi a debar e liluut el oker, "Ke mla ta el mongaet a ngais?"

"Ng dirkak a ta el kungaet a ngais," ngulenger a Wilbur. "Ng locha a kmal meringel el ureor? Ng tela el klebesei el mongaet e ng omeu kung?"

A debar a ulenger, "Ng locha..cha ta el buil. E ng di diak kdi kungaet el choilili a buil. Se el lemekeald e a kutamet a merat el llel a kerrekar el dokedek a ngisek e ngak a mo mengesuch el telkib e kuk mei."

A Wilbur a uluwas e liluut el mo bad. Ng mechiuaiu e ombeberous er tia el ngor el liluut el melekoi er ngii el kmo, "Kede mo mekur a klausechelei er kid er a klukuk me bo bad el lolengull me a klukuk kung e dekasoes."

Ng dirk tutau me ng mererenga a uchul a eanged e a Wilbur a mekiis. A lomes e ng dirk e mesesilkolk me a blii a charm a kmal el kellechaki.

A sib me a debar a ongelngul me a uos a oudengelngil me a Templeton a mla remiid el kuk mo mengesuch er ngii me ng di kea mengard er a kboub. A di mle ta el sebecchel a Wilbur el rongesii a chado el ko er a meseserechaki el mekekesebakl er a kelekolt.

Me ng dengchokl el mengiil er a sils el ngmasech e a lomes e ng cherengel a btuch el mocha diak loues me

a lomes a kokil e lobeketeklang. Me ng liluut el omes er a chelsel a blil a charm e a lomes e a debar a kmal el lultuu a btelul er a eungel a osebekel me a sib a kmal el dirk ongellngul.

A lomes me lesa el mellemesang el lesa el ungil a eanged e ng kmo, "Tia ikid ise el sils el bo kumes er a sechelik."

A Wilbur a ulsiik er a sechelil me ng milliuekl er a chelsel a blil e omes er a tensio el mo lmuut er aike el betok el ko er a urrukel er a blil e dimlak a losang. Me ng dilechor el omdasu er a rokel e bo lesebechel el metik er a sechelil e ko er a mle meringel e le recharm a dirk chachiuaiu me ng ka el sebechel el oker a tekoi er tir. Me ng omdesua el kmo, ng locha a bai kirrek el di omekedong e ochotak el kmo ak mla mekiis.

A Wilbur a milekiis el mo melemalt el dechor e ongoll e dula el kmo, "Alii, Alii. Ak ulengit er ngike el milengedecheduch er ngak er a kesus me lochotii." Ng ulemes el osiik er a mo onger er ngii. A lomes e a recharm a mekisa e olengeng e mengisngull er ngii. Ng kmal mlo chebechobel a Wilbur e ng di dirk kmal soal el osiik er a sechelil.

Ng liluut el millekoi a Wilbur el kmo, "Alii, Alii. Ak lmuut el omelekl er a ongtik. Ak ulengit me ngike el milengedecheduch er ngak er a kesus lochotii a lempera el mo sechelik."

A resib a oumisk e kmal el ngosecha a rengrir me te lmuut el ongengii e oisngellii.

A delrir a resib a dula er a Wilbur el kmo, "Lak mo ngebelung. E a sechelil a ledirk lemechiuaiu e mokisii

e ng bai uchul e ng medort a klausechelei er kemiu."

A Wilbur a mocha mekekakil el melekoi er a recharm el kmo, "Kulengit me mousubes e ng dimlak e ledu a renguk el olekar er kemiu."

Ng mocha ultuir er a bebul a dechil el kmal kmeed er a chesimer e diak lodengei el kmo a sechelil a dirk mechiuaiu er a kmal kmeed er ngii.

Ng ultuir a Wilbur e ng dumia a Lurvey el me melecha a kelel. Me ng mekiis el mo er a ongoel me ng kma a kelel el rokui e le ng kmal mle songerenger. E a lebo lemerek el omengur e ng chilsngekl, ngike el milengedecheduch er ngak er a kesus me e lochotii." Ng ulemes el osiik er a mo onger er ngii. A lomes e a recharm a mekisa e olengeng e mengisngull er ngii. Ng kmal mlo chebechobel a Wilbur e ng di dirk ke kmal soal el osiik er a sechelil.

Ng liluut el millekoi a Wilbur el kmo, "Alii, Alii. Ak lmuut el omelekl er a ongtik. Ak ulengit me ngike el milengedecheduch er ngak er a kesus lochotii a lemera el mo sechelik."

A resib a oumisk e kmal ngosecha a rengrir me te lmuut el ongengii e oisngellii.

A delrir a resib a dula er a Wilbur el kmo, "Lak mo ngebelung. E a sechelil a ledirk lemechiuaiu e mokisii e ng bai uchul e ng medort a klausechelei er kemiu."

A Wilbur a mocha mekekakil el melekoi er a recharm el kmo, "Ak ulengit me mousubes e ng dimlak e ledu a renguk el olekar er kemiu."

Ng mocha ultuir er a bebul a dechil el kmal el kmeed er a chesimer e diak lodengei el kmo a sechelil a dirk mechiuaiu er a kmal kmeed er ngii.

Ng ultuil a Wilbur e ng dumia a Lurvey el me melecha a kelel. Me ng mekiis el mo er a ongolet me ng kma a kelel el rokui e le ng kmal mle songerenger. E a lebo lemerek el omengur e ng rirengesii a kekerei e ngor el omekedong er ngii e a lomes el mo er a bab e ng mesa bubuu el ngar er a blil el omes el me er a eou el omes er ngii. Ngika el sechelil el bubuu el kekeriei el di ua klungel a kekerie el redechel a detimel. E kleai a chochil el lolab el omiroi er a Wilbur e kmo, "Ke mla mesekak?" Ng uleker a bubuu.

"Choi choi, choi choi," Ng ulenger a Wilbur. "Ungil el tutau el oubereberingel. Ke uangerang? E ngak a kmal dmeu a renguk el mengedecheduch e omes er kau. Ak omekedo er kau el kmo ngerang? Ng techa a ngklem?"



Me a bubuu a dula el kmo, "A ngklek a Charlotte."

"Charlotte techang? Ng techa ngklel a demam?" ng uleker a Wilbur.

"Ng Charlotte A. Cavatica. E ng di ke di omekedo er ngak el kmo, Charlotte."

"Kau a kmal kot er a reklebokel," a Wilbur a dilung.


Me a Charlotte a ulenger, "Ng diak kkot. Ak di klebokel el diak lobart a klungiolek. Kemam a rebubuu a blechoel el di mechell e lolab a klungiolam. Me ngak a diak kkot el ua rebek el bubuu e ng di sebechek el mo ua itir." A Charlotte a milengedecheduch e omkikrirech el mo bedul a Wilbur e kmo, "Ulekum me ng biusech a medak me ng sebechek el mo ungil el mesekau."

"E ng diak mungil el mesekak? Ngak e tia el kmal di ngar er a eungem," ng millekoi a Wilbur.

"Cho choi e Wilbur. Ak medengei el kmo ke di kmeed e ng di ngak a di ungil osengek er a kmeed e diak kungil el mesa a cheroid. Ng di ungil er a bebil er a tekoi e kuk meknjit er a bebil." Ng melekoi e ngii a suebek a iaes el mo bedul a blil me ng kmo, "Mosekak e kukedii e klechetii ngika el iaes."

Ngika a chimo er a iaes el milengetab er a ongolet a Wilbur e silebek el obuked er a blil a Charlotte me ng melubet a osebekel e diak lemengubet e le tia el blil a bubuu a mudeuuid.

A Charlotte a dilu, "Mosekak e kurekedii e klechetii." Me ng urrekedii e mocha oltobed a ko er a rekodoll er a btil e ng mai el rongedii ngika el iaes. Me a Wilbur a omes e kmal mechese a rengul er a Charlotte e ubra ngika el iaes.



Ng mlo merek a Charlotte e kmo, "Elecha el bla lemelechek e ng sebechek el mo er aike el soak er ngii, e mengchii. Mosang el di kea lesebechel el suebek me ng medechel el e ng mo blengur er ngak er a chelecha el tutau."

A Wilbur a kmal mlo mechas a rengul me ng uleker el kmo, "Ke kmo ng mo kelem? E lekau ke menga a iaes?"

"E a dang. Ak menga a iaes, chebud, rekas, kerekard, bechars me aike el mekekeriei el charm el me obuked er a blik. A lak kunga aika e ng diak a roel e kchad," aika a mle nger a Charlotte.

"Ke mera el meleko i e Charlotte? Ng ungil a telemtemul?" ng liluut el oker a Wilbur.

"Cho choi, ng kmal ungil a telemtemul. E ng di ngak a diak kmera el menga aika el charm. Ak di melim a resechir e le ng kmal el ungil," ng millekoi a Charlotte el kmal olengongaok a ngerel.

Me a Wilbur a ko er a ulengoll e mengemim a medal e kmo, "Charlotte, ak ulengit me lak mongedecheduch el ua isei. E ng kmal diak lungil a dolim a rasech."

"Ngera me ng diak kuuchais a klemerang? Aika mera el kuruul me ng diak lkirek el lomart. E Imuut ku me ng diak lengii a kot el soak el tekoi er a beluulechad e ng di tia ia a teletelel a klechad er ngak. Me a rebek el bubuu a di omuked a kelir me ng diak lsebechek el mo ngodech e le delak me a delal a delak me a rechedemam a milruul aika er a lekiei me ng ko er a mla mo siukang er kemam er a klechad."

"Ng betok a dengai er a rulemechell er kid el ngar er ngii a ungil me a mekngit er ngii. Me tia el omelim el rasech er kau a chimo er aike el diak lungil," aika a tekingel a Wilbur.

"Ng merang. Ng kmal mera aika el molekoi e Wilbur," ng ulenger a Charlotte e kmo, "ng di diak a kudengelii a ngodech el roel e bo kngodech er a rechedak. Me a diak kudengei el kmo, a remle uchelam te milekera e mdesuii omengaus el uuked el omuked a kelir e ng di se el domdasu e te bai locha kmal mle mellomes el mdasu a ua aika el tekoi."

A Wilbur a dimlak el soal el outekangel e melekoi a mekngit el kirel a Charlotte e ng di kmal mle chetil a omelim el rasech me ng liluut el kmo, "ng di omerelliu e Charlotte a kmal el rasech e beab e chebirukel er a klechad."

Me a Charlotte a dulang, "ng diak lsebechem el melekoi er kemam el ua sei a ngerem. E le kau a di kiei e okelall e kemam a diak a omeka er kemam me ng kiram el omdasu a roel e ng mo sebecham el omengur e melelmoem a klengar er kemam. Me a lak kimomuked a mekekeriei el charm el mengang e ng diak a ngodech el rolam e kiblengur. E lmuut e ku, ka di bo momdasu el kmo chomko ng mlo diak kimomuked a iaes me aika el mekekeriei el charm e te ultebechel el mla tomellii a klengar er a beluulechad."

"Ng merang?" ng uleker a Wilbur e dula el kmo, "ng mera el klou a belkmiu e le choblo lak chomchad e ng locha diak lungil a klechad el ua chelechang."

A debar a kelteketel el dengchokl e orrenge a

cheldechedechal a Wilbur me a Charlotte me ng ongoll e kmo, "A Wilbur a kmal ngesonges er a rolet a klechad e le ng kmal dirk kekeriei me ng betok a diak lodengei. Ng diak lodengei el kmo a Homer me a Lurvey a chomdasu a mo omekoad er ngii el mo odoim er a Krismas." Me ng melekoi a debar e mo olsesei er a chimo er a ngisel el mo er a eungel a delel me lesebechel el mo mekekeald.

A Charlotte a dechor er a bebul a iaes el mochu menga er ngii e a Wilbur a mo mechiuaiu e mutek a medal e le ng medal er a klebesei el mo uldak er a klungiolel a rengul el mla metik er a sechelil. Ng mechiuaiu e omdasu, "ng ungil e le ak mla metik er a sechelik e ng di ak locha mo mekera e le ng kmal soak a Charlotte er a rokui el tekoi e ng di se el melim a rasech er ngii a kmal chetik."

A Wilbur a milengard er a ringel el kirel a uldesuel el soal a sechelil e ko er a mle medakt e chetil a bebil er a teletelel. E ng di klemengetel a klausechelei er tir e ng di ngii el mo metik el kmo a rokui el meknngit el ulemdasu el kirel a Charlotte a kmal mle cheleuid. E le Charlotte a kmal bliochel el ungil a rengul me a omerellel a mo odeuil a rengul a Wilbur er a klemengetel a klengar er ngii.



VI ULENGULL ER A SKUUL

Se el uchelel a ongelolem el buil el temel a ulengull er a skuul e a bung me a kerrekar a di mo omung me ng di mo bechochod a bau el liueklii a beluu. A chelakngikl a mo katotaod el melenges a bngal a kerrekar. A beluu a mo meseked e le rengalek a me olengull me te oketa mo er a sers me a remo er a chei. A leblo lungil a chung er tir me lekereel a ngikel e ng kuk mlo sebechel el mo odimel a belsilir a lekebesengei.

Chelecha el ulengull er a skuul e a Fern a mo klou a temel me ng mo bek el sils el loldingel er a Wilbur. Me se el lebo e ng di dengchokl el ka longedecheduch e di omes er a Wilbur. A recharm a dirrek el kmal mla mo smau er a Fern me te mei me te chachiuaiu er a bita er a chochil.

Ng locha bekord el uchelel a ongeuid el buil e ng temel omelemotem el bokso. Me a Homer a otobed a cheremel el uos el mo oltamet er a mesil er a omelemotem. Aika el uos a oltamet er a mesil e a Homer a omesiur e ng melemotem a bokso. Tia a klou el sers me ng klou el bokso a ngeiuul er ngii me ng sebechel el ta el sils el di longelkall a mesil. A blil a charm a di mo bleketakl e le bokso a di me er a eou. A bo le merek a omelemotem e te bek el chad a mo

olengakt a bokso el me mengudel er a chelsel a blil a charm. A Avery me a Fern a kmal mle sorir tia el ureor. Te ulengeseu er a Homer el olengakt a bokso. Te ngmasech aika el bebul a bokso el ngar er a riakang el doraib el mo er a blil a charm. Tia el blil a charm se el lokekii er aika el bokso e ng kmal di ngii me a lebetok el otermodel el selumech. Tia a kmal mlo ungil el oililaol er a rengalek el kaiberebart er a delongeel.

Tia a locha temel a sim me a dbechel a dellomel a ungil me ng di omngei me a rua ngais a di ulemeu. Ng tia ikid el osisiu el taem e ng ulemeu a ngisel a debar.

Tia el sils el lomeu a ngisel a debar e a Fern a mle dengchokl er a blil a charm. Me a recharm a oketa kedengdengchokl me a rechachiuaiu e diak lodengei el kmo ngomenga a ngisel a debar. Ng locha dita el Charlotte a mle mereched el mo medengei e le ng ngar er a bab me ng sebechel el ungil el mesa a debar. A debar a di mle ua chelii e ng mo medengei el kmo ngomengu a ngisel. Me ng dengchokl el ka longerodech e le ng di mengiil ku ngelekel se el lomenga ngais.

Tia er a lobeu a kot el ngais el tobed a ngelekel a debar e a Charlotte a mle kot el mesa me ng uluchais er a recharm.

Ng dilu, "ak medengei el kmo kede locha rokui el kmal mo dmeu a rengud er a rengelekel a debar el omengang. Me tia dirrek el kmal el klou el chetengakl el mo er a sechelid er a debar el kmal mle meduch a rengul el mengaet a ngisel er aika el mla memo el Sandei mechelecha e ng mocha sebechel el olecholt er a rengelekel. Me ng soak el nguu tia el techall el ochotii a deuil a rengud el bek el charm el kirel a klungiolel a

urrerel a sechelid er a debar!"

Me a debar a mekiis el mo dechor el diak leko er a merur e osus el mo er a rebek el charm e kmo, "Kom kmal mesaul."

"Ke dirrek el kmal mesaul," ng dilu a ta er a klou el mechas el debar.

"Tia a kmal kot el ureor el bla mrelii," ng millekoi a Wilbur e oker, "Ak ko er a di mesa a chimong, ng tela a mla omeu?"

Ng ulenger a debar, "Te teuid."

"Ng mera el kot. Ke ungil a chung er a kau el mo oungelek er a teuid el ungil el ochur," ng millekoi a Charlotte.

"Ng diak lechung a uchul e blo leteuid a rengelekek. Ng dechal a renguk me a urelek a mle uchul," ng millekoi a debar el ko er a ousesima er ngii.

Ng milengedecheduch a debar e a Templeton a oltmedum er a btelul er a bita er a ongolet a Wilbur. Ng olechemeraech el mo er a Fern e merael el ombebereked er ngii er a kboub el mo bedul tia el lengar er ngii a debar. A recharm a omes er ngii e kmal bekikl a letemellii a ta er a ngelekel a debar. Ng dimlak a ta er tirka el charm el oumera er a Templeton me a lechub el sorir ngii.

A Templeton a uleker, "Ke ko er a kmo te teuid a rengelekem e ng di a ngisem a mle kleai. Ng milkesaki se el chimong? Ng ngera me ng dimlak lomeu?"

"Ng locha ulebangl, " ng ulenger a debar.

"Me ke mo mekera er ngii er a chelechang?" ng uleker a Templeton e olengeng er a debar el mengiil er a nger er ngii.

"Ng sebechem el nguu me ng kloklem," ng ulenger a debar. Ng ululterau er tia el ngais er a Templeton e le ngika el Templeton a kmal urrelel el mengurs a besbas el mo er a chelsel a bliil.

A ta er a klou el mechas el debar a ulerrenges me ng kmo, "Choi. Ng kmal ungil me mnguu me lengisem. Me ak di omeklatk er kau e Templeton er a di ta el tekoi el kmo - al sekum me ke ko er a mo kmeed er aika el ngelekel a debar e ke metechotech el kmal mo meringel el kuk meringel er se el kot el ringel el bla mcheremii er a klengar er kau." Ng millekoi a ta er aika el meklou el mechas el debar e merk a osebekel el olab el meruoru el ko er a olecholt er a klisichel.

Ngika a mera el mle bekeu e mesisiich el charm e ng di tia diak lengii a uchul me lullecholt er a klisichel. Ng ulecholt er a klisichel e loba el orouk er a Templeton me lak lebo lekeed e longesang aika el ngelekel a debar e le te mle bekikl a lemetemall. A rua beab a diak a klechubechub er tir me a diak lodengei a ungil el omeruul. Me a lebechei me bo lekeed er a rengelekel a debar e ng ultebechel el tomelleterir. Aika el teletelir a rebeab a di bla lodengei a redebar me aika el charm.

A debar a mlo chebecheb e odbechii tia el ulebangl er ngais el mo bedul a Templeton. Me a recharm a ulemes e kmal mederedirck a rengrir er a Templeton a lesa el kmal ungia a rengul me lolitai er tia el ngais el

merolang. Mo Imuut er a Wilbur el di menga a ngii di lenger me ng kmal mlo mechas a rengul er a Templeton me ng kmo, "Ng dirkak kues er a klengar er ngak a charm el soal a mla obangl el ngais."


A Charlotte a dirrouakl e kmo, "A beab a kuk beab. E kau e merrengei a diak modengei el kmo ng Imuut er ngar er ngii a kuk mekngit er tiang. Se el ngais chokmo ng obeu e tia el blai a mo diak ldengchekill."

"Ngera a belkul a tekoi el mo diak ldengchekill?" ng uleker a Wilbur.

"Ng belkul a kmo, ng mo diak a sebechel e soal el kiei er tiang e le bul a bediu el ngais a diak lemekard. Kede kmo, ng dub e le ng di mekodeterir a rechad me a recharm er a klisichel a mekngit el bul."

"Tia a diak kbo kumeu er ngii el ngai. E Imuut kung me ngak a kmal meketeket el meruul aika el mengkeketmokl a rua ngais me a betok el besbas me a kmal meduch er ngii," aika lulekoi a Templeton.

Ng millekoi a Templeton e mekekakil el oldubech er tia el ngais el mo er a blil el ngar er a eungel a ongolel a Wilbur.



Tia el di osisiu el sils el sa el mlo kellechaki a sers e a debar a chiltaki a kleuid el ngelekel el mo tuobed er a lukel e omais el melai a beches el cheluut. Te omais e a Homer a mocha melecha a kelel a Wilbur e mesterir. Me ng mocha dechor e omechur ngii el ngelekel a debar e kmo, "Te kmal klebokel e ungil el di mlo chad el rokui e di mle chimong a ulebangl."

VII MEKNGIT EL CHAIS

A klemengetel a taem el lekausechelei a Wilbur me a Charlotte e a Wilbur a mlo ungil el medengei el kmo a omengelel a Charlotte er a mekekeriei el charm el ua rua iaes me a bechars me a betok el bedengel a charm a kmal klou a belkul e ungil el tekoi. E le ng diak a di ta er a charm er a sers el mle soal a iaes. A uos me a kerebou me a rokui el charm a kmal mle checherd a rengrir er aika el iaes. Mo Imuut er a rua Homer me te millecha a chami er a blirir le ng kmal mle cheterir a iaes a letuu er a blirir.

A Wilbur a kmal el di chilat a omerellel a Charlotte er a rokui el tekoi. Ng kmal mle soal a teletelel a Charlotte el ma mekoad a iaes me a ngii di le mekekeriei el charm me bo lechelellakl er a uchei er a longa er tir.

A Wilbur a dilung, "Charlotte, ke kmal ungil er a omerellem el ma mekoad a charm er a uchei er a omongang."

"E adang! Ng diak Isoak el omekcharm a charm. Ak remus me te mad me ng diak lomelechiesiu a ringel se el kbo kungang," ng millekoi a Charlotte el kmal lolengongaok a ngerel.

A Wilbur a mocha omeka klebesei me ng bek el klebesei el domes er ngii e a klungel a di merael. A rua a Homer a omeka er ngii el edei er a ta el sils me ng di mechechiuaiu kung er a berraod. A ta er a klebesei e a Fern a mle oldingel me ng dengchokl er a kekeriei el kingal e omes er a ta er a kiklou el sib el milrael el mechengelakl er a blil a Wilbur e mengedecheduch er a Wilbur.

"Alii, ke ua ngarang?" ng millekoi a sib. "Ke ko er a kmal kedelebungang e oberedang."

"Ng merang. Ak mera el loberedang er a keldelebungek," ng ulenger a Wilbur e kmo, "Ak mla mo er a rak el di lorael ku klungek."

"Kerdi kaisisiu el dorael el mo meklou e kede obereod e mekedelebuu," ng millekoi a sib. Ng liluut el kmo, "Ke medengei el kmo ngera uchul me te omeka er kau e mengedelebuu er kau?"

"Ng diak," ng ulenger a Wilbur.

"Ng ko er a chetik el outulechoid e ouchais a meknjit el chais e ng di uchul me te omeka er kau e mengedelebuu er kau, tir el sorir el mo omekoad er kau," ng dilu a sib.

"Te mo mekerang?" ng uleldiu a Wilbur e okelekel. A Fern a dengchokl el kmal mla mo merech er ngii el chetil aika el tekingel a sib.

"Te mo omekoad er kau. E meruul a lekem el mo mangtekang me a techem a mo odoim," ng millekoi a sib. Ng liluut el kmo, "A rebek el babii el mla mo ungil el

odoim a leblechoel el omekoad se el lebo lemekelkolt a beluu. Me a rechad er tia el sers a mla mo katekoi er a kodellem el mo odoim er a Krismas."

"A John el demal a Fern me ng ta er a remo omekoad er ngak?" ng lilangel e oker a Wilbur.

"E adang. Se el lomekoad a babii e a rebetok el chad a me olengeseu. Ng kmal meketeketa el kekiei me ak blechoel el omes er tir se el loureor. A John a blechoel el loba a bosel el skobetang el mei el me omoes "

"Ng mereko e lak molekoi," ng uleldiu a Wilbur e lmangel el kmal el mlo klou a lengelel e kmo, "Ng kmal chetik el mad! Ng techa a mochu sobecheklak e losebelak e a kmal chebuul!" A Fern a milrech er ngii el leko mekisung e rongesii a ngor el millekoi.

"Bo mluk e Wilbur!" ng millekoi a Charlotte el meketeketa el dengchokl e orrenses er a Wilbur me a sib el chadecheduch.

"Ng diak lsebechek el mo lmuk," ng lilangel e oldiu a Wilbur el ngmasech e metengel er a chelsel a bliil. Ng liliut el kmo, "Ng kmal chetik el mo okodall me a diak Isoak el mad. Charlotte, aike el lolekoi a sib ng mera el tekoi? Te mera el mo omekoad er ngak se lebo lekeed a Krismas?"

A Charlotte a milengedecheduch, "A domes e ng teletelel a mera el tekoi. E le sib a meketeketa el ngar er tia me ng mla mes a betok el babii el mla mei e oketa mo okodall e le Krismas me ng ultebechel el mera el tekoi a lolekoi. Ak di kmal oucharm er a sib el ouchais a diak lungil el chais el diak a resorir el orrenses me a

lehub e te omdasu."



A Wilbur a liluut el kmal el mlo klou a lengelel el lelmangel el mengebuchub e kmo, "Ng kmal chetik el mad e le ng soak el kiei er tia el blik el teloi er a resechelik e outeliil aika el ungil el eolt e omekngiis er a sils."

"Wilbur, ng ko er a oltobed a chur a lengelem me a teletelem," ng dilu a sib.

A Wilbur a kmal di kea lemedebes a lengelel. Ng lmangel el metilech er a chutem me ng mengad er ngii e kmo, "Eang kmal el chetik el mad!"

"Ng diak chobo mad," a Charlotte a millekoi.

"Ngera ke dilung? Ng merang?" ng lilangel a Wilbur e oker, "Ng techa a mo osobelak?"

"Ng ngak," ng ulenger a Charlotte.

"Ke mo mekera e osebelak?" ng uleker a Wilbur.

A Charlotte a ulenger, "Ng diak kudengei el kmo ak mekera a kulsobel er kau e ng di sebechek el mo mdesuui a ungil el roel er a uriul. Mereko e bo mluk e lak mko er a oungelek er kau. Ng diak Isoak el orrenges a langel me a ko er a klebelung el omeruul."

VIII TEKOI ER A BLAI

Ng tutau er a Sandei me a rechad er a blil a Fern a kldibel er a uum el omengur. E a Avery a di mla mo merek me ng mlo er a delemerab er ngii me ng mengitituuk er a bosel e a John el demal a Fern me a Fern me a delal a dirk dengchokl el omengur.

"Ko medengei el kmo a cheremel a Homer el debar a mla omeu?" ng uleker a Fern.

"Me ng tela a ngelekel?" ng uleker a demal.

"Ng kleuid," ng ulenger a Fern e ouchais. "Ng mle kleai a ngisel e a chimo a ulebangl me a debar a ngiluu el oterur er a Templeton le ng mla mo diak a belkul er ngii. Me a Templeton a ngiluu ngii el ngais el mo er a blil."

"Ng milekera a debar?" Ng uleker a delal a Fern e olengeng er a ngelekel el kmal meklou a medal e mechesei a rengul er ngii.

"A debar a dilu er a Templeton el kmo mnguu me lengisem e ng diak a belkul er ngak," ng ulemelekl a Fern.

"Ng techa a Templeton?" ng uleker a delal.

"Ng beab," ng ulenger a Fern. "Ng diak a di ta er kemam el soal ngii."

"Rungalek, ng techa a kemam? Ng kemiu el rua techang?" ng uleker a delal.

"Ak melekoi er kemam el rokui el ngar er a blil a cheremel a Homer. A Wilbur me a rua sib me a kerebou me a uos me a rua debar me a demerir me a rengelekir me a Charlotte me ngak."

"Charlotte?" ng uleker a delal er a Fern el kmo, "Ng techa a Charlotte?"

"Ng sechelil a Wilbur el kmal mellomes a rengul e meduch er a rolel a betok el tekoi."

"Ng ua techa el redil a Charlotte? Ng ua ngera a teletelel?" ng uleker a delal.

"Ng ko er a . . . ," ng dirk ulemdasu a Fern e dula el kmo, "ng kleai a ochil. Ak umdasu e a rokui el bubuu a di dersekleai a ocherir."

"E a Charlotte ng bubuu?" ng uleker a delal.

"Chochoi, ng ko er a bedengel a chebechab e kiei er a blil el chelaus el uuked el ngar er a bita er a chesimer er a blil a Wilbur. Ng ousbech er a blil el uuked el lomuked a iaes e melim a resechel me a Wilbur a di kiei el di chemat er ngii."

"Aika ng mera el chais e rungalek?" ng uleker a delal el ko er a mechas a rengul er a ngelekel e kmal mla mo bekikl er ngii el ko er a teletelel a kebelngong el mesaod a tekingel a charm.

"Chochoi. A Wilbur a kmal soal a Charlotte." Ng millekoi a Fern e oker, "Ke medenge el kmo ng ngera ng dilu a Charlotte er a lomeu a ngisel a debar?"

"Ng kmal diak a dita el klemedengei er ngak er a tekingel a Charlotte. Ka mouchais," ng millekoi a delal.

"Se er a lekot el omeu a chimo er a ngais me be ltoech a btelul a ngelekel a debar e ngak a dilengchoki er a bliil a charm me a Charlotte a klebikl er a bliil e milengedecheduch er a rebek el charm el kmo, "Ak medengei el kmo kede rokui el kmal mo dmeu a rengud a bo deues a ngelekel a debar el kmal lemeketeketa a delrir el mengaet er aika mla memo el Sandei. Me chelecha e ng mocha temel el omeu me kede mo omes a klungiolel me a ungiyal a urrelel ngika el ta er a resecholid." A chomodasu aika el cheldechedechal a Charlotte e ng diak lungil?"

"Chochoi e rungalek. Ng kmal lungil el kot el cheldecheduch." ng ulenger a delal e kmo, "Fern, Ak umdasu e ng mla mo temiu el mo er a omesuib er a lkelesia me msbedii a Avery e bo mongetmokl er kau. E a telia el sils e ng kmal soak omluut el ouchais a chisir a recharm er a bliil a Homer. Ke ko er a di kiei ku er a bliil a cheremel a Homer me ke mochu lobes er a mera el blim. A da chomomdasu e ng diak Isa el betok a temem el mchoit er sei?"

"Ng kmal soak el ngar er sei e chedei. " ng ulenger a

Fern e suldii a ngerel e remurt el mo er a delemerab er ngii el mo mengetmokl er ngii. Ng merael e a delal a mocha mengelulau er a bechil.

"Ak kmal bekikl er a Fern. Ke rirengesii er a losaod er a recharm el leko te chadecheduch?"

Me a bechil a ongoll e kmo, "E a Ita te mle chadecheduch. A lebebil er a taem e kede dirrek el omdasu el kmo a recharm a locha dirrek el chadecheduch. Lak kobekikl er ngii. A rengalek a meduch el di tir el mes e mdsu a lekong kuk bebil er a klechad. Te blechoel el remenges e mdsu a betok el tekoi."

"Ak medengei a chomolekoi e ng di ngak a kmal suebek a renguk er a Fern. Ak locha bai mo mesa a Dorian el toktang el kirel tia el teletelel a Fern. Ak medengei el kmo a Dorian a kmal soal a Fern me ng sebechel el ngosukid el mesa a ungil el roel e ng diak leko er a ngodech a omerellel a Fern. Le kede rokui el medengei el kmo ng diak a recharm el mengedecheduch. Tia a rullak me ak kmal mo suebek a renguk er a Fern."

A John el demal a Fern a ko er a milengemim a medal e kmo, "A Ita e ng bai kid a meknjit a dingad me ng diak derengesterir a recharm a lechadecheduch e a Fern a bai diak lekelsakl e bai kuk ungil a dingal el rongesterir a recharm a lechadecheduch."

IX

KLIMELENGEL A WILBUR

A blil a bubuu a kmal mesisiich e ng di bek el sils e lolabek e le se lobuked a charm er ngii e te kmal mesisiich el melubet er tir me tetmat a derstelkib er ngii. A Charlotte a blechoel el kerkikl el melabek er a bill se el lemechunga a sils e le ng chetil a Isal el mo meklou a selodel er ngii e le ng mo diak leuked a kelel. A Fern a mlo medengeli se el taem el lolabek er a bill a Charlotte me ng blechoel el mo oldingel er a osisiu el taem me ng omes er a Charlotte a loureor. Me a ta er a ieta a sueleb me lemechunga a sils e ng mlo me ng dengchokl e orrenge er a Wilbur me a Charlotte a lechadecheduch.

"Kau a kmal bsebsuchel a ochim e Charlotte," ng millekoi a Wilbur el mo er a Charlotte er a Isal mechesa a Charlotte el melabek er a bill.

"Ailei el ochik a bsebsuchel e le ng betok el ureor a loruul," ng millekoi a Charlotte. "E Imuut ku a di chimo er a ochik a ngar er ngii a Imuut el kleuid el ko er a rechelel el meruul a kakerous el ureor. Ng ngar er ngii a orreked me a mengaus me a omiir me a omereked me a omuid me a melibuk me a oltamet.

A Wilbur a ultuir e omes el mo er a Charlotte el ngar er a bab e kmo, "Lak mounyelakel."

"Mekera el oungelakel. Ng diak kuungelakel", ng dilu a Charlotte.

"Ka mluut el melekoi aikei el ngakl e ng dimlak bo kudengei er se er a omkot el melekoi." Aika tekingel a Wilbur.

"Orreked me a mengaus me a omiir me a omereked me a omuid me a melibuk me a oltamet," ng ulemelekl a Charlotte.

"A chedileang!", ng millekoi a Wilbur e omes a ochil e kmo, "ngak a diak lekleuid a cheldngelel a ochik."

"Ualekoi e merrengei," ng dilu a Charlotte. "Kau me ngak a kmal kakerous a klechad er kid. Kau a diak mongaus er a blim e ng di ngak a cheuikl a blik me ng kmal kirek el ouach a betok."

"Ng locha sebechek el mengaus a blil a bubuu a kulasem," ng millekoi a Wilbur. "Ng di kmal dirkak el ta me kungaus."

"Ng diak mesemau e dosekau," ng millekoi a Charlotte. Me a Fern a dengchokl el melim a cheklul e ko er a mad el klidmechur el sokol el omes er a Wilbur me a teletelel.

A Wilbur a kilengei el mo melasem el mengaus me ng dilu, "Ka mchambai er ngak e kulasem el mengaus."

Ng locha omosiroi el ureor. Ak mekera a kumuchel?"

"Motungii a telim e msisichau el outeliil," ng millekoi a Charlotte e mengim er a cheril. "E bo mngasech er a kedidai el mo er se el kot el sebechem el ngimeklii. Ka momes er ngak." Ng millemiaki a Charlotte el mo er a bebul a chesimer me a Wilbur a milsuub er ngii me ng rirurt el ngmasech er a bebul a dechil a kerebou.

"Tia ikid!" ng dilu a Charlotte. "Elecha e ke dmeu a ochim me ng melecheraki er a ekil e ke suchesoki el mo merael er a bab e choitii ekil se lebochu er a eou!"

A Wilbur a dechor el ko er a omai er a rengul el telkib e mocha suchesoki. Ng ridekekl el mo er a bab e chilsengkl el omes er a ullel el kmo ng chilteklia a ekil e a lechisngekl e ng diak lesa ekil. Ng dimlak lemeketeket e ng kesbedechaki er a chutem el kmal mle klou a kesebeklel me ng oldiu el oungeech.'

A Charlotte a kmal mlad er a deroaki. Ng di ulecherechur me a blil a di mocha meririau.

"Ak millekera me ng mlo meknngit?" ng milekiis a Wilbur er a chutem er a lemesisicha e oker.

"Ng dimlak lemekngit. Ak umdasu e ng kmal mle ungil e ng di ng dirk ketengem me a uchul me ng dimlak Isal mo ungil," ng millekoi a Charlotte.

"Ng soak el Imuut el mo esemak. E ng locha bai ungil a kuusbech er a telkib er a kerreel el ko er a orreked er ngak," a Wilbur a dilung.

Ng milrael a Wilbur el mo er a bita er a ongolet e dilu

el kmo, "Templeton, alii ke ngar er a blim?" A Templeton a me ultom er a eungel a ongall e omes er a Wilbur.

"Ng ngar er ngii a kerrelem el sebechek el longir el mo mengaus er a ko er a blil a bubuu?" ng uleker a Wilbur.

"Chochoi, ng kmal ngar er ngii," ng ulenger a Templeton el kmal chad er a omengetmoki el kerreel me a betok el klalo. "Ng diak a meringel. Aike el mousbech a di ngar er ngii er ngak," ng millekoi a Templeton e metengel el mo er a blil me ng osesengii a ngais el choridii e ochudii a kerreel e merema ngmasech e loba a becheleleu el kerreel el kmal idokel.



A Wilbur a nguu tia el kerreel el melebeltii e mesang. "Tia ikid a ksa el ousbech er ngii," ng millekoi a Wilbur. "Moutekangel e Templeton el nguu el lochetii er a kemrik?"

A Wilbur a ulelsesei el mo kmeed er a Templeton e ko er a modengchokl me a beab el Templeton bo

Isebechel el lochetii a kerreel er a kemril. A Templeton a mocha melechet er tia el kerreel er a kemril a Wilbur me ng lilechetii el leru a delibeklel. A Charlotte a dengchokl er a blii e omes el kmal dmeu a rengul le ng di ua Fern el kmal soal a Wilbur le ng semeriar el mesuub e melasem a tekoi el diak ledi lengera e lechoit a loruul el tekoi.



A bocha lemerek el melechet er a kemril a Wilbur e

ng ngilasech el mo er a bebul a dechil a kerebou me ng dechor el kmal ungil a rengul e omdasu a kmo chelecha e ngak a kmal mo ungil. A Templeton me a Fern me a Charlotte a dengchokl e omes er ngii.

"Se kid. Momes e ak mochung!" Ng dilu a Wilbur e suchesokl el mo merael er a bab. Me a kerreel el ulebes er ngii me ng dimlak lechetii a bita er ngii er a kuk ta er a klalo a di ulekiu ullel me ng di mlo diak a belkul tia e longeru e lomelsemel a Wilbur e ngii a mengai el me kesbedechakl er a chutem el mecheld. Me a iuosech er a medal a mengerengader. A Templeton a omes er ngii el ko er a mad el chubur e mekngit a rengul er a Wilbur. Me a Charlotte a di lukong el diak louedikel el telkib e mocha mengedecheduch.

"Ng kmal diak lsebechem el mengaus a blil a bubuu e Wilbur me ng ungil a omnguu a uldesuem er ngii e le ng ngar er ngii a teblo el klekedall er a omengaus el diak er kau."

"Ng ngera me a ngerang?" Ng uleker a Wilbur el ko er a kmal mad el delebsochel e mekikngit a rengul.

"Ng diak a klekedellem er a omengaus el lmuut ku me ng diak komeduch er a rolel a omengaus. E lak lemekngit a rengum e ng diak a belkul er kau a mengaus a uuked el omuked a kall e le Homer a omeka er kau e lede er a ta el sils."

A Wilbur a dula, "Ke mera el mellomes e meduch er a betok el tekoi e Charlotte e ngak a kmal diak a kmeduch er ngii. Ak umdasu e ak di uluusimang el di ngak el omekringel er ngak er a klimelengek."

A Templeton a mocha kodekedii a kerelel er a kemril

a Wilbur e nguu el remiid el mo er a bill. Me a Charlotte a luueta el mocha melabek er a blil.

Ng melabek er a blil a Charlotte e mengedecheduch er a Wilbur el kmo, "Lak lemekngit a rengum e Wilbur e ng diak lebetok el charm me a rechad er a beluulechad a meduch el mengaus. Ng mo lmuut er a rechad me te diak lemeduch el ua rebubuu e ng di te omdasu el kmo te meduch me te blechoel el melasm a ngii di lengerang. Ng mla ta el mrengesii se el kot el kemanget el did er a beluulechad?"

A Wilbur a millemesim er a bdelul e kmo. "Ng uuked el di ua blil a bubuu?"

"Ng kmeed el ua blil a bubuu," ng ulenger a Charlotte. "E ke medengei el kmo ng mle tela el rak el lomekedechor er ngii? Ng kmal cherrungel el eai el rak. Chokmo ng ua isei a klemengetel a urelel a blik e a klocha mad er a kall er a uchei er a bo lemerek. Ngak a mla mo smau el mereched a kuruul er a chimo el blai. Ng sebechel el di ta el kesus e ng merekui a chimong."

"A rechad te ousbech er se el kemanget el did el omuked a ngerang? Te omuked a charm?" Ng uleker a Wilbur.

"Ng diak," ng ulenger a Charlotee. "Ng diak a lomdecham. Te di rirellii me bo lsebechir el merael er ngii el mo me a mei e le te omdasu el kmo ng ngar er ngii a bo lebetik er a bita me a bita er ngii el did. Chokmo ng ngar er ngii er tir a mo chelelaki el telkib el mengiil e ng ultebechel el ngar er ngii a mo duum er tir el ungil. Ng di rechad a diak leua isei. Te di sorir el di blechoel el di chelskall el memo e a debelid e te kuk dumiang. Ng diak a dita el bung er a klok el leko er a

chelellakl. Me se el kumes e ng di ngak el kmal mo dmeu a renguk e le kbubuu el kmal uldelomel a delengcheklek me ng diak kuleuaoch."

"Ng ngera a belkul a tekoi el uldellomel?" ng uleker a Wilbur.

"A uldellomel el delengchokl a belkul a kmo, "ng klou a temek el chelellakl el kiei er a blik. Ak rullii a blik e kiei er ngii e mengiil a ungil el me obuked er ngii. Ak kiei er a blik me ng klou a temek el ungil el omdasu, e diak krurt el miboid a betok el chutem me a beluu."

"Me ngak a locha dirrek el uldellomel a delengcheklek. E ng di tia a Isoak me lechetik me ngak a locha kirek el di kiei er a telkib. Ke medengei el kmo ng ker a soak el ngar er ngii er a chelecha el kebesengei a sils?" aika a tekingel a Wilbur.

"Ng ker?" ng uleker a Charlotte.

"Ng kmal soak el mo er a chelsel a chereomel me a kusiik a isebsab e kusiik a dellolomel er ungil el kall a risel e kungiis el mengikiis e di kulengtungel el mererorael," ng millekoi a Wilbur.

Ng di mlo merek el mengedecheduch a Wilbur e a ngelekel a sib a tmoech e kmo, "Ke melekoi a melengtungl? Ng diak modengei el kmo kau a kot el mekngit a bum me a bul a blim? Kerdi ngar er a cheroid e turengur a bum e leng mesisiich el mekngit el bau er a chelsel tia el blid el rokui."

A Wilbur a kmal di milechid a chiklel e mocha mereberebet a iuechel a medal er a rrengel. Me a

Charlotte a milsa a Wilbur el kmal merrengang me ng chilsngekl el ongengii a sib e kmo:

"Di btekii a ngerem e lak moldars er a ngerem el mo er a Wilbur," ng millekoi a Charlotte e kmo, "A Wilbur a kmal di ungil a longetelaki a bul e le delengecheklel a rullii me ng ua isei. Me kau a diak molekoi e le ng ka lungil a bum. E lmuut ku, ke merur ng diak el mla dobehii a kmal mle ungil el cheldechedemam? Ng ngera dulsaod er ngii e Wilbur er se er a lemei a diak a rengul el sib el dobehii a cheldechedechad?"

"Ak mla obes," ng ulenger a Wilbur. "Becherei e ng diak lesa el klou a belkul me dolengull er a cheldecheduch e ak kmal mesulaul. Mongaus er a blim e bo kultuil e kumes er kau e ng kmal ungil a eanged er a chelecha el kesus." Ng mlo bad a Wilbur e melemelamet er ngii.

Ng kebesengei me ng kellechaki tia el bliil a cheremel a Homer el ko er a kmal ungil a cheltel e ungil a rengud a dengar er ngii. Me a Fern a medengei el kmo ng mochu temel a blengur er a bliil me ng kirel el mo remei a di kea Isoal el merael. Ng kie el mechesengo e lomes a betok el bedengel a charm e orrenge a cheldechederir. Ng suebek a remekekeriei el charm el olab a kelir a rengelekir el omeka er tir. Me a kuk bita er tia el sers a katotaod a bek el bedengel a charm er ngii el ousesisuau me a reko er a mengitaki. A Lurvey a mo rullii a delengcheklel er a eungel a kerrekar e otutii a bebel e melamech a dekool. Me a recharm a di mo melungel er tia el bul a baeb el dekool. A Wilbur a mechiuaiu e orrenge a ngerel a dechedech me a kesebeklel a chesimer er a uum. Tia er a rrenge aika el cherrodech e ng kmal menga el mlo dmeu a rengul el chad e ta er a belsachel er a rengar el charm. Me ng mechiuaiu el kmal ungil a rengul e lotka a tekingel a sib

el mo er ngii el kirel a kodellel. Me a uldesuel er a kodall ng mocha omritel el ta el charm.

"Charlotte?" ng ulemekedo el kmal mengululau.

"Ng ngera ke dmua e Wilbur?" ng ulenger a Charlotte.

"Ng kmal chetik el mad," ng dilu a Wilbur.

"Lak el sebek a rengum e ng kmal diak a rolem e bo mad," ng millekoi a Charlotte el ko er a melisiich er a rengul a Wilbur.

"Ng ko er a kmal soak el delengchokl er tiang," ng dilu a Wilbur. "Le rokui a ko er a kmal di ungil me ak kmal smonga er ngii."

"Ng kmal diak lekelsuul e le kede rokui el kmal mla mo smau er tia el delengchokl." Ng millekoi a Charlotte.

Ng tmoech a debar el mengetakl er a rengelekel el di mererd a iklir e lomsoes er a recharm e dirrek el ko er a mengchechitakl. Me a Wilbur a omes er tir el kmal ko er a medemad el klitmechur e le te ko er a kmal klebokel e ungil a iklir.

A Wilbur a liluut el omekedong, "Charlotte?"

"Ke mera el melekoi el kmo ng sebechem el mo sobecheklak me ng diak lebo lomekoad er ngak?"

"Wilbur, alta e ng sebechek el oungelekel er a rebebil er a recharm e ng di kmal diak kuungelekel me a

diak kumulak er kau e le ng kmal el chetik omad."

"Ke mekera e sobecheklak er a kodellek?" Ng uleker a Wilbur e le ng kmal mla mo bekikl me ng soal remenges a ungil roel a lemesebechakl me lak lemad.

A Charlotte a kmo, "Ng dirkak a uleterekokl el teletael el bla kudesui e ng di ak kmal dirk meringel e lomdasu er a mo ungil el roel."

"Eii," ng millekoi a Wilbur. "Ng kmal dmeu a renguk el orrenge er kau me a tekingem. Ng ua ngera aike el bla mudasu? Chomomdasu e ng mo oureor?"

Ng uleker a Wilbur el mededudeu a ngerel e ng di Charlotte a dengchokl el klou a rengul el diak leko er a teletelel a bekikl me a lechub e ng suebek a rengul.

A Charlotte a dilung, "Lak el sebek a rengum e ng betok a bla kudasu el tekoi e ng di dirkak lebo lekeed a temel el dousbech me ng dirkak ksa el mo komakai er a kmo ngera er ngii a bo kuusbech er ngii. E ng di ak medengei el kmo a chimo er ngii el bo kngiltii a mo meruul el kmal mo ungil."

"Ng oingera e ke kmal mo oureor el omdasu er a roel e ng diak lebo lomekoad er ngak?" ng uleker a Wilbur.

"Se el ktelecherakl e ngak a omdasu. Ak usbech el chelellakl e mecherirei a bdeluk me ng cheliraor me ng sebechel a uldesuek el mo dmak," aika tekingel a Charlotte.

"Ng kmal soak el olengeseu er kau me a le ngar er

ngii a sebechek el rullii e ak ulengit er kau me ke subedak," ng dilu a Wilbur.

"Becherei me di lengak el osiik er a ungil el rolet. Ng bai sebechek el ungil el omdasu a di lengak el ta e meringel a kumdasu el obengkel a ta er a rechad," ng dilu a Charlotte.

"Mada alii ke di medengei el kmo a le ngar er ngii a ngii di el ngera el soam a krellii e ak kmal semeriar el ngosukau er ngii," ng millekoi a Wilbur.

"Ng ngar er ngii a kmal soak a chobo mrelii," ng dilu a Charlotte. "Ng soak a chobo molengull el mo ungil a cheliuem me lak mko er a medemad el bekikl e mrerechuchel. E dirrek el kmal soak a chobo mungil el omengur el kma a kelem el rokui ngii e di bechei a sesei me lomech er a Templeton. Chobo mungil el omengur e ng ngosukau me ke mo kedelebuu el chedidiich a bedengem e ungil a medam a lsemeriar er kau a resechelim. Ke medengei aika el kulekoi?" Ng uleker a Charlotte.

"Chochoi. Ak kmal ungil el medengei," ng ulenger a Wilbur.

"Mada bo bad e ng klou a lengesuir er kau," ng dilu a Charlotte.

Ng merael a Wilbur el mo er a cheldeng er a blil el ko er a mesesilkolk e choitii el mo bad. Ng mutek a medal el telkib e lmuut el mok e mengedecheduch.

"Charlotte?" ng ulemekedo a Wilbur.

"Uii! Ke dmu ngara e Wilbur?" ng ulenger e oker a Charlotte.

"Ng sebechek el mo odngelii a ongolek e alta lemlak kka a kelek el rokui? Ak umdasu e ng dirk mla er ngii a sesei er a beras el mle medechel."

Aika tekingel a Wilbur.

Ng ulenger a Charlotte el kmo, "Chochoi. Bo e ngii di morechedau."

Ng milekiis a Wilbur e remurt el di mesesibas el mo bedul a ongolel.

Me a Charlotte a kmo, "Alii, ke mekekokau! Ke orrechd e ng di ke mengellakl er kau e merael el diak kom teletelel a rerechuchel!"

Ng mocha a omakes a Wilbur el mengellakl a ochil el merael el mo er a ongolel. E a lebong e ng ngar er ngii a beras er ngii me ng mekekokil el kmang a luueta el merael el mei er a dukllet me ng mo bad. Ng di mlo ultuir el telkib el diak longerodech e kuk el lmuut el mengedecheduch.

"Charlotte?" Ng milengelulau el omekedo er a Charlotte a Wilbur.

"Ee!" Ng ulenger a Charlotte.

"Msall e kbo kulim a milk? Ak omdasu e ng dirk ngar er ngii a milk er a ongolek." Ng ulengit a Wilbur.

"Ng diak. Ng bechachau el medirt a ongolem el diak a chisil a sesei el milk. Me mereko e bo bad e butek a medam e lak mongedecheduch me lesechem el olengull." Ng dilu a Charlotte.


Me ng mocha mechiuaiu a Wilbur e a Fern el meketeketa el dengchokl e orrenge er a Charlotte me a Wilbur a lechadecheduch a mekisa el merech er ngii el mo remei. Ng mengedmokl er ngii el remiid e kmal dmeu a rengul e le rokui el cheldechedechal a Wilbur me a Charlotte el lerirenges a kmal di mle ungil. A lorola e ng rongeseterir el liluut el chadecheduch.

"Bo debad me a klukuk kung e Charlotte!" ng dilu a Wilbur.

"Chochoi e Wilbur me a tutau," ng ullengesenges a Charlotte.

X DUB

A Charlotte a di kiliei el di ulemdasu a mo rolel e lengesuir a Wilbur me lak lebo lomekoad er ngii. Me ng di klebikl er a blil el di omdasu me ng ko er a teletelir a rumes a deleb el di chelellakl e bellemakl a osengel. Ng klebikl er a bliil e kmo, "Ng kmal chetik el mla tmengii a ngerek er a Wilbur e lak kbo krellii a kdillii."



Ng di klemengetel a klechad er a Charlotte e ng mla metik er ngii el kmo a di kkilungii a renguk el telkib el meketeket e ng ultebechel el ngar er ngii a mo ungil el kudesuii.

A ta er a tutau e ng mekiis a Charlotte e mdesuii a ta

er a kmal beot e ungil el luldasu. Ng ulemdasu el kmo, "A Isekum me ng sebechek el mengeblad a rua iaes me a mekekeriei el charm me te obuked er a blik e ng ultebechel el sebechek el chobeldeterir a rechad. E le rechad a diak Isa el mellomes a rengrir el ua recharm. Tia ikid a mo rolek e ak usebelii a klengar er a Wilbur."

Ng omdasu aika el tekoi a Charlotte e a Wilbur e toechang.

Ng di tiloech a Wilbur e oker, "Ngera ke omdasu er ngii e Charlotte?"

A Charlotte a ulenger, "Ak ko er a omdasu el kmo a rechad a kmal ongebeldiil."

"Ngera a belkul a tekoi el ongebeldiil?" ng uleker a Wilbur.

"A ongebeldiil a tekoi el mengai er a cheleblad. Me a rechad el ongebeldiil tirke el chad el beot a domulak er tir." Ng ulenger a Charlotte.

"Ng ta er a klungiaol," ng millekoi a Wilbur e lmuut el mo bad el ongelngul er a bita er a sersel a bliil. E a Charlotte a di mereko el mekar e omes er a Wilbur e mechesa el omdasu a mo ungil el rolel e lebo lungil a rokui me lak lebo lokodall a Wilbur. Ng kmal mle bekikl e le ulengull er a skuul a di ua ngera el mo merek me a Kurismas a di olekeda me ng kmal kosekedela a taem e dirkak a kmal ultebechel el tekoi el lebla ludesuii.

Tia el tutau el lesa el mechiuaiu a Wilbur e a Avery a mle mengesuch el me milil er a bliil a cheremel a Homer. Me a ochedal er a Fern a di ulekiuellel. A Avery er a

lemei e nguleba a cheremel el dechedech me a Fern a belsiochel a bdelul er a chelilai. Te di tiloech er a bliil a Homer e remurt el mo bedul a uum.

A bechil a Homer a milsterir me ng kmo, "Alii! Ng kmal ungil a temiu el me mechir a keik el kulruul er ngii me mei e mngai a keliiu."

"Ka mosa ngika el cheremek el dechedech!" Ng millekoi a Avery e mo omechei er a cheremel el dechedech er a bebul a loruul a kall er ngii a bechil a Homer me bo lemededaes a chimal me lsebechel el nguu a kelel el keik.

Me a bechil a Homer a kmo, "Mo tebedii ngilecha er a iikr."

"Ng kmedu el mad e le Avery a di omet er ngii se el lorreked er ngii," ng millekoi a Fern.

"Lak mo mulak. Ngika a kot el ungil a rengul a kurutech er ngii. Ng kot el soal a dolaiu er a isngel," a Avery a dirk ullab a tekingel e a dechedech a suchesoki el tmuu er a olebeluul el ngar er ngii a sob er ngii.

"Avery, alii a kelem el keik a mla mo bereked er a bedengem," ng millekoi a Fern e meltii a mengedecheduch er a bechil a Homer. "Chedil er a Edith, ng sebechek el mo omes a cheremem el malk?"

"Ak ulengit er kemiu el teru me bo mtobed er a iikr! E diak bo mousekool a cheremek el malk," ng dilu a Edith.

"Momes er tilecha el bilem el di mla mo

bechesechusem," ng millekoi a Fern. "Mosa el di mocha keik el ta el chad."


A Avery a okor e omekedo er a cheremel, "Mei, mei, mei e dechedech!" Ng mlo kiukuii el me er bab me ng meledolk el omides a sob me a ralm el mo er a kekel a Avery el keik.

Ng omes a Fern e kmo, "Chesilech! Ke kmal delikik."

A Avery a kmo, "Me e bo domtar!"

Te remurt el teru el mo er a chesl a blil a charm.

Tia el blil a cheremel a Homer a mla er ngii a kmal ungil el btar er ngii. Tia el btar a di mle chimo el ekil el klebikl er a bita er a tuangel. A ulebengelel tia el ekil a mla er ngii a betok el delibuk er ngii me ng sebechir a rengalek el dengchokl me a lechub e te dechor er ngii e omtar. Tia el btar a kmal mle ungil el diak dousbech er a ngodech el chad el oldubech er kid. Kerdi ngmasch er ngii e omtar el mo tuobed e me tmuu er a medal a tuangel. Tia a dirrek el kmal mle kedidai el btar me se el lengasech a rengalek el mo er a bab e ng telkib el mekider a delcherir er rucheil er a lolecheshokl. Ng blechoel el klou a diu se el bolo mtar a rengalek e le te chambai er a omtar e mengiil er a kuk mo temir el mo omtar.



A redelrir a rengalek er tia el telkib el chutem a kmal mle chetirir tia el btar el mla er a blil a Homer. Te kmal mle bekikl el kmo ng diak lemeketeket e ng ultebechel el ruebet e metemall a ta er a ngalek. Me te di mle suebek a rengrir e ng di kmal dimlak a dita er a rengelekir el ruebet er tia el btar e le rengalek a meduch el orreked er tir e dirrek el bekikl el ruebet me te kerekikl a betok el omerolir.

A Avery a ultungii a cheremel el dechedech er a boket er ngii e ngmasech el mo er a bebul aika el chachisois el bokso. Ng millekoi er mo er a Fern el kmo, "Se el mlo merek el Sandei er a debe domtar e ak kileed e ak usiuekl aike el kboub."

Me a Fern a dilung, "Mo tebedii ngilecha el

dechedech e ng mo mengesa er kau."

E ngii okor a Avery e orekedii a btar e suchesokl. Ng omtar el tuobed e tmuu me a dechedech a di obengkel. A lluat el omtar el me soiseb e a Fern a milngedecheduch el mo er ngii el kmo, "Alii, a ngerem a di bekekerekard!"

"Me a ngerem me ng dirrek el bekekerekard!" ng millekoi a Avery er a lomtar el mo tuobed.

"Hai! Ng mla soiseb a leblebul a bokso er a chelsel a bilek me ak mla mo melebleb," ng millekoi a Fern.

"Motobed a bitem e mkort a leblebul a bokso er ngii," ng dilu a Avery.

"Ng mereko e chelecha e ng kuk temek el omtar me bemkerd," a Fern a millekoi er a Avery.

"A ta lungab a mla mo melebleb!" A Avery a milengitakl el omekako e mengeuid er a Fern melak loltengel er ngii er a btar.

Tia er a bo letemel a Fern el kuk mo omtar me bo lemetengel a Avery e ng mildeklii a btar el mo er a Fern el dilechor er a bebul a bokso. Me ng orekedii a btar e mutek a medal e le ng kmal mechelaol e suchesokl. Ng ko er a mlo telkib el chetelaol e a lebok a medal e ng ungil el omes er a eanged e le ng kirel a iikr e luueta el omtar el me bedul a chelsel a blai.

A Avery me a Fern a ulemtar el kmeed el ta el sikang me ng omtar a ta el telkib e kuk me metengel e ng kuk mo tang.

Se el lebo lemesaik el omtar e te kuk merael el mo omdabt a chosm el di merekang er a tkul a sers. Te mo me te menga me ng di mo oumellemau a ngerir el di merekmo lebo lekes a ngerir er a osechel a redechel a chosm e te kuk olengull e merael el mo bedul a lengar er ngii a charm. Te merael e a Avery a metik er a kekeriei el box el blil a kiande me ng nguu a cheremel el dechedech el sukur er a chelsel. Ngika el dechedech a ko er a di chelita a bedengel e le ng klemengetel a taem e loba a Avery e lomtar e omechem er ngii me ng kmal medei er a kleald. Ng mo Imuut er a Avery me a Fern me te kmal mesulang el merael e le te skareter er a btar me a rurt.

Te merael e a Avery a kmo, "Mei e derellii a blid er a chetebtel a kerrekar e ng soak el kiei er a bab e loba a cheremek el dechedech."

"Ngak a bai soak el mo oldingel er a Wilbur," ng dilu a Fern.

Te merael el mo oleong a kakine er a blil a charm el mo soiseb e merrerorael el mo bedul a blil a Wilbur. Me a Wilbur er a rrenges a ocherir e ng di milekiis me ng tengerengar.

A Avery a di mla er a cheroid e mesa a blil a bubuu. E a Isa el kmedang e ng mesa Charlotte el ngar er ngii.

" Eang, Eang! Ka mosa ngike el mera el klebokel el bubuu, " ng millekoi a Avery.

"Ke le bo morutech er ngii e molai er ngii e kau tia le kuk ngar er ngii a cheremem el dechedech," ng

ulechelechel a Fern.

"Ngike a mera el soak el bubuu mechelecha e ak mo koiuii e nguu me ng bubungek," ng millekoi a Avery e kursii a rechelel a kerrekar e kmo, "Ka msall a kiuii e knguu e lotungii er a chelsel tia el blil a cheremek el baks."

Ng lilangel a Fern e kmo, "Lak mua isei e Aver! Becherei a charm melechelellak!!"


A Avery a di diak lorrenge er a Fern e mocha melemiakl aika el sersel a blil a Wilbur. Ngmasech me ng ultebetab a chochil e mocha oldars er a kiuel el mo mengaiu er a bubuu e kmoll a ochil me ng mengai el me kesbedechakl er a ongolel a Wilbur el mitechii tia el ongall me ng obikel e me metilech el mungii a ngais me ng mo mengetelakl a mera el bediu e besngask el bau.

A Fern a uleldiu e a Avery a mekiis el tometii el medechor. Te dechor el kaiuengeng e mechesei a rengrir er tia el kmal diak lemekard el bau el bul se el lulebangl el ngisel a debar er a rechuodel. Me a Templeton el dirrek el milechiuaiu er a blil el eungel a ongolel a Wilbur a di chiliis el meretii er a chelsel a chutem el blil.

"Ak riedung! Ak morolung! Dorael! E tia a kmal diak lsebechek el meketeket el melungel er ngii el bau," ng millekoi a Avery.

A Fern a longela e orekedii a isngel e remurt el mo bedul a blirir me a Avery a di mirrekong el remurt el okiuellet el dirrek el di urekodel er a isngel. Te merael e a Charlotte a ta luluuteliil el kmal mlo klou e le ng kmal mlo ungil a rengul er a rieda a Avery. A klungiolel a

rengul el sobelang a rirellii me ng ko er a kmal mlo mededaes a rengul.



A tutau er a bo lekukuk e a rebek el charm el rua a sib me a debar me a rengelekir a di mle keldibel e oumondai er tia el kmal diak lemekard el bau. Me a Wilbur a mocha nguu er a uchul a chisel tia el bediu el ngais. Ng dilu el kmo, "A Avery e ngelekel a John a mle e mo soal el lomdecham er a Charlotte e ng di mlo diak el sebechel e le ng tia el bediu el ngisel a debar a ulebeu me ng ulechisii. Me ng chimo er a besbas el bediu el ngais a mlo uchul e ng mesebechakl a klengar er a Charlotte."

Me a debar a dechor el ko er a melisorech er ngii le ng ungil a rengul el ngii a mle uchul e ng suobel a Charlotte. Ng ko er a ousimang el metetekoi el kmo, "Ng kmal ungil a renguk er se el chimo er a ngisek el ulebangel me ng mlo er ngii a belkul."

A Templeton a dengchokl el kmal chetil e meknigit a rengul er tia el ngais el lesa el milengetmokl er ngii. E

ng di dirrek el ko er a uluusimang e le ng urelel a dirrek el mle uchul a klungiolel me a sebecheklel a Charlotte. Me ng kmo, "Ng kmal diak lemechoit a besbas. Ng ko er a besbas a domes e le kid el diak dodengei a mo usbechel er kid ng di se e lebo el temel e ng mera el mo remuul e tuabek a betok."

"Me kemiu el kmal melekoi el ua lekot el tekoi tiang." Ng dilu a ngelekel a sib. "Aike el mriruul a kuk kmal di ungil el kirel a Charlotte. E kid el rokui el ngar er tia el diak lemekard a bediu el bul a cheuodel e besngask el ngais?"

"Lak el sebek a rengum e ng diak lemeketeket e ke mo smau er ngii," aika tekingel a Templeton. Ng millekoi e oltemetamet a chesemel e merael el mo oldingel a blil a besbas.

A bocha el sueleb me be lolecha a kelel a Wilbur a Lurvy e ng milrael el mo kmeed er a blil a Wilbur e melengtungel er a bita el mo er a bita e mengemim a medal e meleu er a isngel e le ng kmal milengchechetelakl a bediu el bau me ng ko er a mo merecherached a rengul a Lurvy.

"Ng locha ngera a mekngit a bul?" a Lurvy a millechedech. E mocha kmedii a baket el ngar er ngii a kelel a Wilbur e mo nguu tia el kerrekar el luleba a Avery el mocha olsesei er a ongolel a Wilbur. Ng milluis er ngii e kmo, "Ng beab el lulterekokl! Ng NGHOBEE! Ng mera el di remuul a lukel er ker me ker me a uchul me ng kmal chetik. Ng chotakl a besbas me a betok el mekngit el ngera me a ngera el me me ng uchul a mekngit el bau el mei."

A Lurvey a dilisii a ongolel a Wilbur el me kmeed e

duibek a bebil er a chutem el mo melakl er tia el bleu el ngais me a klokkel a Templeton el betok el besbas. Ng mocha merek e mo kiderii a baket el mo olechubel a kelel a Wilbur. A selngerengerel a Wilbur e ngilasech me ng dechor er a ongoel me a bo lolechubel a kelel a Lurvy e ng di ngilai e lochubel er a kmeed er a bdelul me ng di mlo bechesechusem a dingal me a isngel a Wilbur. Ng uleldiu a Wilbur e mocha tmaut el melim e mengang me ng mekekesbakl a ngerel. Ng menga e kmal menga el mocha semeriar e le ng kmal ungil el kall e luldimukl er a rua a milk me a bangkil, me a bangkeik me a donats me a ulongolel a ngikel me a betok el bedengel a ongraol me a odoim me a kliou. Ng menga e lleko le di el ta el losab a leka a kelel el rokui.

A Wilbur a ulemengur el mera el menga el babii e le ng di soal el mechachongii a ongoel e lotka el kmo ng kirel el meche a sesei er a rameng me ng kelel a Templeton. E dirrek el omdasu el kmo a kumechei a kelel a Templeton e le ng ngii a ulsebelii a Charlotte me a Charlotte a dirrek el mo olsobel er ngak me ng locha bai ungil ak bechei a bebetok. Me ng milechei a betok el rameng el mo kelel a Templeton.

Chelecha el bla el medakl tia el bediu el ngais e ng mocha ungil a eolt. Mo lmuut er tia el rokir el bliil a charm me ng kmal ungia a bul. A rebek el charm a ko er a kmal ungia a rengrir me te ko er a di mle chellaod e ng kebesenge a sils. A lemerema a ilkolck me lebelisiseb a mekelekolt el cheluut er a tuangel e a Charlotte a merk a ochil er a bliil e mengeluut e omesoil er a osisiu el taem. Me ng omengur e omdasu a bo loruul e leko di loureor kung.

Ng dirk kekesus e a Charlotte a mocha omuchel er a urerel. Ng mlo er a kmal di belngel a bliil e mocha melubet a bebil er a chuklel. Ng mekekakil el oureor e a

lomes e a recharm a mla mo olengellokl me ng dimlak a ta er tir el mesa tia el loruul er ngii a Charlotte. E a Wilbur a mla metilech e ongelngul er a dukllel. Me a rengelekel a debar a mengchechitakl a rengrir el mechiuaiu er a telia el uruukel er tia el blai.

A Charlotte a ngilubet a rokui el chuklel a blil e liluut el mocha mengaus er a beches el lomdasu er ngii e ng mo sebechel el ousbech er ngii el kirel a sebecheklel a Wilbur. Ng dirk oureor e ngii a dum a Templeton el milengesuch er ngii el mlo oldingel a betok el blil a besbas.

XI MEANG EL DILUBECH


A bo lekukuk e ng kmal mle mekelekolt a beluu me ng klou a chetechat er a sers. A dellomel a di duib a llel me a nguches a kmal klou. Me a domes a dellomel e ng mengchecheldoech a llel el ko er a becheleleu er a kelekolt me a nguches.

Se el leua isei a kelelkolt er a beluu me di bo ledib a klalo me a dellomel e ng rullii a blil a Charlotte me ng kmal menga el mo ungil. Tia el tutau e a blil a Charlotte a ko er a mle dekimes me aika el ralm el mla er ngii a ko er a bereberiid el ua lemengeldoech el mekekeriei el tama el bereked er a uuked me ng rullii tia el blil a Charlotte me ng ua res el metetoech e kmal belsiochel. A Lurvy el dimlak lomes a blil a bubuu er a ngar er a mong me a dimlak lomdasu el kmo ng klebokel a tilab a medal er tia el blil a Charlotte er a belolecha a kelel a Wilbur. E le tia el blil a bubuu a Iirelli el kmal mlo klou me ng mereched el tuab a osenged er ngii a debo er a blil a babii. A Lurvy er a ltab a medal er tia el blil a bubuu e ngiluu a baket el mla er ngii a kelel a Wilbur el kmedii e luueta el kmal mocha omngamk er tia el blil a Charlotte. E a lomes er a belngel e ng ngellechukl a tekoi er ngii el kmo: A REBABII!

A Lurvy er a lechuiu aika el tekoi e ng kmal mlo olengoech a bedengl er a chesil a rengul me a dektel.

Me ng liluut el nguabek a medal e liluut el kmal mo ungil el omes er tia el blil a Charlotte.

"E a ngak ak mera el lomes ak ues?" Ng milengelulau a Lurvy el di ngii el mengedecheduch er a rengul. Ng chilitii el mo outubuach e rullii a kerus e milluluuch. Ng mekiis e obeso kekel a Wilbur el diak lochubel e merael el mo er a blirir el mo omekedo er a Homer.



"Homer, mei me debo er a blil a babii e ngar er ngii a soak chobo mesang," ng dilu a Lurvy.

"Ngera a telemall?" ng uleker a Homer. "Ng smecher a babii?"

"Ng diak. Ng diak lsecher," ng millekoi a Lurvy. "Mei, me debo me lekau a omes."

Te merael el diak lechadecheduch e di orreched el mocha er a blil a Wilbur. Me a Lurvy a tutkii a blil a bubuu e kmo, "Ka momes el kmo ke mes a ua kues?"

A Homer a ulemes e mes a llechukl me ng milenguiu "A REBABII!" Ng chilsngekl el omes er a Lurvy e te kaiuengeng e omretela er a dektir me a chesil a rengrir. A Charlotte a mechechiuaiu e le ng medal er a urelel el kmal mlo chosoi e omes er a Lurvy me a Homer e ocherechur. Me a Wilbur a mla mo er a eungel a Charlotte me ng temat el dechor.

A Lurvy me a Homer a katekoi el kirel tia el llechukl el tekoi, 'A REBABII!,' e lmuut el mo kaiuengeng. Te chisngekl e omes er a Wilbur el kmal mlo kemanget e kuk omes er a Charlotte.

"Chomomdasu e ng diak lebubuu..." ng millekoi a Homer el dimlak lrekir a tekingel e omteuitech er a bdelul le ng kmal mechas a rengul. Ng milechib el merael el mo er a blil me ng mangedecheduch er a bechil. "Edith, ngar er ngii a mla dubech el beches el tekoi," ng millekoi a Homer e kmal mle kekerirei a ngerel e merael el mo er a klou el blai me a Edith a di ulekiu a ullel.

"Edith, ngar er ngii a meang el chais el soak el ouchais er kau," ng millekoi a Homer, "ng ungil a obom dengchokl."

Me a bechil a di chilitii el mo dengchokl el mad el bekikl e suebek a rengul e medakt e di bellemakl a osengel er a Homer. Ng mengiil el leko le di lemereched el ouchais a chais.

"Edith, a cheremed el babii a locha diak ledi le ua

bek el babii. Ng ongasireng e ngodech er a rebek el babii," a Homer a milengedecheduch el mekekakil e omedebades aika el tekingel.

A Edith a kmal mlo meklou a medal e mechesei a rengul er a bechil me ng dilu, "A rrach er a Homer, kau ke mekeskelang? Ngera tia el omosaod er ngii?"

"Ngara a kmal ngodech er a babii me ke kuk kmal mla osebek a rengud?" aika tekingel a Edith er a lebo a lodengei el kmo ng di omesodel a babii el diak a ngerang el telemall.

"Ng dirkak a kmal ngara el bla bo dodengei me ng diak Isebeched el kmo ngerang," aika lulekoi a Homer. "E ng di ngar er ngii a ongasireng el olangch el mla mocholt. Tia e Edith a mera el ongasireng el dubecha er tia el sers. Ng blil a bubuu el kmal klou el blerk er a tuangel er a blil a charm el kmal di ngar er a bebul a blil a babii. E tia a kmal olechau a mad e le ng kmal mle klou a kelekolt me ng ouberberingel er a nguches el remuul a chuklel tia el blil a bubuu me ng kmal bleketakl. E se el kmal belngel tia el blil a bubuu a llechukl a tekoi el kmo, 'A REBABII!' Aika a kmal bleketakl e le ng cheleuikl er a bebul tia el blil a bubuu. Me tia a mera el ongasireng e le Lurvy er a bo lomeka er a babii e ng mlo mechas a rengul er a losang me ng mle omekedo me aki mong. Edith, me osengek er se el ongasireng el tekoi a rullak me ak mo oumera el kmo a cheremed el babii a ileakl el ngodech er a redi babii."

"Ng ko er a diak kbo kuumerang," ng millekoi a Edith. "Ak omdasu a cheldechedechem e ng ko er a diak lebo lempera el tekoi. E le ak omdasu e a bubuu a diak a roel e lileakl el ngodech er a rebek el bubuu."

"Alii ng diak lebuuu a doleko er ngii e Edith," ng dilu a Homer. "Ng babii a dosaod er ngii e lileakl el ngodech er a rebek el babii e le ng ngelechukl er a kmal di belngel a blil a bubuu."

"Alta e ng merang e ng di ng bai soak el ngak a mo omes er a blil a bubuu," aika tekingel a Edith.

"A bubuu el bo momes er ngii a di ua a bek el bubuu el di ua bedengel a chab," ng millekoi a Homer.

Te milekiis el terung e merael el mo metengel el mo er a blil a Wilbur. "Ka mosa e Edith? Ng di ua bek el bubuu."

A Wilbur a ngar er a blil el kmal dechor ku a iklel er a klungiolel a rengul er a ildisir a rechad el di me omes er ngii. A Lurvy tia ikid er a lekie er a blil a babii el omes aika llechukl e te merema a rua Edith me a Homer. Te dechor el tedei el menguiu a llechukl e omngamk e chuieuii a Wilbur el kmeed el ta el sikang.

A Charlotte a kmal ungia a rengul er a chelebeldil me a urelel el mera el oureor. Me ng dengchokl el ka longitektik e orrenge er a rechad a lechadcheduch. A lsebek a kekerie el charm el mo bereked er aika el llechukl e ng mekekakil el metengel el orekedii e nguu el oridii.

A lemekelda a beluu me lemedita tia el blil a bubuu e ng mocha diak lsal bleketakl aika el llechukl me a Edith me a Homer me a Lurvy a merola el mocha remei. Uchei er a lorael e a Homer a liluut el kmal mlo ungil el chuieuii a babii e milrolang.

"Ko medengei ng diak, el mo ngika el cheremed el babii a di bla kdangch a ongelngelel el kmal mle mekoar e meklou el ko er a kmal mesisiich? Ng kmal lolecholt a klungiolel a babii. Ke mla mesa a ongelngelel e Lurvy?" ng uleker a Homer.

"Chochoi. Ng kmal el merang," ng ulenger a Lurvy. "Ak meketeket el omtab a ongelngelel me a klungel ngii el babii el kmo ng mera el lileakl er a rebek el babii."

"Ng kemanget e meaiu el chedidiich el babii," ng dilu a Homer.

"Chochoi. Ng kmal merang," ng ulengesenges a Lurvy. "Ng chedidiich el di soal el ruebet a chedib a loraer er ngii me ng olechotel a tokubets el babii."

A Homer a di mlo remei e oidii. Ng milechei a bilel er a ureor e ngii a locha kmal ungil el bilel leblechoel el oubail el mo er a ikelesia e merael el mo er a bliil a Bastor. Ng mlo me ng mengedecheduch er a Bastor e ouchais a chisel tia el ongasireng el mla dubech er a bliil a cheremel.

"Chelecha e a remedengei a di kau me ngak me a bechik me a Lurvy el oureor er a sersek," aika tekingel a Homer.

"Ke mo remei e diak mouchais er a rengodech el chad," ng dilu a Bastor. "Ng dirkak desa el mo medengeli me kede mecherei me ng chelellakl e ak mo mesuub er ngii el telkib e a Sandei e ak kmo mesaod er ngii er a ikelesia. Ak umera el kmo a cheremem el babii a ngodech el ileakl er a rebek el babii me a kbo kungedecheduch er a iklesia er a Sandei e ak mo ouchais el kmo, 'A ongasireng el charm a mla dubech

er a beluad.' Homer, ngika el cheremem el babii ngar er ngii a ngklel?"

"Chochoi," ng ulenger a Homer. "A ngelekel a obekuk el Fern a milengeklii el Wilbur. Ng ngii a ulemekeroul er a Wilbur el ua lempera el tolechoi. Me ng uleltut er ngii e milngetmokl er ngii el ta el buil er a uchei er ak nguu."

A Homer er a bo lemerek el mengedecheduch er a Bastor e te mlo kaieraked el chim e kasmesumech e ng merael a Homer el mo remei.

Ng diak a tekoi el obart. Me a uchei er a Sandei el ble lekirel a Bastor el mo ouchais er tia el chais e a rebetok el chad a mla remenges a chisel a Wilbur el kmo ngodech er a rebek el babii. Me te betok el chad er a kmeed me a cheroid el beluu a di mle omes er tia el ongasireng el tekoi. Me a mekesokes er a blil a Homer a di mlo meseked er a mali el meklou el mo lmuut er a mekekeriei. Me a omerael el mei er tia el blai a diak lemeloched er a tutau el mo kebesengei. Me se el lemei a rechad e te di chemuii aika el llechukl e mo tmaut el mengichuii er a Wilbur e katekoi el kmo, "Ng meral dirkak deues a babii el ua ngikang."



Tia er a Isal el kmal klunga a bisolel a Wilbur me a delal me a demal a Fern leblo losang e a Fern a ouchisa er a taem el leblo loilil ngii me a Avery er a bliil a Wilbur e a Avery lenguu a kerrekar el leko ng mo mengaiu er a bliil a bubuu. Me tia er a rrenges a delal a Fern e ng kmal mlo kesib a rengul er a Avery me ng kulebsengii el diak lomesoil e mo bad.

A Isal el klunga a osengelel a Wilbur e a Homer a mlo diak lsebechel el remuul a urelel er a sers e le ng kmal mlo mechesang el mendedecheduch er a rechad el mei me a remo el me omes er a Wilbur. Ng dirrek el di kea temel el oliuid er ngii el mo er a mechut el bail er a ureor le rechad a diak lemedebes el me oldingel e omes er a Wilbur. Me a Lurvy a dirrek el di kea loldingel a urelel e le ng di mechesang el melamk a chesemel e mengetmokl er ngii me lungil a medal me a teletelel se el lomeka er a Wilbur er a mederir a rebetok el chad. Me a Edith a diak a ngodech el loruul ng di meruul a

ungil el kall el mo kelel a Wilbur.

A Homer a dilu er a Lurvy el kmo ke mo dochelir a okelel a Wilbur el ngar er a edei el mo eua er a ta el sils. A chelsengrir tirka el chad er a Wilbur a riruul a betok el tekoi er a sers me ng di mlo diak lemeruul. A rodech a di mlo mark e dimlak lemengai el mo meruul el mo jam me a sbuul el delemerab el blil a mais a di mlo diak lemesib.

Tia er a bocha el Sandei e a ikelesia a kmal mlo meseked. A Bastor a milsaod el kmo, "Aika el llechukl er ngar er a blil a bubuu a olecholt er kid a rechad el kmo kede kmal kired el di mengetmokl el kirel a dubech el ongasireng el tekoi."

A Fern a kmal dileu a rengul er a seked me a ungil tekoi el mla dubech me ng mo uchul a osebelel a Wilbur. Ng dirrek el kmal mlo ungil a rengul el mesa a chelebeldil a Charlotte el kmal ungil el oureor me ng kmal klou a belkul el kirel a Wilbur. Ng di a Fern a dimlak Isa el soal tia el kmal klou el seked le se el lemei loldingel e ng diak lesebechel el milil el oldingel lobengterir a recharm el ua ngii er a ngar er a mong el taem se el di letir el tang.

XII

CHELDECHEDUCH

A mekesai el klebesei er a uriul er tia el kot longasireng el urelel a Charlotte e ng mlo er ngii a ongdibel er a recharm. A Charlotte a ko er a ulungerachel me ng ulemekedong er a rebek el charm el me keldibel. A Charlotte a ulemuchel er a ongdibel el kmo, "Ak mo omekedong a ngakl. Wilbur?"

"Ngak e tiang!" ng ulenger a babii.

"Debar?"

"Ngak, ngak, ngak e tiang!" ng ulenger a debar.

"Ngera me chomonger e ng ua chomtedei el debar. Ng diak lsebechem el di ta el monger e lak momelekl a tekingem?" ng milengchecheremrum a Charlotte.

"Tia a kuk di teletelek el diak lsebecek el ngodechii," ng ulenger a debar.

"Dechuu el debar?" ng ulemekedo a Charlotte.

"Ngak, ngak, ngak e tiang!" ng ulenger a dechuu el debar.

Me a Charlotte a ongengii e lmuut el melemolem er a okedongel, "Rengelekel a debar?"

"Bi-bi-bi! bi-bi-bi! bi-bi-bi! bi-bi-bi-! bi-bi-bi-! bi-bi-bi! bi-bi-bi!" te ulenger a rengelekel a debar.

"Tia el meeting er kid a kmal el ngedecha a teletelel. A lengelakl a rechad e a rengrir te tedei a resechal el debar me a tedei a redetchuu el debar me a relluich me a ta a rengelekel a debar," ng millekoi a Charlotte e kmo, "Sib?"

"Me-aa-aa!" te ulenger a resib el kmal el ta a rengrir.

"Rengelekel a sib?"

"Me-aa-aa!" te dirrek e lulenger el kmal mle ta a ngerir.

"Templeton?"

Ng dimlak a onger.

"Kede kmal di ngar er tia el rokui e di ta el beab a dibus," ng millekoi a Charlotte. "Ak umdasu e ng sebedhed el omuchel er a ongdibel e mecheriei a Templeton. Kom locha a rokui el medengei a urelek er a chelsel aika el sesei el mla me mo el klebesei. Aike el kulluches el tekoi el lodengesel a Wilbur a kmal mla mengai. A Homer me a rebetok el chad a kmal mla mo oumera el kmo a Wilbur a ngodech el tokubets el babii me ng di kea bo lomokoad er ngii el mo odoim. Me ng kmal dmeu a renguk el kmo a urrelek el mengeblad er a

rechad a sebecchel el mo osebelii a klengar er a Wilbur."

A rokui el charm a kmal mlo dmeu a rengrir er a cheldechedechal a Charlotte me te uleldiu e omrotech el kmal mlo klou.

A Charlotte a dulang, "Kom kmal mesaul. E ngak a ulemekedo er tia el ongdbel e le ng soak el melai a uldesuii. Ak ousbech a beches el uldasu el mo omtechei er a chuklek. Ak umdasu e a rechad a locha mla tmurk a rengrir el menguii er a "REBABII". Me a lsekum me ngar er ngii a ungil el mudesuii el tekoi e ng kmal soak el nguu me kbo kutechir a chuklek. Ngar er ngii a ko er a ungil mo tekoi el mudesuii?"

"E a dedul el kmo, 'melaok el babii?'" ng millekoi a chimo er a ngelekel a sib.

"Tilecha a kmal mekngit, "ng mle mereched a Charlotte el onger . . . e mocha mesaod el kmo, "ng rullii a Wilbur el ua lungil el odoim."

"E a dedul el kmo, ng 'Kot, kot, kot?'" nguleker a debar.

"Mkedebengii el di mo chimo el 'Kot' e tia ia ungiang," ng ulenger a Charlotte, "Ak umdasu e a 'Kot' a mo chosir a rengul a Homer."


"E ng di cholebo e ngak a diak 'kkot'", ng millekoi a Wilbur.

"Wilbur, tilecha a diak a bolengedechii er tia el tekoi e le rechad a blechoel el di oumera a llechukl el lechuii," ng millekoi a Charlotte e oker, "ngar er ngii a

meduch el sber e luchesii a tekoi el 'Kot'?"

"Ak umdasu e ng K-K-K me a O-O-O me a T-T-T," aika tekingel a debar.

"Chomomdasu er ngak e ng locha bekord el dart a ochik me a chimak? Ailecha el lildisel e 'K' me a 'O' me a 'T' a di kired el olab a chimal me a ochil a chelid er a eanged el mengaus," ng millekoi a Charlotte.



"Ak kmal mlo mekngit, mekngit, mekngit," ng mle chaamar a debar.

Ng milekiis a kot el klou er a resib e mocha mengedecheduch, "Ak oumera el kmo ng kirel el mo utichioll e meluches a beches el tekoi el kirel a Wilbur a Isekum me ng soad el olsobel er ngii. Me a Isekum me a Charlotte a ousbech a llechukl el tekoi el lebo lomekesiu e meluches e ak umdasu e ng sebechel el ng

mai a ngeso er a secholid er a Templeton. E le Templeton a omais a blil a besbas me ng sebechel el chotakl a bebil er a llel a babier e ngmai el mei me ng ousbech a Charlotte el omekesiu e meluches."

"Tia a kmal ungil el uldasu e ng di diak ksa el medengei el kmo ng mo sebechel a Templeton el ngosukid me a lechub e ng diak e le ng blechoel el di mechesa el osiik aike el mo uchul a klungiolel e diak Isoal el lolengeseu er a rengodech el charm," aika a tekingel a Charlotte.

"Ak umdasu e ng sebechek el chudechedechar me ng mo lengeseu er kid," ng dilu a klou el sib. "Ak kmo ochotii a uchul e ng chad el mesisiich. Alii, ngika kid el meremang. Kom di Imuk el rokui e mechikak me ak mengedecheduch er ngii!"

Ng me soiseb a Templeton el di ua teletelel er a bek el sils el merael el ko er a ombebereked er ngii er a tkul a kboub.

"Ngera a chised me kom kldibel?" nguleker a Templeton e le ng kmal mle mechas a rengul er a klou el seked er a recharm.

"Aki mesaod er a kmal klou a belkul el tekoi," ng ulenger a klou el sib.

"Me Imereko e mkedebengii! A rua ongdibel a kmal seselk a renguk er ngii el tekoi," aika lulekoi a Templeton e mocha melidab er a ekil el klebikel er bita er a kboub.

"Templeton, omluut el mo er a blil a besbas e

mcheteklii a ta er a lechukl el llel a babier me bo lsebechel a Charlotte e el ousbech er ngii el meluches er a chuklel el mo olsobel er a klengar er a Wilbur," ng millekoi a klou el sib.

"Bo becheriei a Wilbur me lemad. Ngera a ultutelel er ngak?" ngulenger a Templeton.

"Tilecha el delchercherel a ngerem a chobo mo ouuchel er a rengum er ngii," ng milengedecheduch a klou el sib. "Ke mo medengeli a ultutelel a Wilbur se el lebo lemekelkolt a beluu e ngii le bla lemad. Ng mo diak a chad el olab a mekekeald el ulengall el me melecha er a ongolel. E kau a kmal ungil el medengei el kmo a uchul me ke mesisiich e kedelebuu kau el ultuir a derengel a Wilbur. Me a kelel a Wilbur a kelem me kemiu a kmal kausisbech. Me a lsekum me a Wilbur a lokodir e kulterekokl el mo mesengaked e le ng mo diak a kelem. Me a chesel a mekesai el klebesei el diak monga e kulterekokl el mo tungd er a klengaked me ng mo sebeched el di omes el tmoech er kau el mo er a bitang."

A Templeton a di mlo olengeng e mocha omritel a chesemel.

"Ng locha mera aika el molekoi. E ngak a mo er a blii a besbas er a klukuk me a lsekum me ak metik er a chimo er a babier e ak nguu," aika tekingel a Tempelton el lulekoi el diobereod a ngerel e le ng diak Isa el Isoal a loldurech er ngii.

"Kom kmal mesaul. E a ongdibel er kid a di meritiang e debo dekepii. E ngak a kmal betok ak bo kuruul. Ak dirk mo melubet er a blik er me er a eou e mo mengaus er a beches e meluches er a 'KOT,' aika


cheldechedechal a Charlotte.

A Wilbur a kmal mlo bekerekard er a rrengel e kmo, "Charlotte, e ng di ngak a diak 'KOT.' Ak di ua bek el babii."

"Ak umes er kau e ke kmal el 'KOT' e diak a ngodech el babii el kuk mo kot er kau," ng ulenger a Charlotte el kmal ungil el medemedemek a ngerel. "Me a Imuut ku, kau a kmal sechelik e ak umdasu e ke kmal medengei a reng me ng menga el rullau el mo 'kot'. Me lak moutekangel e ke 'kot' e bai mereko e bo mechiuaiu e molengull."

XIII BLECHELEL A UNGIL EL UREOR

A Charlotte e mle mekar el mo metuda klebesei el omtechei a chelluklel a blil. Ng ousbech a kleai el ochil me a ngerel el oureor me ng sebecchel el mereched el mo merek. Tia a blechoel el urelel me ng mekekeam e mereched a loruul er ngii. A lengubet a sekdel a chelsel a blil e lebechei a orekedel e ng ua tia kid a teletelel a le klebikl.



A bliil a bubuu a blechoel el eru el bedengel a rekodellel a longaus. A chelechedal a lousbech a meklou e medidirt el rekodellel el meruul er ngii. A kuk bolousbech el mengaus el meliuekl er tia el chelechedal a mechetngaid e dekdekimes e muduid el rekodoll. Tia el muduid el rekodoll a lousbech er ngii el lomuked a mekekerei el charm el kelir. A Charlotte a mle soal el di ousbech er a di chimo el bedengel a rekodoll . . . se el klou el medirt.

A Charlotte a ulemdasu el kmo, "Ak chusii a tekoi el kmo 'KOT' e loba a omuid e ng muiid a charm me ng tomellii a osengir a rechad el omes er a llechukl."

Ng omechela a Charlotte me ng kmo, "A kot el cheuikl a 'K'."

Me ng ngosecha el mo er a bab e mengaus el melemalt el mo er a eou. E a lebe lmetengel e lomes e ng kmal chetngaid tia el chuklel me ng meringel er a rechad a tuab a osengir a rechad el omes er ngii. Me ng luueta el mocha ngmasech e luueta el mocha mengisoiis er a chuklel el me er eou. A bo lemerek e lomes er ngii e ng ungil e le ng kmal bleketakl me ng omdesuang, "Ng kirek el choisoiis aika el rokui el cheuikl el llechukl me ng mo mechechichuii."

A Charlotte a milengaus el mo er a bab e me er a eou el mengisoiis er a chuklel. Tia el ureor a kmal ucheuidel me a Charlotte a di uleba e ng mocha metuda klebesei. Me ng mesulula e dirrek el kmal mesula a bedengel me ng mocha di ngii el mengedecheduch er ngii el ko er a olekar er ngii e meruul er ngii me di leko er a meses. Chomko ng mla er ngii a chad el mla er a bita er tia el bliil a charm e ng mle sebechel remenges aika kid el tekingel a Charlotte:

"A dongaus er a 'O' e kede mo er a bab e mengaus el meliuekl el metengel e meliuekl el lmuut el ngmasch. Se kid ng meaiu a chuklel e ungil el chaibibeob. Ng kmal kot el ureor. Elechang e ng 'T'. Me ak ngmasech e mengaus el melemalt el me metengel el ta e lmuut el ngmasech e oisisii el me metengel e ngelrekui el chelechedal a 'T'. Elechang e ng bebul a bo kungaus er ngii e lomuchel er a katur e mengaus el bedul a kadikm. Ng kot se el kot el cheleuikl me chelecha e ak oisisii. Mo kokokau e ng ullebongel er a chuklem me ng mo el mo chebirukel . . . ng kot . . . tia kid e mereko e mdibkur. Ke kmal kladikm!"


Me aika el cheldechedechal a Charlotte a ngilsuir me ng rirekir a chuklel el kmal mle meringel el ureor. A bocha lemerek e ng kmal songerengerang me ng mocha nguu a kekeriei el charm el lekildmeklii el mei me ng kolii e mocha bad.

A bocha letutau e a Wilbur a mekiis me ng dechor er a eungel tia el blii a Charlotte el blekebek a medal e melai er a ungil didichel a sils e outeliil a ungil el mekelekolt el cheluut. Ng dechor el kmal ungil a rengul me ng rullii tia el llelechukl el tekoi 'KOT' el ko er a kmal mo bleketakl e ungil me a lemei a Lurvey el me melecha a kelel e ng mesa a llechukl me ng kmo, "Ng kuk ta er a ongasireng el tekoi."

A Lurvey a rirurt el mo omekedo er a Homer. Me a Homer a oleker er a bechil er a Edith. Me a Edith a oudengua el mo er a Arable el chad er a blii a Fern. Me a rua Arable a ngmasech er a mlirir e merema el me omes er a Wilbur. Te mei me te kldibel e a lomes er a bubuu e menguiiu er tia el tekoi el 'KOT' e a Wilbur a dechor el melisorech er ngii e le ng kmal dmeu a rengul

er ngii el ko er a kmal mla mo kot el babii.

"Ng 'KOT.' Ngika el cheremed a mera el mla mo kot el babii," ng millekoi a Homer el ko er a kmal dmeu a rengul. "Edith, ak umdasu e ng ungil a obo moudengua el mo er a chad er a chais e mouchais er ngii. Ng ulterekokl el soal el mo meluches el kirel tia el ongasireng el tekoi. Ng ultebechel el soal el mo meluches er ngii er a simbung e dirrek el diak lokor el mo soal el nguu a siasing er a Wilbur el dechor er a eungel tia el llechukl el 'KOT'.



Tia el ongasireng el tekoi a mlo merael a chisel me a rebetok el chad a mle omes er a Wilbur. A rebetok er tirka el mlel el chad a osisiu el chad el mle omes er a Wilbur er se er a lekot el meluches se el di mla tekoi el kirel, "REBABI".

A mocha kebesengei er a di osisiu el sils e a Homer a mlo met a tul a kerebou. Ng omet a tul a kerebou e di omdasu er a klungiolel a cheremel el babii.

A Homer a ulemekedo er a Lurvey, "Lurvey, chelecha el mo er a medad e ng diak a chimo el dechil a kerebou el mo mechoit er a blil a Wilbur. Chelecha el le 'KOT' a cheremed e ng soak a lebo el bek el sils el momtechei a dukellel el chudel. Ke rirenges?"

"Chochoi." Ng ulenger a Lurvey.

"Ng dirrek el soak a chobo mrelii a blil a Wilbur el mo er a omerael. Ng soak loba el mo er a himbiokai er a lluich me a eua el kebesengil a ongeteruich el buil. E soak a omchesbereberii a blil el mo mellemau a bedengel e a llechukl er ngii a mo ua bedengel a kolt." A Homer a liluut el dmung.

"Ngera a mo llechukl er ngii?" ng uleker a Lurvey.

"Ke mo luchesii el kmo, 'CHEREMEL A HOMER EL MERAEL A CHISEL!'"

A Lurvey a ngiluu a mlai el mo melai a beches el chudel. Me ng di merael e kmo, "A doucharm a meklou a belkul el babii e ng kmal ungil e ng di belkul a kmo ng mo betok a ureor."

Ng mla er ngii a klou el ongebitel er a eungel a chimo el klou el iedel el ngar er a bita er a rael. Tia a longoit a bekel bedengel a besbas er ngii. A rua beached, butiliang, babier, mechut el bail me a betok el bedengel a di kea lousbech a rechad el klalo.

Tia a lodengalii a Templeton e kmal mle soal e le ng betok a ungil el omertel el er ngii. Ng dirrek el betok a beached er dirk ngar er ngii a chesechesemel a kall er ngii me ng sebechel el mengang.

A Templeton a dirk mla er ngii el ongebitel me ng ng omeseues e losiik a soal. Tia er a lluat el me remei e ng sildelii a ta er a llel a babier el ngar er ngii a llechukl er ngii.

A Templeton a ngiluu tia el babier el mochotii er a Charlotte e kmo, "tia ng ungil, ng diak?" A mle llechukl er tia el babier a kmo, 'MEKEREKOR'.

"Tilecha se el kmal mekngit." ng ulenger a Charlotte e kmo, "Tilecha se el lesa Homer e ng kmal mereched a uldesuel el mo omdasu a mangtekang me a cherredoched el lekel a babii el mo sngesongeb a dongang. E kid a diak Isoad el remuul a uldesuir el mo omdasu er a Wilbur el kmo ng ungil el kall. Ng soad el remuul a uldesuir el mo omdasu er a Wilbur el kmo ng ungil el charm. Me mei me mluut el outekangel el mo osiik er a lmuut el ta er a tekoi. Adang e Templeton?"



A Tempelton a mengisngull e mechib el Imuut el merael el mo er a ongebitel. A lluat el mei e ng oba a kekeriei el mamed el lengiluu er a cheri er a mechut el chelechedal a bail. Ng ulecholt er ngii e oker, "Tia ng ungil?"

A Charlotte a ngiluu e omes er ngii. E a longuiu er ngii e ng kmo 'TSIZIM' (olekimer, ng mekurs el mo kekeriei). "A rrach le Templeton, tia a diak Isoad e lousbech er ngii. Ng soad a Homer a bo lomdasu el kmo a Wilbur a kedelbuu el metikm a bedengel e diak lebechachau. Mei me kulengit er kau me mluut el mong me mosiik."

"A chomomdasu er ngak e ak ko er a bekord blil a odercheliu," ng milengeremrum a Templeton. "Ng diak Isoak e lousbech a rokui el temek el omais el mo er a ongebitel el mosiik a llechukl el tekoi."

"Ak ulengit me di mluut el di ta el bong?" ng ulengit

a Charlotte.

"Msall e kuuchais. Ngar er ngii a blil a kona sob el ngar er a tensio el ngar er ngii a llechukl me bai bo knguu a telkib er se el ngar er ngii a tekoi er ngii."

Ngilasech a Templeton el mo er a tensio e mo dibus. A lluut el mei e ng blengechel er a mellemau e becheleleu el bebul a blil a kona sob.

"Tia kid! Ka mosang, ng ungil ng diak?"

A Charlotte a ngoura e menguiu aike el llechukl el kmo, 'MOUSBECH E BOM KLEBOKEL'.

"Ngera belkul aika el tekoi el 'MOUSBECH E BOM KLEBOKEL?'" ng uleker a Charlotte e le ng dirkak el ta el lousbech a kona er a klengar er ngii.

"Ak mekera e mo medengei a belkul a llechukl el tekoi?" ng ulenger a Templeton. "Chelecha e ke oker a belkul aillecha el tekoi el kngilai el mei. E a deluut e ke kuk oldurech er ngak el mo osiik er a zibiki el mo sebechem el smiik a belkul aika el tekoi er a chelsel."

Te luueta el menguiu e omdasu e melechedech er a belkul. A Charlotte a liluut el menguiu aika el tekoi el mekekakil e dula el kmo, "Wilbur!"

A Wilbur el milechiuaiu a di milkerokl el me dechor.

"Ka mrurt el meliuekl!" ng millekoi a Charlotte. "Ng soak lomes er kau el meruul a bek el bedengel a tekoi e mesekau el kmo ke 'KLEBOKEL' ng diak."

A Wilbur a remurt el tmurk er a bita el mekesokes el
Imuut el remurt el mo er a bitang.

"Ka mluut el remurt el mei!" ng uleldurech er ngii a
Charlotte.

A Wilbur a milechesokl el mong. A bedengel a
melidiich se el lesbechii er ngii a didichel a sils.

Me a kemril a mla mechirocher el kmal klebokel.

"Ka msechesokl el mo er a bab!" ng liluut a
Charlotte e loldurech er ngii.

Me a Wilbur a riredেকে el mo merael er a bab.

"Mlemalt a chochim e mdeur a chelechedam me a
chome er a eou e a dingam le balsebechii er a chutem."



A Wilbur a orrenge e meruul a rokui el loleko i a Charlotte.

"Momaitarekub! Molitai e momelebult er kau!"

Ng ulemaitarekub e melitai el ombebelebult er ngii a Wilbur.

"Moubeteteluut el merael!"

A Wilbur a milrael el oubeteteluut.

"Ng ungiang e Wilbur. Mereko e bo bad e molengull e tia a kmal lungia el ureor el bla mrelii," ng dilu a Charlotte. "Tempelton, ak umdasu e tia el tekoi el kirel a kona a ungi. Ng diak ksa el medengei el kmo aika el dechal a Wilbur me a sesengel er a omelechekli ng

rullii me ng mo klebokel ng diak e ng di ak umdasu e te betok a remo semeriar er aika el omerellel."

"Ak umdasu e te ultebechel el mo sorir," ng millekoi a Wilbur el ko er a mesel e semeriar. "Ak ko er a kmal lomelechessiu er ngak el kmal 'KLEBOKEL.'"

"Eii?" ng uleker a Charlotte e omes er a Wilbur el ko er a mad el klikmechur e dmeu a rengul. "Kau a kmal ungil el babii me a klebekelem a di meleketek. Me chelecha el bla mocholt el lungil e ng kired el churrengellii."

A Wilbur a chilitii el mo mechiuaiu e a bo lebad e ng telkib el mo mekekad a bedengel e le aika el beches el chudel a dirk melebleb. Me ng osesei a chudel el mo er a bita e ngii a mo bad er a bebul a dechil a kerebou el soal e le ng medemedemek e mekekelkolt. Ng mechiuaiu e di ngii el mengedecheduch er a rengul el kmo . . . "Ng mera el betok a demechesa er ngii. Se er a le 'KOT' me lemei a rechad e ng kired di dechor e osus e olecholt er a kle 'KOT' er ngii er a rechad. Me a chelecha e ak kmal mesula er ngii e me oldingel a Fern me ng di kea el sebechek el milil e olecholt a sesengek." E ng di a Fern a mlei oldingel me ng di dengchokl er a kingall er a tkul a blil a Wilbur e omes er a recharm.

"Charlotte, ka mongedecheduch el chelid e kurrenges?" ng ulengit a Wilbur er a lemechiuaiu el dirkak leiit a medal.

A Charlotte a dirrek el kmal mle mesaul e mocha outekangel el oltirakl e melemolem a soal a Wilbur.

A Charlotte a mocha mengedecheduch el kmo, "A

ta er a klebesei e a ngelekel a ta er a delak el kmal klebokel el dil a rirellii a blil er a bebul a omoachel. Tia a mle ulak er a bita el omoachel el mo er a bita el ua kekeriei el did. E a ta er a klebesei e a chimo el kekeriei el ngikel a suchesokl el lobuked er ngii me ng kmal mlo mechas a rengul ngika el merrengek. Ngika el ngikel a uluuedikel el melubet er ngii e ng di merrengek a miltengel el morekedii el sokdii el mengellakl er ngii."

"Me ng mlo sebechel el orekedii?" ng uleker a Wilbur.

"Tia se el diak dobes er ngii el tekoi," ng millemolem er a cheldechedechal a Charlotte, "ngika el ngikel a mlouuked el di chimo el techebel a mle telecherakl. Me a blil a merrengek a di mle kurs el mo mibaib el di kileed e ng mo subechii er a ralm."

"Ngika ng mle tela el bongd el ngikel?" ng uleker a Wilbur.



"Ng diak kudengei el kmo ng mle tela el bongd," ng ulenger a Charlotte e Imuut el melemolem er a cheldechedechal. "Me a merrengék a metengel e ngmasech e mengchii a bdelul ngika el ngikel. E kuk metengel e omidokl a uuked el mo omuked er a kemril ngika el ngikel. Ng di tia el kemril a diak lebo lechelellakl me ng mocha kmeed er a chechedal e morekedii el mudii e rongedii el rokir."

"Me ng milekera er a rrengedii?" ng uleker a Wilbur.

"Ng dimlak lokerang," ng ulenger a Charlotte. "Ngika el ngikel a mlo diak a chiolel e lengebetii e le a merrengék a dimlak a kokil er a lorenged er ngii me ng di milrael ngika el ngikel el kmal mo mechitechut."

"Me ng milekerang?" ng uleker a a Wilbur.

"Ng dimlak lokerang," ng ulenger a Charlotte. "A merrengék a di milecherei me ng klebikl me se el lebo lungil ku el kall e ng mochu menga er ngii."

"Ka mluut el chudechedechar a Imuut el ta er a cheldecheduch?" ng ullengit a Wilbur.

Me a Charlotte a liluut el mengedecheduch er a cheldechedechal a chedal el mle chad er a melidiul.

"Ngera a melidiul? ng uleker a Wilbur.

"A chad er a melidiul a ngike el ousbech a huseng el suebek er a bab," ng ulenger a Charlotte. "Ngika el chudelek el mle chad er a melidiul a blechoel el mo dechor er a bdelul e otobed a betok el uid e rullii a huseng e suebek er a melidiul el mekekeald a etel."

"E a ng mera me a lechub e ke kuk melibech a chais e Charlotte?" ng uleker a Wilbur.

"Aika a mera el tekoi el kuuchais," ng ulnger a Charlotte, "ngak a kot el betok a rechedak el di merael a chisir e le te kmal meduch er a betok el tekoi. Me bai di lebo er tia e Wilbur e bai bo bad e ng kmal mla imis a temel a cheliuem."

"Mei me di kluut el olengit er kau e Charlotte me dilta el mchiteklii a chimo er a chelitaki," ng ulengit a Wilbur e mutek a medal el omechiuaiu er ngii.

Bo bad e merrengei

E lak omedakd e lak obekiki

E ng kebesengei me ngchelellaki a rokui

Me ng sebechem el olengull e diak a

Me mengesa er kau!

Uchei er a rrekir a cheselsel a Charlotte e a Wilbur a mla imiit a medal. A Fern el ullerrengeis er tia el chesols a di rirekir e mekiis el merola el mocha remei.

XIV TOKTANG EL DORIAN

Ng tutau er a Sabadong me a Fern a dechor er a uum el mesuld a belatong el lollib a delal. Te oureor e a delal a dilmuk e oureng el kmo, "ulekum me a Fern me ng diak lebo er a bliil a Homer el mo oldingel a charm e kuk bai mo er a iikl me ng milil ngii me a resechelil."

"Chedil, a Charlotte a mera el meduch el mengedecheduch el chelid," ng uluuchais a Fern er a losuld a kob.

"Ak ulengit er kau e rungalek me lak molibech a chais. E ng dirkak a rebubuu el mengedecheduch."

"A Charlotte a sebecel. Ng diak leklou a ngerel a longedecheduch e ng di ng sebecel."

"Ngera el cheldecheduch a lulengedecheduch er ngii?"

"Ng uluuchais er a merrengel el milekedii a ngikel er a bliil. Chomodasu e ng diak lungil el cheldecheduch?"

"Fern, omodasu e ng sebecel a chimo el ngikel el obuked er a bliil a bubuu? Tia a kmal chemolt el diak

Isebechel duubech el tekoi. Mei me kulengit er kau e rungalek me lak molibech a tekoi."

"Aika a kmal mera el tekoi," ng ulenger a Fern e kmo, "A Charlotte e chedil a diak lebulak. Ng uluuchais er a merrengel el rirellii a blil er a bebul a omoachel. E a ta er a klebesei e a kekeriei el ngikel a suchesokl el obuked er ngii. Ng uluedikel el melubet er ngii me tia el blil a bubuu a kmal mlo obereod me ng mo er a eou el soal subechii er a ralm. E a merrengel a Charlotte a mo orekedii el lochetii e mengchii a bdelul me ng di mlo mengerderid a kemril e"

"Fern, lemerkong. Mereko mdebesii a chisem me a klungel a chais el blam dibech," ng dilu a delal.

"Ngak a diak kulibech aika el chais. Aika a mera el tekoi," ng millekoi a Fern.

"Me ng ngera a mlo ulebongel er a cheldechedechal a ngikel me a bubuu?" ng uleker a delal el ko er a mla mo soal el medengellii a cherrengel el tia el cheldecheduch.

"A merrengel a Charlotte a mlo mesisiich. Ng milekodir a ngikel e mecherei me ng llechotel me se el bo el ungil el kall e ng mochu menga er ngii. E le rebubuu a di ua ikid a rechad e lomengur."

"Eii! Ng mera el tekoi el didediul el ousbech a kall."

"A Charlotte a dirrek el ngar er ngii a ta er ngii el mle chad er a melidiul. A leko sebechel el mo dechor er a bdelul e otobed a uudel el rullii a huseng e suebek el mo er a melidiul. Ng diak Isoam e chedei el mo ua

isei?"

"Ak umdasu e ng locha soak," ng dilu a delal e kmo, "Rungalek, ak umdasu e ng locha bai ungil a lak kobo moldingel a charm er a blil a Homer e bai kuk bo moilil el obengterir a resechelim. A dechad e ng diak Isa el ungil a di de blechoel el di kid el ta el ileakl."

"Di ngak el tang? Ke dilu el kmo ng di ngak el ta el ileakl?" ng uleker a Fern e kmo, "A blil a charm a mui er a resechelik. A dengar er ngii e kede mechelaod e le ng meseked e betok a ungil el cheldechoduch me a omilil er ngii."

A Fern a tilobed e mededechor el mo milil er a blil a Homer e oldingel er a recharm. A delal a melemed er a blilir e di omdasu er a ngelekel e kmal sobeka a rengul el kmo, "a rengalek e dirkak a kuk kmal me semeriar a charm el ua Fern. Ng locha bai ungil ak bo kusa a toktang e kulengit er ngii me lengesukak er a uldasu el kirel a Fern." Me ngmasch er a mlai e omekall el mo er a obis er a Dorian el toktang.

A Dorian a chesechesomel el toktang el kmal ungil a rengul e ungil el mo er a rechad. A lebo a delal a Fern e a Dorian a ochotii a ungil el kingall me ng mo dengchokl e te chadecheduch.

A delal a Fern a mocha mengedechoduch el kmo, "Ak mle el me mesaod er a ngelekek er a Fern. A Fern a kmal blechoel el di mo oldingel er a recharm er a blil a Homer. E se el lebo e ng mo dengchokl er a kekeriei el kingall er bita er a blil a babii e di kiei el di omes e orrenge a charm el mo milkolk."

A Dorian el toktang a mo ulsirs er a kingellel e mutek

a medal e orrenge e kmo, "Ng ko er a kmal ungil. Ng locha ungil el kellechakl a bliil a charm. Ngike el Homer a ngar er ngii a cheremel el sib ada ng diak?"

"Chochoi, ngar er ngii a cheremel el sib," ng ulenger a delal a Fern. "E ng di uchul a omerolel a Fern el mo er a bliil a charm a mo omes er a babii el Wilbur a ngklel el mle cheremam el lulemekeroul er ngii a Fern. E tia er a belenguu a Homer el mo er a bliil e ng mlo omuchel a Fern el mo omais el mo omes er ngii el me lmuut er a chelechang."

"Choo! Ak mla remenges a chisel a Wilbur. Te kmo ngileakl er a rebek el babii," ng milok a medal a toktang e melekoi.

"Ke mla remenges a chisel aike el mle llechukl er a bliil a bubuu?" ng uleker a delal a Fern.

"Chochoi," ng ulenger a Toktang.

"Me ke medengeli a uchul e ng ngar er ngii?"

"Ngar er ngii a ngerang?"

"Ke medengeli a uchul aike el llechukl er a bliil a bubuu?"

"Ng diak. Ng kmal diak kudengeli a uchul. A lebo e ng di chuklel a bliil a bubuu e ng diak kudengei el kmo ng mekera a longaus er ngii e mekera e mo medengei a llechukl el ngar er ngii. Se el kmal ongasireng e le ng diak a chad el medengeli a uchul e ng meruul a ua isei el tekoi."



"Ngera a kmal ongasireng er a llechukl el ngar er a blil a bubuu. A blil a bubuu a diak a ongasireng el kusa er ngii."

"Ke mla ta el mchusii a chimo el blil a bubuu?"

"Ng dirkak," ng ulenger a delal a Fern e merech er ngii er a kingelel e le ng diak lesa el soal tia el cheldech duch e kmo, "Ng di ngak a meduch el ousisiu e mengaus a bail a lemesodel."



"Ng merang! Ke meduch el mengaus e ousisiu e le ng ngar er ngii a chad el lulsisechakl er kau, adang, ng diak?"

"Chochoi . . . ng delak a ululsisechakl er ngak."

"Me ka mosa. A bubuu el kekeriei e meduch el mengaus er a blil e mocha mengaus a llechukl el dimlak a chad el olsisechakl er ngii, ng diak longasireng el tekoi?"

"Ng mera el tekoi e Toktang. Ng kmal dimlak kudesuii tia el tekoi el bla mdelii. Ng kmal dirk rrau a renguk er aike el llechukl el kmo ng milekera e mo llechukl er se el blil a bubuu. Ng kmal chetik a lak omesodel a tekoi el duubech e le ng mengesa er a bdeluk."

"Kede rokui el soad a lemesoad a tekoi me bo

dodengei. Me ngak a Toktang me ng kirek el medengei a betok e ng di diak kudengei e diak kbechei me longesa er a bteluk."

"A ngelekek a ouchais el kmo a recharm a mengedecheduch. Chomomdasu e Toktang e ng sebechir a recharm el mengedecheduch?"

"Ng dirkak krengeii a chimo el charm el mengedecheduch e ng di diak lebelkul a kmo te diak longedecheduch. Ng sebechir a recharm el mla mengedecheduch er ngak e ng di dimlak rengesterir e le ng dimlak kurrenges. A Isekum me a Fern a kmo a recharm er a blil a Homer a mengedecheduch e ng sebechel el mera el tekoi. E le rengalek a ungil el chelellakl e orrenge er a recharm me te sebechir el remenges a tekoi e kid a remeklou a di mechesa el di mengedecheduch me a dingad a mo diak Irrenge a kuk bebil er a tekoi. Chokmo kede mo lmuk e ng mo sebeched el kuk rongesterir a recharm."

"Me a leua isei ku e kele ng diak lekirek el bekikl er a Fern."

"Ng ko er a mechitechut?"

"Ng diak. Ng kmal mesisiich."

"Ng ungil el omengur?"

"Chochoi. Ng kmal ungil el omengur. Ng bekesengerenger me ng blechoel el omengur."

"Ng ungil mechiuaiu?"

"Chochoi."

"Me a da lak lesebek a rengum er ngii."

"Chomomdasu e ng di ngii el mo tmurk a rengul er a recharm e kuk mo omdasu a ngodech el tekoi?"

"Ng tela a rekil a Fern?"

"Ng eai."

"Choo! Ngika kuk dirk kekeriei me a uchul me ng di omes a charm. E a lora el mo klou e ng kuk mo er ngii a ngodech el soal er a klechad. Te ngar er ngii a remekekeriei el sechal el lodengelterir?"

"Ng medengellii a Henry Fussy."

"E ach, me tia a kmal diak a kngtil a lodengellii a Henry Fussy. Ng diak lemeketeket e ng mo betok a ungil el sorir el mo er ngii el teru me a Fern a di ngii el mo mechesa e mo diak lesa el mo duum er a blil a charm. A rengalek a merederodel a rengrir me te meruul a betok el kakerous el tekoi er a bek el rak. E ach, e a ngelekem er a Avery a ua ngerang?"

"A Avery a kmal mesisiich e iimis er a telekangel. A lak lechubel a cheluch e lolebsel a charm er a dellomel e ng torakl a blil a hats me ng obetuut. Ng mdechেম a bersoech me a dechedech el lotuu er a blai me ng di mo diak leblai a blimam. Me a rokui el klalo el rrutech a di metemall e ng di ngii a kmal mesisiich el diak a secherel."

"Sei a tekoi a desechal. Ng kmal el smiich a renguk er ngii."

A delal a Fern a ko er a kmal ungia a rengul me ng mereng a sulel a Toktang e melemesumech e riieda el mo remei.

XV CHEREMEL A CHULL



A chermel a chull a ngar er a delul a chudel e mengitakl. Te mengitakl a chelitakl er a temel a kleald el mochu merek el hu er ngii a di melemalt. “A temel a kleald a mereko e dibusei,” te mengitakl. Mereko e dibusei, mereko e dibusei. A temel a kleald a medei, medei.

E aika el cheremel a chull a ua bla lenguu me ng urrerir el omeklatk er kid el rokui el kmo a temel a kleald a diak lak a ulebengelel. Me a dirrek el kmal klebokel sils er a rak. Me a sils er a temel a kleald a mengedecha me a chermel a chull a mengitakl el ouchais er a chisel a klengiterreng me a beluu el kuk ngedechang.

A rebek el chad rirenges a cheliteklel a chermel a chull. A Avery me a Fern me a Arable a rirenges aika el chermel a chull er a lorael er a kmal di hokori el rael. Te mlo medengei el kmo ng di kmedu el soiseb a skuul. A ngelekel a debar a rirengesii me te mlo medenge el kmo ng di kea lluat el mo ngeasek. Charlotte a rirengesii me ng mlo medengei el kmo ng di kea a kmal temel el medechel. A bechil a Homer a oureor er a chelsel a uum e rirengesii a cheremel a chull me ng dirrek e mlo meknjit a rengul. A ta er a temel a kleald a riedang, ng meleko. A Lurvy a oureor el meketek er a kahol er a Wilbur, e dirrek el rirengesii tia el chelitakl me ng mlo medengei el kmo ng mla mo temel a omengiis el chemutii.

“A temel kleald a mereko e riedang,” ng liluat el mengitakl a cheremel a chull. “Ng tela el klebesei e ng mo er ngii a kori?” ng mengitakl a cheremel a chull. “Mechikung e temel a kleald, mechikung, mechikung.” A resib a rirengesii a cheremel a chull, me te kmal mlo bekikl me te tirrudii a telkib er a kakine e tuobed el mo er a sers el ngar er a bita el rael. A Ngiradebar a mesa tia el kliokl me ng chotekelii a butai er ngii el mo tuobed. Te tuobed el mo er a uchul a iedel me te menga aika el rodech el di mla mo mark e ruebet.

Tia se el taem el kmal klunga a osengelel a Wilbur. A kelel a di meketek me ngika se el kmal di omeka ku klebesei. A rechad a nguibes er a klungel el leko di lenguu me le cheremir. A ta er a klebesei e te mle

mekideb a bekord el dart el chad el me omes er a Wilbur e omes a beches el tekoi el dirk lilluches a Charlotte. Te kldibel el omes er a Wilbur e menguiu er a tekoi el 'KLEBOKEL' e a Wilbur a kmal meruul a medal e omekebek er ngii e lolecholt er a kldelebungel. Aika el ildisel a tekoi el bla lluches a Charlotte a kmal di mo ungil er a Wilbur e le ng meduch el rullii el mo 'A REBABI' e ng meruul er ngii e leko ng ileakl er a rebek el babii. Me a llechesii a 'KOT' e ng omeklemalt er ngii e meruul er ngii el kot. Me chelecha el dirk el lilechesii a 'KLEBOKEL' e ng dechor el meruul er a teletelel el kmal ungil e klebokel.

Ng dirrek el kmal meringel er a Wilbur a dechor el olecholt er a klebekelel. E ng di ngii a kmal meduch el orrenge aike el lolekoi er ngii a resechelil e meruul aike el lomdasu e ng mo sorir tirka el chad el omes er ngii. Me ng dechor e omtebutek a medal. E a lomes me bla el turk a rengrir a rechad e lomes er a medal e ng otuu a telil e suchesokl el mo er a bab e me metilech er a eou e ousakadats e mengiud er ngii me a rechad a mo kaiudiu e omrotech el kmal ungil a rengrir. "Ngera a uldesuiu er a "KLEBOKEL" el babii a leua isei?" Ng millekoi a Homer el kmal dileu a rengul.

A rebebil er a resechelil a Wilbur a mle telkib el suebek a rengrir el kmo ngika el Wilbur a lenga a betok el chetengakl e ke le lebai letemelii me lebo lekedidai a rengul. E ng di a Wilbur a kmal ngar er a eou a rengul e diak lenga chetengakl el rullii me bo lemead. Aika el chetengakl el kmal betok el kirel e ngii a kmal dirk kebekikl e suebek a rengul el kmo a Charlotte ke le bolak losebelak. Me a lebebil er a klebesei e bo lebad e ng omerous el leko a rechad a me melai er ngii e lolab e boes me a oles. Ng di se el lemellomes e ng kmal ungil a rengul e diak lemedakt me a ka lebekikl. A uldesuel er a resechelil el kmal ungil er ngii a rirelii me ng kmal

dmeu a rengul. Me a cheliteklel a cheremel a chull a rirellii me ng menga el mo semeriar e le a temel a himbiokai a kmedang me ng mo sebechel el mo e a lta lebo el lsebechel el mo kot me a Homer bo lak bo lomekoad er ngii.

A Charlotte a betok a lebekikl el kirel e ng di kmal di lmuk e diak longerodech. A ta er a tutau e a Wilbur a uleker er ngii el kirel a himbiokai.

"Charlotte, kede mo dmak el mo er a himbiokai a da ng diak?" Ng uleker a Wilbur.

"Ng diak ksa el medengei e le himbiokai a mo er ngii er se el temek el diak lsebechek el mo cheroid er a blik." ng ulenger a Charlotte.

"E ngerang?"

"E le ng betok a ruoll er tia me ng kirek el di kiei."

"A chedil e Charlotte. Ak ulengit me mobengkek el mo er a Himbiokai e ng kmal diak lsebechek el mo e kau lak kobong?"

"Ng diak. Ak umdasu e ng ungil a ke kiei e kues a kuk sebechek me kruul."

"Ngera ruoll er tiang?"

"Ng mla mo temek el omechell me ng kirek el remuul a tutuu el blil a ngisek."

"Ng kmal dimlak kudengei el kmo ke omechell a

ngais." Ng millekoi a Wilbur el kmal mechas a rengul.

"Eii. Ng diak modengei el kmo ak matik."

"Ngera a belkul a matik... ng belkul a kmo ng betok a ngisem?"

"Ng diak e kau. A matik a belkul a kmo, ng sebechek el meruul er a chimo er a ureor e meltak me ak rullii a chimo e mo er a chimo me a chimong.

Ng diak ledi lomengaus me a omuked el kall a sebechek el ureor. Ng dirrek el betok el bedengel a tekoi a sebechek el remuul."

"Ma da me me debo er a himbiokai e momechell er sei. E ak medengei el kmo ng kmal mo ungil a rokui el tekoi a dedak el mo el terung."

A Charlotte a mle ta el louedikel er a blil me ng meririau e ng kmo, "Ak umdasu e ng diak lsebechek el mo e Wilbur. Ng meringel er ngak a mesaod er kau er a rokel a cherellek me a omengetmeklel a ngisek me a rokui e le bebil er a tekoi a diak dolab a temel. A bo el temel a ngais el mei e ng mei a dengar er a belngel a himbiokai me a lak. E ng di kulengit er kau me lak momdasu er ngak e ke mo el mo mesengaked. E dekiei e domes er ngii me a bo el temel a omerael el sebechek e doraal me ng diak e kekiei."


"A chedil e Charlotte! Ng kmal ungil a renguk er kau el kmal medengei a reng se el dousbech er kau."

Ng ta el sils el di lemechiuaiu a Wilbur er a beches el dukllet e a Charlotte a olengull e omengur el menga er a

kelel el chebud. Ng omengur e omdasu el kmo a
ulengeseuik el mo er a Wilbur a kmeda er a ulelebongel.
Me ngak a kirek el toreklii a blik e remuul a beches el
ungil tutuu el mo blil a ngisek.

XVI OMERAEL EL MO ER A HIMBIOKAI

Tia el kesus er a uchei er a himbiokai e a rebek el chad a di mle kekesus e te mo bad. A Fern me a Avery a mlo bad er a eai el klok. Ng omerous a Avery el leko ng dengchokl er a ta er a kingall er a meliuekl el mesil e ng mo meliuekl e a le stob me lebo lechelellakl e ngar er se el kot er a bab. A kuk Fern a omerous el leko ng meklenga e mesula e lomtar.



A Lurvy a mlo bad er a eai el klok me a tedobech. Ng mo mechiuaiu e omerous el leko ng mlo er a klaidechedang e nguu a kot el nguked el blangket. A Homer me a bechil a mlo bad er a chetiu el klok. A Edith a mo bad e omerous er a kmal el klou el ais box.

Me a Homer a kuk omerous el leko a Wilbur a kmal mla mo klou el kuk keklou er a teblo el baffalo. Me a leko ng di ngilai a kot el nguked el kirel a rokui me a ribong a di lekilabs er a btelul me a chelechedal el mo lmuut er a kemril.

A recharm el rokui a dirrek el di mle kekesus e te mo bad e di ta el Charlotte a dirk ke mle mekar. Te ulerreched el mo bad me lesebecherir el omkoki el mekiis e losa a Wilbur er a uchei er a lora el mo er a himbiokai.

A bo lekukuk e ng di mle tutau e a rechad a omkoki el mekiis. A sils a ngosecha e kmal ungil a eanged. A Fern a mekiis er a bliil el kmal di kmeed er a blirir a rua Homer e merael el mo ongakt a ralm el mei me ng melechong. E mo er a bliil me ng otungii a kmal beches e ungil el bilel e le ng medengei el kmo a lebo er a himbiokai e ng meseked er a rebetok el buik me a rechad. A delal a Fern a ngotechii a iklel a Avery e millii er a beches el bilel e songdii a btelul. Me a bechil er a Arable a oubail e omengur e tuobed el mo er a iikr me ng ngotechii e ngomedii a torak e le ng mo oltak er a rechad me a Wilbur el mo er a himbiokai.

A Lurvy a kuk di mle tutau e ng mekiis el mo locha a beches el bokso el ulolel a bliil a Wilbur a lebo er a himbiokai. Tia el bliil a Wilbur a mle chelsbereber er a mellemau el llechukl a ko er a kolt er ngii el kmo,

CHEREMEL A HOMER EL BABII EL MERAEL A CHISEL

A Charlotte a dengchokl er a bliil e kmal ungil a rengul el omes er a omengetmoki er a mo er a himbiokai. Me a Wilbur a omengur el mekekoki me lak

bo lebechesechusem a dingal me a medal.

A Edith el bechil a Homer a ngar er a uum e melekoi er a bechil el kmo, "Arrach, ngak a mo melecholb er a Wilbur e mengilt er ngii er a cheluch."

"A ngerang?" ng uleker a Homer.

"Ak mo mengilt er a Wilbur er a cheluch. A delak el mechas er a lekiei e ng ullab a cheluch el mengilt er a cheremel se el lolecholb er ngii. A cheluch a remuul a iidek me ng mo mimiumk me ng sebeched el ngotechii el mo beches e kuk choiltii me ng mo chedidiich," aika tekingel a Edith.

"E ng di a Wilbur a diak lidokel," ng millekoi a bechil.

"A dingal a kmal el idokel e le se el lebo lomeka er ngii a Lurvy e a osechel a kelel a ruebet er a dingal e mo medirt me ng kmal kltukl el bechachas. E dirrek el se el lemechiuaiu e ng mai a iidek er a dechil el lebad er a bebul."

"E ng di ngika a dibad er a bebul a beches el bokso."

"A le beches me a lidokel me ngii a di bo kulecholb er ngii."

A Homer a mo lmuk e mo dengchokl el omengur e a bechil a mo tmuu er a blil a donguu me ng nguu a baket me a cheluch me a mechut el mamed me a tauasi e me tuobed.

A bechil a omes er ngii e kmo, "Errang, kau kemedengei a chomoruul?"

A Edith a di liluk e ng mai aika el klalo el tuobed el mo er a blil a babii me a bechil a di milreko el okiu a ullel. A Edith a di mlo el tmuu e mocha tmaut el mengilt er a Wilbur er a cheluch e oba tia el mamed el melatech e mengilt er a Wilbur er a cheluch. Me a rua debar a di mla me e kldibel e omes e le ng ko er a kmal omosiroi er a rengrir. Ng mo lmuut er a sib me a Templeton me te di mlo ultom e omes er a Wilbur a lolecholb er ngii. A Charlotte a kmal mlo semeriar er tia el omelechob me ng ulemtar el me er a eou me bo el sebechel el mo ungil el omes. A Wilbur a kmal di chelellakl el dechor e blutek a medal e mocha omelchesiu a cheluch el olechubel er a ulkel me a bdelul. Me se el lemetengel a cheluch el mo bedul a ngerel e ng mekengii a ngerel e nguetem e kmal mo ungil a rengul le ng kmal ungil a telemtemul e bochochod el melaok. A Edith a ngotechii el mo merek e mocha suldii me a bo lemerek e ng beches e chedidiich el babii el dirkak losa a babii el mo ua ingii. Ng becheleleu e bekerekard a dingal e chedidiich el mengeldoech a bedengel.



A Homer me a bechil me a Lurvy a mocha er a blirir me te melecho e oubail. A Lurvy a kmal tuamk a chesemel e oubail el loia a kmal ungil el chelchedal a bilel. E a recharm a ko er a dichelita er a blirir el diak a rumes er tir e le rechad a kmal di mechesengo er a omerael el mo er a himbiokai.

A rengelekel a debar a di mlo meleliuekl er a delrir e kmo, "Ng kmal somam mam mam omngikemam el mo er a himbiokai," Tirka a di mlo mengerodech e di omelekl a tekingir el mo er a delrir.

"Rengelekei!" ng ulenger a Diradebar el kmal mle obraod a ngerel el ko er a oungeroel. "Kid a di kiei kiei kiei er a blid. Ng di ta el Wilbur-bur-bur a mo er a himbiokai."

A Charlotte a ngar er a telia e omdesua el kmo ng locha bai ungil a loracl. Me ng millekoi el kmo, "Ak umdasu e ng ungil a kuracl el obengkel a Wilbur. Ng diak dodengei a mo duubech er a himbiokai. A Ita e bo

lousbech er ngak a Wilbur. Ng kirek el mo e le ak meduch el meluches. Me ak umdasu e a Templeton a dirrek el kirel el mo e le kede ousbech er ngii e le ng sebechel el ngar er a oderuchel."

"Ngak a kmal di kiei er tia el diak kbo er a omerael." Ng millekoi a Templeton e kmo, "Ng diak a belkul a rua a himbiokai er ngak."

"Tilecha a dingerem e lekau el dirkak Ita me bo er a himbiokai." ng millekoi a Ngirasib e kmo, "A rua a himbiokai a meklou el mur er a rebeab. E le rechad a ruebet a kelir me a imelir a mechubel me a ulengall a di mo berberiid me se el leklebesei e a rebeab a tuobed me te melngot e meruul er a mur er tir. Ng locha diak a ngodech el basio el sebechiu a rebeab el mo metik a klungiolel a kall el mo ua ia himbiokai."

A Templeton a ko er a kmal mlo meklou a medal er a chesil a rengul e uleker, "Ke mera el melekoi? Ke di olengibes er ngak me a lechub e ng mera el tekoi aika el molekoi? Ak ko er a kmal mo nguibes se el kurrenges a tekingem."

"Aika a mera el tekoi." ng ulenger a Ngirasib. "Bo er a himbiokai me mngai a chesil a rengum er a ungil el klebesei. Ke mo metik a box el ngar er ngii a der el diokang me a deb. Ke dirrek el mo metik a beached el blil a tuna el dirk ngar er ngii a chesechesemil a odoim er a chesl me a mengchongch el ngar er ngii a beras er ngii..."

"Mereko e lak mouchais e ak mong," ng millekoi a Templeton.

"Tia se el kmal kot e ungil el tekoi e Templeton." Ng

millekoi a Charlotte e meludeu a medal er a Ngirasib. "Ng kmal di kea a taem e a Wilbur a bo lolecha er ngii er a blil er a omerael me ngak me a Templeton a kiram el ma mo soiseb e mertemam er a chelsel."

A Templeton a kmal di mle mereched el soiseb er tia el blil a Wilbur. Ng tmuu e meretii er eungel aika el bokso.

"Ng kmal ungiang." ng millekoi a Charlotte er a losa a Templeton er a liseb e lebertii. "Elecha e ng kuk ngak a mong." Ng milidab a Charlotte el soiseb e mertii er a belsibs er a eungel a kerrekar el dengebel tia el blil a Wilbur.

A Dirasib a omes e omteuitech er a btelul e kmo, "Kom kuk bebil er a bedengel a telechull. Tia el llechukl a ungil a lemeluches el kmo, CHEREMEL A HOMER EL BABII EL MERAEL A CHISEL ME A RULTAK ER TIR ER A OMERAEL!"

"Alii, te merema rema rema a rechad. Me bertemiu temiu temiu!" ng uleldiu a Ngirasib.

Tia el klou el torak a merema el lomekall er ngii a Arable. A Avery me a Fern a ngar er a uriul el dechor el loreked er tir er a tkul a mlai. Me a Homer me a Lurvy a dechor er a eou e ambai er a Arable a lomekall e lolekeed er a torak er tia el lengar er ngii a Wilbur.

A Ngirasib a milengelulau el kmo, "Wilbur, morrenge e kulekoi. Se el lenguu a chesimer e bo lolsiseb er kau e kolekes a bedengem e meruul er kau el leko ng chetim el mo er a omerael. Ng diak di lekau el mo soiseb. Ke mengiil er tir el mo oldubech er kau e ke mochu soiseb. E le rebabii a blechoel el loltamet er tir el

oltuu er tir er a chesimer."

"E ng di olebo ak ulekes er ngak e ak mo dechudech," ng millekoi a Wilbur.

"Becheriei a mo dechudech e di morrengees er ngak. Ke olekes er kau, e le a lsekum me ke di kau el mo soiseb el diak oltamet er kau e a Homer a mo omdasu el kmo ke locha bai kebelung e bai mo telkib el medakt er kau."

A Templeton a mo ultom e kmo, "Omongoit a bedengem me a odi molekes er kau e ngii di mletkak el kmo ak ngar er a eungel aika el bokso e kmal diak Isoak el motilech e merederd e mosongeb. Ngii di mlatk aika el tekingek e meringel el chad el babii me se lebo loldubech er kau el me soiseb e lak mtemellak."

"Bo mluk e Templeton!" ng millekoi a Ngirasib. "Bertii a btelum e te merema a rechad. E kau el Wilbur di mchelellak! E Charlotte, bo mungil el mertau!"

A torak a mekekakil el me er a bita er a blil a babii e stob. Ng tuobed a Arable el mo er a uriul me ng otengalii a chesimer e ng me metengel a bechil me a Fern me a Avery a suchesokl el metengel. A Homer me a bechil a merael el mei omes. Te mo dechor el rokui e chemat er a Wilbur me tia el blil el kmal klebokel e diak lodengei el kmo ngar er ngii a beab me a bubuu el ngar er a chelsel.

"Ng mera el ileakl er a rebabii!" ng millekoi a bechil a Arable.

"Chochoi, ng mera el kot," ng ulengesenges a

Lurvy.

"Ng mera el kot el klebokel el babii," ng dilu a Fern e mocha melatk er se er a taem er a el dirk lekekeriei a Wilbur e le ko er a mle sorir el omekoad er ngii.

"Ng mera el beches e chedidiich," ng millekoi a bechil a Homer e kmo, "A cheluch a kmal ngar er ngii a rellii."

A Arable e ulemes er a Wilbur e kmo, "Ng mera el ungil el babii. Se el dosa e ng diak lsebeched el kmo ng milechell el kmal kekeriei. Ngika a kmal mo ungil el odoim a techel me a lekel se el lebo el omekoad er ngii."

Tia er a rrenges aika el tekoi a Wilbur e ng di mlo keterkokl me a chaidirengul a mengerderid e mengelulau er a Ngirasib el kmo, "Ak umelechiesiu er ngak e ak mochu er taorer."

A Wilbur a milutek a medal e olengiong el metilech me a klungiolel a di ririid.

A Fern a uleldiu el kmo, "Alii, ngika a Wilbur el mla metilech!"

A Avery a remurt el tmuu er tia el mo blil a Wilbur e kuk oldiu el kmo, "Momes er ngak. Ak babii! Ak babii!" E mrael e lolab a teblo el chimal me a chochil el mesuub a babii a lorael.

Tia er a lorael a Avery el mesuub er a Wilbur e a chochil a subechii er a Templeton. Me a Templeton a kmo, "Tia ak di milkera e mei er ngii el tekoi! Tirka el

mekekeriei el buik ng ko el ngera a klungiolir? Ak mera el di mle kiei e osengkak!"

A redebar a omes er a Avery el ngar er a chelsel tia el blil a Wilbur e choeng er ngii.

"Avery, morechedau el me tuobed er tilechang!" Ng millekoi a delal e kmo, "Ngera uldesuem e tuuenga er tilecha me ke ngar er ngii?"

"Ak babii!" Ng ulenger a Avery e olab a llel a bokso el lolsebek el mo er a bab e kmo, "bu-bu-bu."

"Alii tia el torak a merael el olingatech e Edam." ng millekoi a Fern.

Tia el torak a mera el diak a chad el lomekall er ngii e ng mocha oltitenganged el mo bedul a eou. Me a Arable a remurt el mo el kuresii a brek me ng stob. A redebar a ulecherchur. E a Charlotte a kmal duuesii er a lengar er ngii me lak lemoes er a Avery.

"Mei e rrokui" ng ulemekedong a bechil a Arable. A Avery a milekesako el tuobed er a blil a Wilbur e olengeng er a Wilbur el mla taorer.

"Ng mla a taorer a babii!" Ng millekoi a bechil a Homer e kmo, "Msebsii er a ralm!"

A redebar a kaiuediu el kmal semeriar aika el cheldecheduch.

A Lurvy a rirurt el mo melai er a baket el ralm. Me a Fern a ngilasech el mo er a blil a Wilbur me ng

outubuach e omes er ngii.

"Ng locha a kleald a uchul me ng mla a taorer," ng millekoi a Homer.

"Ke le bai el bla lemad?" ng dilu a Avery.

"Morechedau el me tuobed er tilecha el blil a babii!" A delal a Avery a uluungeroel er ngii. Me a Avery a tuobed el mei me ng dechor e omes er a Wilbur. Ng merema a Lurvy el cheltekill er a baket el ralm me ng subsii a Wilbur.

"Msebsak!" ng dilu a Avery e kmo, "Ak dirrek el kmal mekeald."

"Bo mluk!" ng uleldiu a Fern. "Bo mluk e btekau". Ng melekoi e a medal a kmal el mui er a chiuosech.

A Wilbur er a lemekelkelta e ng milekokil el mekiis me a redebar a mlo kaiuediu er a klungiolel a rengrir.

"Ng mla mekiis!" Ng dilu a bechil a Arable. "Ak umdasu e ng locha a diak lekelsakl."

"Ngak a kot el songerngerang." Ng millekoi a Avery. "Ng soak el menga a aiskater."

"A Wilbur a mla mo ungil. Me le mereko e doraal e ng soak el mo omtar e ngar er a mesil el bukitang el meliuekl." Ng millekoi a Fern.

Te mocha oldubech er a Wilbur a rua a Homer me a Arable me a Lurvy e loltuu er ngii er a blil el mo er a

himbiokai. Te oldubech er a Wilbur e ngii a ko er a olekes er ngii e meruul er ngii el leko ng chetil el mo er a himbiokai. Me tirka el chad a menga el mocha blak a rengrir el mengurs e oldubech er ngii. A Avery a metengel el mo me ng olengeseu er tir. A Wilbur a oltab a chochil e melolk e oldiu. Me a Homer a kmo, "Ngika a kmal diak lekelsakl el babii." Ng mo er a ullel a Wilbur e tukeklii e kmo, "Ka debong. Moldubech! E lluut!"



Tia er a lodbechii e losisebii e a redebar a ulecherchur el chemat er a Wilbur. Me a Lurvy a dileel a sersel tia el tuangel me lak el sebecchel a Wilbur el tuobed. A bocha lemerek e te mocha dmak e kiderii tia el lengar er ngii a Wilbur el ongesechii er a torak. E kmal diak a ta er tir el medengei el kmo ngar er ngii a beab me a bubuu el berrotel er a chelsel le se lomes e ng di ta el Wilbur a losang.

"Mereko e bo dengasech!" Ng millekoi a Arable e ngmasech er a kingellel e omekall. Me a remechas me

a Homer me a Lurvy me a Fern me a Avery a mocha
ngmasech er a uriul me te dechor el loreked er tir er a
tkul a torak. Ng merola a mlirir me a redebar a
mengerodech er a klungiolel a rengrir. A Avery me a
Fern a omiroi el melmesumech er a recharm e te rieda
el mo er a himbiokai.

XVII

OKDEMAOL

Tia er a bocha el stob er a kurangd el ngar er ngii a himbiokai e a mesil el ko er a bukitang a meliuekl me a rengalek el dengchokl aika el kingall a kaocherchur e chacherodech. A ungil el rekodo a merael me a bul a kall a bek el bedengel e kmal ungil. A rechad a meseked me a huseng er a rengalek a bek el bedengel el mesebesebek er a bab. E kede orrenges er a sbika el melekoi el kmo, "Ngike el oumlai er a bibrurek el rotari lebo lenguu a mlil e lotebedii e ng melenget er a lorael er ngii a rechad!"

A Fern a kmal lorecheda me ng kmo, "Ng sebechek el nguu a ta er a udoud e ng mla mo soak el mo omais?"

"Me ngak me ak tang?" Ng millekoi a Avery.

"Ngak a mo ousekool er se el dongebis er ngii el mesil e ulterekokl el mo nguu a nguked el oningio," Ng dilu a Fern.

"Ngak a bai mo omekall aike el mekekeriei el mlai e omes el kmo ng sebechek el chumur a ongeu me ng mo katerturk a mlai," aika a tekingel a Avery.

"Ng sebechek el mo omechar a huseng?" ng uleker a Fern.

"Ngak a soak el menga a kukis e melim a aiskater?" ng uleker a Avery.

A delrir a millekoi er a rengelekel el kmo, "Bom chelellaki e msall e ba dokeredii a babii e bochu molekoi a somiu."

"Msall e bai debesterir a ududir a rengalek me bo loilil e a himbiokai a di dersta er a ta el rak e bochu domdasu er a okeredel a babii," ng millekoi a Arable. Ng ulemesterir a dursukolem el sens e kmo, "Alii ailecha a ududiu el ta el sils me komengereomel. E a bo el sueleb e ko mei er tiang me kede ousueleb e kom kuk el lmuut el mo milil. Ng diak monga a betok el merkos e le ng mo el mo meringel a deliu."

"Alii ko mo orreked er kemiu a chobo mngasech er a bukitang!" ng millekoi a delrir.

"Alii ko mo el remiid!" ng millekoi a bechil a Homer.

"Ko momes a mlai me ng diak motilech!" ng ulechelechel a demerir.

A Avery me a Fern a mocha chachetaki el chim e melechesoki el ko er a meleliloik el bedul a blil a klekool. Te merael el kmal ungil a rengrir el di tir el lobeteterir el diak a ko er a ambai er tir. E a delrir a dechor el omes er tir e ko er a otuu a telil e mo mesuld er a medal.



Ng uleker a delrir el kmo, "Chomomdasu e tirke ng di sebechir el di tir e diak lebo lemekesaki?"

Me a bechil a ulenger, "ak umdasu e te mla mo meklou el sebechir el di tir. E lmuut ku ng diak lsebechir el mesuub el di mo tir el lobeterir el di merekmo debechiteterir me lolasem. E a rua seked er a himbiokai a ungil el losuub a rengalek er ngii."

Tia er a lolekerd er a Wilbur e loltobed er ngii er a bliil e lolsiseb er ngii er a basio el lebo er ngii e a rebetok el chad a di mle mekideb e omes. Te menguiiu er tia el llechukl el kmo, "CHEREMEL A HOMER EL BABII EL MERAEL A CHISEL" e chisngekl el omes er a Wilbur. Se el lomes er ngii e a Wilbur a meruruul a medal e lolecholt er a klungiolel. Ng dirrek el kmal mle ungil a

rengul er tia el beches el blai el leblo er ngii e le ng ngar er ngii a chudel er ngii me ng mekelekolt e lmuut ku ngar er a mechuu e le ng ouchado.

A Charlotte a ulemdikm el mo diak a rumes e ng melidab er a chelsakl el mo er a eungel a chado el sebechel el ngar er ngii a omes er a Wilbur.

A Templeton a kmal medakt el me tuobed e le ng kmal losbadel a sils me ng di berrotel er a eungel aika el bokso er a chelsel tia el bliil a Wilbur. A Homer a ulechubel a imelel a Wilbur er ongolel e locha a bebil er a beches el bokso er a bliil e sola e merael ngii me a bechil me a rua a Arable el mo omes er a le ngar er ngii a kerebou. A Homer a di mle soal el mo omes er a le ngar er ngii a klaidesachel er a mlai me a bechil a kuk mle soal el mo omes er a le ngar er ngii a meklou el aisbaks. A Lurvy a meketeket er a lodedechor e lomesoues el ko er a osisiik er a lodengterir el chad.

Tia er a loracl a rebek el chad e a Charlotte a mocha mengedecheduch er a Wilbur.

"Ng ungil el diak omngar er tiei el kngar er ngii me ng diak lsebechem el mes a kues," aika lulekoi a Charlotte.

"E ngera a obla mues?" ng uleker a Wilbur.

"Ngar er ngii a babii el ngar er a bita el kmal klou el kumdasu e ng kuk klou er kau."


"E a lta ng klou er ngak er a rak me ng betok el kall a bla lekang me a uchul me ng klou," ng millekoi a Wilbur e a medal a mochu mui er a chiuosech.

"Ka hall e bo kmetengel el mo kmeed e kusang," ng millekoi a Charlotte. Ng millidab a Charlotte el mo er a bebul tia el lengar er ngii ngika el chimo er a babii e sola e kobsii er a udel e mekekakil el olenganget er ngii el mo er a eou el mo sebechel el ungil el omes e mendedecheduch er ngika el babii.

"Kau ng techa a ngklem?" ng uleker a Charlotte el ko er a oingongaok a ngerel.

Ngika el babii a ulengengii e kmo, "Ngak a diak kuungakl," ng ulenger ngika el babii el kmal klou e medecherecher a ngerel. Ng dirrek el kmal mle chetelluchel a ngerel. "Ng sebechem el omekedo er ngak el kmo, 'Okdemaol.'"

"Ke kmal mesaul e Okdemaol," ng millekoi a Charlotte e kmo, "Ke mlechell er a oingerang? Kau ke babii er a kot el buil?"



"E adang. Ak babii er a kot el buil. Chomomdasu er ngak e ak mechell er a ngodech el buil e ng mo diak kbabii e mo malk me a lechub e ak mo ngodech el charm. Merrengei, ng kmal tuobed a cherik er kau el kmal kebelung a kerim."

"Ng ko er a diak kusa a klebelngul tia el kerik. Ng mera el betok a klebelung el tekoi er tia el beluulechad e ng di tia el kerik a diak el ta er ngii. E becheriei e ke kmal mesaul el mla chochotii a ngklem er ngak. Ke mesulang e be kbong." Aika tekingel a Charlotte.

Ng milrael a Charlotte el mo er a blil a Wilbur e ouchais el kmo, "Ngike el babii a kmo, ng babii er a kot el buil. Ng sebechel el babii er a kot el buil me ng ungil e ng di ng kmal meknigt a blekerdelel a longedecheduch me a loungelakel me ng debsochel. E Imuut ku, ng diak lebeches a bedengel el ua ikau. A di mo sebechel lebo el lungil er ngii a klungel me a berredel e ng di ng sebechek el ngosukau me aike a di mo diak a belkul."

"Ke mo meluches e meruul a tekoi el kirek er a oingerang?" ng uleker a Wilbur.

"Ak mo oureor er ngii er a telia el sils a lak ksa el mesaul." Ng ulenger a Charlotte. "Ak ko er a di mekerang e kmal mesaul e kmal olengoech a bedengek el diak kua ingak er a ngar er a mong. Ak umdasu e ak kmal udelang e mechesei."

A Wilbur a ulemes er a Charlotte e mesa el kmal lobereda er a klungel a delel e mera el teletelel a kmal mla mo mesaul.

"Ke mera el chebuul e Charlotte el kmal obereda e

di oureor." Ng millekoi a Wilbur. "A Ita e chomrellii a blim me lukedii a chimo er a iaes me mkelii e ke mo mesisiich."

"Ng locha merang," ng ulenger a Charlotte. "E ng di se el kumelechiesiu er ngak e ng di ua ak dirk blo kmerek er a kemanget e meringel el ureor e le ng kmal mesaul a bedengek." Ng millekoi a Charlotte e mo rullii besul e mo bad e mecheriei a Wilbur me ng di kie el kmal di suebek a rengul.

Tia el tutau e te kmal betok el chad a mle omes er a Wilbur. Te chemat er a blechesul me a kemril el chelirocher me a medal el klebokel. Se el lebo lemerek e te kuk mo er a blil a Oktemaol el babii el di ngar er a bitang. Te mo me te kuk chemat er a klungiolel me a kldelebungel. Me a Wilbur a di ngar er a bita e se el lorenges a chetengakl el kirel a Oktemaol e ng kmal mo suebek a rengul me ng kmo, "Ngak ak di mo mekera er a chelecha el lesesmecher a Charlotte me lak a mo ngosukak."

A Templeton a di berotel e di mechiuaiu er a eungel aika el bokso. A sils a mocha sueleb me ng kmal mekeldang me a Homer me a Arable me a rebecherir a merola el mei er a lengar er ngii a Wilbur. Te di mlei el telkib e te kuk merema a rua a Avery me a Fern. A Fern a mei e loba a mongkii el oningio er ngii me a Avery a mesebesebek a huseng er ngii el lebla lechetii er a dingal. Te dirrek el mera el di kesib er a kleald e di dechudech ku er a hokori.

"Ng kmal ngodech a kleald er a chelechang." ng millekoi a bechil a Homer.

"Chochoi. Kede kmal kurusii er ngii el kleald," ng

ulengesenges a bechil a Arable e oba a babier el meruoru er ngii.

Te ouderta er tir el mo melemiakl er a torak e mocha omoket a bento er tir el mo omengur. E ng di tia rengelel a sils a kmal mekeald me ng di rulleterir el di olengeng a kelir e omai a rengrir er a blengur.

"Ng oingera e te mo melilt er a rekot me a remo melai a nguked?" ng uleker a bechil a Homer.


"Ng klukuk," ng ulenger a Homer.

Te dengchokl e ngii a dumia a Lurvy el mla nguu a blangket el nguked er a burech.

"Tia isei el desa el ousbech er ngii el blangket," ng millekoi a Avery.

"E adang! Ak di ngiluu e kmo tia se el kmal mo klou a belkuk er kemam er a chelechang." Ng dilu a Lurvy e mekiis el mocha omerk er tia el blangket e olsarech a tkul er aika el tkul a torak me ng ko er a chado el omekchuu er tir. Te mocha dengchokl tirka el ngalek a Avery me a Fern er a eungel e ko er a ungia a rengrir.

Uriul er a bo lemerek el lomengur e a Avery me a Fern a mlo ultuil el lolengull e imiit a mederir.



XVIII

KELEKOLT ER A MOCHA KEBESENGEI

Ng mekelkelta a beluu e le sils a mocha ngmelt me a kurang a ko er a mesilkelkang e a Templeton a tuobed me ng omerk er a osengel. E a Wilbur a kmal longelngul er a chelsel a blil me a Charlotte a mechesa el mengaus er a blil. A Templeton a omesoos e tmungel a betok el ungil bau el rullii el kmal menga el mo songerenger e meched a rengul. Me ng di diak losbesubed e tuobed el mo osiik a kall.

"Eoch, chomei a ke smiik a ungil el tekoi "LLECHUKL" e ak mo mengaus el mo chosoi er a kebesengei me ak ousbech a beches el tekoi." A Charlotte a millekoi er a Templeton.

A Templeton a di millemolem er a omerolel el soiseb er a milkolk e mengchecheremrum e le ng chetil el lorrenge aika el tekingel a Charlotte e le ng di ua leblil a oderuchel.

A lemekelkelta a beluu e a rechad a ko er a kmal

ungia a rengrir. Me a dengki a lokard me ng kmal klebokel a kurangd me a blil a oteruul. Ng mo lmuut er aika el meliuekl el mesil me ng di mlo kmard a dengki er ngii me se el domes e a rengud ng kmal metongakl. A chelitakl a merael er a telia me a rechoeng a ngloik a kaiuediu er a bitang.

A Fern me a Avery a mekisa el kmal mlo ungil el mechiuaiu. Te mekiis el kmal ungil a rengrir. A Fern a di milekiis e mesa a sechelil er a Henry Pussy. Me a Henry a kmo mei me debo dengar er se el meliuekl el mesil. Te merael el mo me a Henry a mechar a tiket er tir el teru e te mo ngmasech. Te dengchokl el teru er a chimo el kingall e ngii a mocha merael a mesil. A delal a Fern a ulemes el mo er tia el mesil e mesa a ngelekel el dengchokl ngii me a Henry el merola el mo er a bab. E a lomes e a ngelekel a ko er a kmal mad el ungil a rengul me ng kmo, "Alii, a ngelekek a ko er a kmal sobeka ngii me a Henry."

A Templeton a di merael el di omerebart er ngii e di melengtungel el osiik a mo ungil el kelel. Ng miltik a der el bleull er a babier el tutuu. A ltuu er a chelsel e ng bek el bedengel a kall a ngar er ngii a cheredoched el tuu me a ngikel me a chedellumel el diokang. Me ng soiseb er a chelsel me ng mo tmaut el kma aika el kall e a rekil e ng mesa cheloit el babier er a chais (newspaper) me ng sodelii a tedobech er ngii e ilii e nguu e merael el mo er a blil a Wilbur.

Tia er a lemei a Templeton e loba a babier e a Charlotte a kmedu el rokir a chuklel a blil. E di se el belngel a teleu e le ng mo melecha er a beches el tekoi er ngii. Tia mle ungil el techellel a Wilbur me a Charlotte me a Templeton el chadcheduch e le ng diak a ta el chad er tia el lengar er ngii.

"Ak oureng el ulekum me a tekoi (Ilechukl) el mngilai a ungil e le tia ia ulebongel el doluches a kirel a Wilbur," ng millekoi a Charlotte.

"Tia kid," A Templeton a millekoi e omoket er a babier el lulebang.

"Ngera ng dmu tilecha el babier? Ka mchiuii?" ng ulengit a Charlotte.



"Tia a kmo, 'NGAR ER IOU EL RENG!'" ng milenguiu a Templeton.

"Tilecha sebecchel el teblo a belkul. Ng sebecchel el kmo "ngar er eou" el belkul a kmo ng kiei er a eou me a lechub e ng "ngar er a eou a rengul" el belkul a kmo ng diak lekedidai a rengul. Tia a kmal di mo ungil el smodii a Wilbur e le ng kiei er a eou e diak lekedidai a rengul." Aika tekingel a Charlotte.



"Ngii di lengii a mo soal e lousbech er ngii el tekoi." Ng millekoi a Templeton e ko er a olsebesebek er a medal el mo er a telia e kmo, "Ngak a mlei er tia el mle milil e omes a ungil el ues. Ng di mlak mei el me meruul a oderuchel."

"A ngelseuim a kmal ungil me mereko e bo momerk er a osengem e moilil e lolsiich er a rengum er a himbiokai," ng dilu a Charlotte.

Ng kilmir a cheril a Templeton e kmo, "Ak mo doraib el iueklil tia el kurangd er chelecha el kesus. Aike el lulekoi a Ngirasib a kmal el mera el tekoi. Tia se el meral bliil a betok el ungil el kall me a ungil el ilumel. E lmuut ku ng betok a sebechek el mertak er ngii e melngot. Me be kbo ku e ngar er a eou a rengul el babii. E di bochu mrekir a chuklem e Charlotte el osebelel a klengar er a Wilbur. Chelecha el kesus a kuk temek el milil e omengur e loldeu er a renguk e le tia se el kmal dirkak kcheremii er a klechad er ngak el klungiaol," ng di mlo merek el mengedecheduch a Templeton e tuobed.

A Charlotte a millemolem el oureor er a bliil el di ngar

er a milkolk. Ng oureor e omes a kerdel a hanabi el bek el bedengel me a bngel el kmal meklou a ngerel. Tia er a rrekir a chuklel e ng mocha chosoi me a rua Arable me a Homer me a rengalek a merola el mei er a torak. Me a lemei e ng mla meluches a 'NGAR EOU EL RENG!' e ng di diak el sebechir el mesang e leng milkolk.

Te di mle e a Fern me a Avery a ngmasech er a torak el kursii a blangket el mei me te oubar er ngii e mo bad. A Lurvy a mo er a blil a Wilbur me ng locha a bebil er a beches el bokso el mo dukllel a Wilbur. Me a Arable a mo toiuii a ulka a Wilbur e kmo, "Ki bo mrei me kibat me a klukuk."

Te mocha ngmasech er a torak el rokui e merael. A Wilbur er a rrengesii a mesil er a torak el melekoi e lorrenges er ngii el merola e ng omdesua el kmo a lemlak lemei a Charlotte e ak locha kmal di mo ngak el ta el cheloit. Ng mera el uchul a ungil el klechad er ngak ngika el Charlotte.

Tia er a lebochu lebad a Wilbur e ng milengedecheduch er a Charlotte.

"Ng diak lsebechem el oiteklii se el chelitakl el mulengitakl er ngii er a ngar er a mong?" ng ulengit a Wilbur.

"Ng diak lsebechek er a chelecha e le kmal mesaul," ng ulenger a Charlotte el kmal milengelulau a ngerel. Tia el ngor a lrengesii a Wilbur el mla er a ngodech el basio er tia el bla er ngii e Charlotte.

"Ke ngar er ker?" ng uleker a Wilbur el ko er a rrau a rengul, "Ng diak lsebechek el mesekau e le ng kmal

milkolk. Ke ngar er a blim?"

"Ngak tia el ngar er a bita er a chelsakl," ng ulegner a Charlotte.

"E ngera me ng diak chomngar er a blim? Ng ko er a diak lechitem el choitii a blim?" ng uleker a Wilbur.

"Ng kuk di chelecha el kesus e ak cheroid er a blik," ng ulenger a Charlotte.

A Wilbur a mlo rullii besul e mo bad e omekedong, "Charlotte, omodasu e a Homer ng diak lebo lomekoad er ngak se el lebo le Kurismas el temel a omenga el babii? Ke oumera el kmo ng diak bo lomekoad er ngak?"

"Chochoi. Ak umera el kmo ng diak lebo lomekoad er kau e le kau a kmal ungil el babii. Me ak umdasu e a klukuk e kulterekokl el mo nguu a kot el nguked. Sei a mo rullau me ng mo merael a chisem me a Homer a mo dmeu a rengul me ng mo diak lolai er a klengar er kau. Me lak lsebek a rengum e a rokui a di mo ungil besul. Te ultebechel el mo mechikau me ke di kiei el mo cherechar er a klungiolel a rengrir er kau me a chisem el mo merael. Me mereko e bo bad."

Ng ko er a mlo kellechakl el telkib e ng lmuut a Wilbur el kmo, "Ngera ke meruul e Charlotte?"

"Ak meruul a di osisiu el ureor el kblechoel el meruul er a ngar er a mong."

"Ke meruul el kirek?"

"Ng diak. A kuruul er ngii er a chelecha a diak lekirem. Ak ko er a omdasu el kmo ng kmal betok ak blechoel el meruul el kirem me a chelecha e ak kuk meruul a kuk kirek e a ak dirrek el ousbech a betok el tekoi el di ua ikau."

"Ka mochotii er ngak el kmo ngera tia el moruul er ngii?" ng kmal lulengit a Wilbur.

"Becheriei me a klukuk e kuchotii er kau," ng ulenger a Charlotte. "A klukuk er a dirk tutau se el lemetetekakl a llomes er a uchul a eanged me a malk lorros me a kerebou lolmesim me longerodech a uul me a mlai le bo lrurt er a rael e komes el mei er a bab e ak ochotii a klungiolel a kuruul er ngii el urreor."

Uchei er a Irekir a cheldechedechal a Charlotte e a Wilbur e meketeket er a leiit a medal. Ng ongelngul me a telil a lorenges er ngii a Charlotte.

A rua Arable a mo remei me a Arable a mo er a uum me ng menga a tuu e a bechil a mesumech a dukllir a rengelekel. A Avery a di miltilech e ongelngul er a sulel er a chomilil. E a Fern a mo bad e a delal a omekbar er ngii e kmo, "Ke mlo ungil el milil?"

A Fern a ulengasech a medal e kmo, "Ng kmal mle ungil e Chedei. Ng kmal dirkak el ta el leboldeu a renguk er a klechad er ngak el mo ua itiang."

"Tia se el kmal kot e rungalek. Me mereko e bobad me a klukuk," ng millekoi a delal a Fern.

XIX BLIL A NGAIS

A bo lekukuk e ng ulemkokl a Wilbur. A lebekiis e ng mellemesa a uchul a eanged me a malk a merros me a mlai a mocha merael er a rael. Ng milriik el osiik er a Charlotte. A lomes el mo bedul a chelsakl e ng milsa a Charlotte el kmal chelellak e blerek a kleai el ochil e ko er a kmal mesengaked. Ng ngellomel er ngii e tuab a medal er a ko er a becheleleu el blus el mamed el klebikl er bita er ngii.

Ng uleker a Wilbur el kmo, "Alii. Charlotte, ke mla mekiis?"

"Chochoi," ng ulenger a Charlotte.

"Tilecha ng ngera el ko er a blus el mamed el ngar er a bita er kau? Ke milruul er ngii?" ng uleker a Wilbur.

"Chochoi. Ng ngisek," ng ulenger a Charlotte el mekekakil er a ngerel.

"Me tilecha ng btungem el moba el ousekool?" ng uleker a Wilbur.

"Ke kmo ng btuu? Tia e kau a diak lebtuu me a ka


leko er a klekool el klalo. Tia a kmal ngisek el 'tokubets' el ureor a mlo er ngii."

"Ngera a belkul a tekoi el 'tokubets'?" ng uleker a Wilbur.

"A tokubets a tekoi er a Siabal el belkul a kmo ngileakl el ngodech el ungil. Me ak ousbech er ngii e lolecholt er a klungiolel a urerek er tia el ngisek e le ng ngar er a uchei er a rokui el tekoi el bla kruul."

"Ngera ngar er a chysel? Ng ngelekem?" ng uleker a Wilbur.

"Chochoi. E diak ledi lechimong. Te ngar er ngii a reim el dart me a okeim el ngelekek el ngar er a chysel," ng ulenger a Charlotte.



"Cheang te mera el eim el dart me a okeim el ngalek a ngar er a chysel me a lechub e ke di oungelekel?" ng uleker a Wilbur.

"Ng diak kuungelakel. Ng mlo diak a chelsenguk me ak mlo tmaut el omechur el mechur el rokui el kmal eim el dart me a okeim."

"Cheang mera el klebokel tia el blirir a rengelekem e Charlotte," ng millekoi a Wilbur el kmal dmeu a rengul el di ngii me a lengisel.

"Ng mera el klebokel," ng ngulengesenges a Charlotte e melelitaiu er tia el ngisel. "Tia a kot el mesisiich a ikrel le kullab a mesisiich el klekedall el meruul er ngii. Tia el ikrel a ko er a llet a dait el di kmoll er ngii a ralm me a rengelekek el ngar er a chelsel a diak lebo ledekimes me a diak lebo lemekerasem."

"Charlotte, me kau ke mo oungalek er a reim el dart me a okeim el ngalek?" ng uleker a Wilbur.

"A lak a secher me a lechub e ng kerrior el me er tir e ng mo ua isei. E ng di aika a diak lebo el mesisiich el mo ikrel a rak," ng millekoi a Charlotte. A Wilbur a ko er a rirengesii a Charlotte el ko er a omritel a ngerel a longedecheduch.

"Ngera ko a mekngit a rengum er ngii? Ng ko er a kmal ungil el tekoi e le ng mo betok a rengelekem e kau a ko er a diak ldeu a rengum. Ngar er ngii a telemall?" ng uleker a Wilbur.

"Lak el sebek a rengum er ngak. Ak ko er a oita a bedengek e le ng di kea a klisichek me a lmuut el ta ng mekngit a renguk e le ng mo diak kusterir a rengelekek," ng millekoi a Charlotte.

"Ng mekera el mo diak mosterir a rengelekem? Ak

omdasu e kede rokui el mo mesterir. Se el lebo el mesisiich el tobed e ng kmal mo ungil e le ng mo meseked a blid er a remekekerei el bubuu el di mo bereberiid. E dirrek, a Ita e se el taem e a rua debar a dirrek el mo omechell me ng kmal mo ungil el mo meseked a blid. Ak omdasu e ng kmal mo ungil a debo debetok."

"Ng diak dodengei. A Ita e ak mo mesterir," a Charlotte a ulemdebades a cheldechedechal, "E ng di ngak a kumelechiesiu er ngak e ng locha diak lebo lemeketeket a klengar er ngak. Ak ko er a omelechiesiu a bedengek el di mochung."

"Ngera a belkul a mochung?"

"Ng belkul a kmo a cheluodel a merema me a klisichek a dikeang. Wilbur, e ng di diak Isoak a omechesa el omdasu er ngak e le chelecha e ng klou el sils er kau me ng kirem el mo chemau ngii. Ka momes er se el kulengaus er ngii el kmo kungil el mes a llechukl? Ng bleketakl?"

Tia el blil a Charlotte a kmal mle bleketakl. A sils se el ledidichii e aika el chuklel a Charlotte a kmal menga el mo klebokel. Aika llechukl a kmal ungil a chelluklel el cheroid el ungil er aike e ledi lebla lechaus er a ngar er a mong. Me ng ulterekokl el di mereched el tuab a osengir a rechad er ngii se lebe lengelakl. Te ulterekokl el di mo meseked er a medal a Wilbur el menguiu er a beches el tekoi e omes e chemat er a Wilbur. Tia a ulterekokl el mo klou el tekoi el mo chemas a rengir a rechad.

A Wilbur a dechor el omngamk er a chuklel a Charlotte e mes a chesemel a Templeton. Ng merael a

Templeton el me tmuu el mo er a telia er a blil a Wilbur e choitii el mo ultuil.

"Ngak e tia el ko el merema remei. Ak kmal mlo mechelaod e le ng mera el betok a ungil," ng ultuil a Templeton e melekoi.


Ngika el Templeton a dimlak a kokil er a blengur me tia el delel a ua delel a dioll el beab er a klungel. Ng mechiuaiu e melamet er a delel e le ng kmal el kedeb a telil e kurusii er a dinges.

"Tia se el mera el kot er a bek el ungil el klebesei," ng liluut el melekoi a Templeton. "Ng dirkak kues a ildois er a der er a klengar er ngak me a rokui el ko er a kmal ungil me a kall me a basio a mo modak e rulii tia el kesus me ng mo kot er a bek el kot."

"Templeton, ke merur er kau, ng diak? Kid a rechad a dongang e ngar er ngii a delbedebeled. Kau a chokmo kemad e a rechad a di mesa tilecha el delem e kmo becheriei e ng ngemokel el diak lolebodeb er ngii a lomenger," aika a lulekoi a Charlotte el ko er a mellach er a Templeton.

"Mei me kululuuch er kemiu me lak lsebek a rengmiu er a delek. E tia a kmal sebechel el otekau a betok el kall," ng millekoi a Templeton, "Bai momdasu er kemiu el locha a kmal mo mekngit a rengmiu a kuuchais a chisel a Okdemaol el babii el ngar er a bitang. Se er a kurael el mei e ak milsa a mellemau el ribong el klebikl er a chelechedal a Okdemaol me ak omdasu e ng ngii a mla nguu a kot el nguked. Me ak kmal chubkau e Wilbur e le ke mla ruebet er a omelai el nguked. Me ng bai ungil a omnguu er a rengum er a omelai el nguked e ng diak a mo omeskau a ribong.

Chelecha el bla bo er a uriul er a himbiokai e ng ultebechel a Homer el lebo lak a odoim e ke mocha okodall."



"Bo moruul er kau e Templeton e aika el tekoi el molekoi a diak modengei a belkul. Me kau a locha kmal medei er a dinges me ng dikea modengei a tekoi. Wilbur, lak momtab a lolekoi e ng mengesensang," aika tekingel a Charlotte.

A Wilbur a dimlak Isoal el omdasu aika el tekingel a Templeton me ng kilderii a chimo er a cheldecheduc el ko er a mengeuid a tekoi.

"Templeton. Chokmo ng diak kom kebelngong er a dngesem e ke di siliseb e mesa se el ngisel a Charlotte. Hall e di kuuchais me ke ngmai e mngai me ng diak e lak. Sang a Charlotte a mochu oungelek. Ngar er ngii a eim el dart me a okeim el ngelekel el ngar er a chelsel sei kid el ngais," ng millekoi a Wilbur.

Cheang, ng merang?" ng uleker a Templeton el kmal mlo meklou a medal el omes er tia el ngais.

"Chochoi, ng merang," ng ulenger a Charlotte.

"Each me tia a ko er a kmal el ungil el tekoi e Charlotte. Tia a mera el cheroid er a ungil el klebesei!" aika a tekingel a Templeton el di lulekoi e mo bad el imiit a medal. Me a Charlotte me a Wilbur a kmal mlo dmeu a rengrir e le ng mo diak longesa er tir.

A rua Arable me a Homer a mle er a mochu etiu el klok. Me a lemei e ng di mle stob a mlai e te kaikerkerd a rechad.

A Fern a di kilerd e omes el mo er a blil a Wilbur e kmo, "Aliii! Ka mosa tia el blil a Charlotte el ngar er ngii a llechukl er ngii!"

Me te remurt a rokui el mei me te dechor e omes er tia el beches el tekoi el llechukl.

"NGAR ER EOU A RENGUL!" ng chiliuii a Homer e kmo, "Tia se el kmal ungil smodii a Wilbur. Ng kmal okesiul a Wilbur."

Te rokui el kmal mlo dmeu a rengrir e le ongasireng el tekoi a mla lmuut el dubech. Me a Wilbur a melanges er tir e meruul a medal el mad el delemedemek e ngar er eou a rengul. Me a Fern a chisngekl e mesa a Charlotte e meludeu a medal. Me a Lurvy a mocha ochubel a kelel a Wilbur. Ng omengur a Wilbur e a Lurvy a melitaiu er a ulkel.

"Eii, me mosa ngilei el chimo er a babii. Ng mla mekabs a mellemau el ribong er a chelechedal me ngika ia locha mla nguu a kot," ng uleldiu a Avery el mesubed er a rua a Homer me a rua demal.

Te di milengimet el rokui el mo omes er ngika el chimo er a babii. Me a lebong e a rebek el chad a di mlo kaiuengeng e a bechil a Homer a longelang. Te omes er tia el ribong e a Lurvy a otebedii a hangkats er ngii e mesuld a chiuosech er a medal e melai a ngertel.

A Fern a remurt el mo er a delal e kmo, "Mei a ududek e ng soak el mo millil."

"Bobtekau er tiang. Ke le bochu er a ngii di el ker," ng millekoi a delal e dirk el Imangel el kmal chetil a cheremel a Homer el dirkak lenguu a nguked.

"Ngera a chised me kom longelang?" ng uleker a Homer, "Morechedemiu el mei me doureor. Edith, mngai a cheluch el mei."

Me a bechil er a Edith a mocha smuld a iuchel a medal e mocha er a mlai me ng nguu a butiliang el cheluch el mei.

"Ng mla mo temem el melecholb," ng millekoi a Homer e tmuu er a blil a Wilbur ngii me a bechil me a Avery me te melecholb er a Wilbur. A Avery a olechubel a cheluch er a bdelul me a chelechedal a Wilbur e a Homer me a Edith a melatech er ngii. Te mengilt e melidek er ngii e a rechad a omerolir el merema er a kurangd. A remle okiu a bita er a blil a Wilbur a mlo mechelaod el omes er a Wilbur e le ng kmal beches a

bedengel el ko er a medidiich er a dichel a sils. Tia el blil a Wilbur a mlo meseked er a rechad el omes e chemat er ngii.

"Ngika diak Isa el klou el babii el ua ngike el ngar er a bita e ng di bai soak e le ng kmal ungil a bedengel e beches," ng millekoi a ta er tirka el dechor el chad.

"Chochoi. Ng merang. Ngika a kmal el ungil e le ng beches," ng ulengesenges a kuk ta er a rechad.

"Chochoi. Ng diak ledi lebeches. E ng dirrek el ngar er eou a rengul," ng millekoi a ta er a mechas el milenguui er tia el llechukl er a blil a bubuu.

Tia el seked a di ulemes er a Wilbur e chemat er ngii, ngii me tia el llechukl er a blil a bubuu e dimlak a ta er tir el mesa a Charlotte.

Ng dimlak lemeketeket e a chad er a olekeungel a mocha mengedecheduch.

"Alii. Morrenges! Tia a tekoi el mo er a Homer el kmo, mnguu a merael a chisel el ongasireng el cheremem el babii el mei er a medal tia el olekeungel el lengar er ngii a remelilt er a remo melai a nguked. Te mo oltobed a nguked er a chelsel a lluich el bung me kom ongiall el loia a cheremem er a chelsel a blil e nguu el me er tiei er a mereched el taem. A resorir e lomes el chad a di subed el mei," aika a lulekoi a ngar er a olekeungel.



Tia er a rrenges aika el tekoi a rua Arable me a Homer e te di mlo kedekedechor e diak a oteltull el diak lodengei a loruul er a klungiolel a rengrir. A Avery a med a bebil er a bokso e metech el mo er a bab e oldiu er a klungiolel a rengul. Ng obriid aika el bokso er a bdelul a Fern me ng meriik e ocherechur. E uriul e tir er rokui a mlo iliuekl er a Wilbur e melaiu e melungel er a medal me a ulkel.

A Charlotte a berotel er bita er a chelsakl el omart er a ngisel e omes er tir e a lomelechusua er ngii e ng mechitecheto a bedengel er tia el urelel me a cherellel. Ng medengei el kmo ng di kea a klisichel a bedengel e ng di se el lomes me lebla losebelii a klengar er a Wilbur e ng kmal mo dmeu a rengul me ng ko er a kmal mo mesisiich a bedengel.

"Morechedemiu e dongetmokl e ng kmal di kea a taem. Lurvy, mei medekaingeseu el nguu tia el blil a Wilbur e lokedii!" ng millekoi a Homer.

"Lemei a bebil er a udoud e ng soak el mo milil," ng ullengit a Fern.

A delal a ulenger, "Msal! Ng diak mesekak el kmal meriked."

"Mnguu se el cheluch el ongesechii," ng millekoi a Arable. Me a rechad a mo ketokl el mo olengasech er a cheluch.

"Ka mosa a bdeluk el kmo ng di ungil?" ng uleker a Edith.

"Ng di ungil," ng ulenger a bechil er a longider er a blil a Wilbur ngii me a Lurvy el olekeed er ngii er a Wilbur.

"Kau a dimlak momes er a bdeluk er se ser a kuker er kau," ng millekoi a Edith.

"E rrach ke kmal di ungil e kulengit er kau me lak omsa el rereuuchel," aika tekingel a bechil.

A Templeton a ullengelngul er a eungel a bokso e di mlekar er tia el klou el cherodech. Me a lebekiis e ngerrau a rengul e a lomes er a Wilbur el loltak er ngii er a blil e ng kmo 'ng locha a kirek el merael el obengkel a omerael.' Me ng soiseb er a blil a Wilbur e tmuu el mertii er a eungel a bokso.

"Kede merolong?" ng uleker a Homer e ngii me a Lurvy me a Arable a kilderii a Wilbur el ngar er a bliil el ongesechii er a torak. Me tir el chad me te ngmasech. A Fern a di ngilasech el mo dengchokl el mui a bdelul er a bokso e omerek er a osengel el kmal semeriar er tia el seked me a chetengakl el mo er a Wilbur. Ng merola tia el torak el mo bedul a medal a olekeungel.

A lora el engelakl er tia el mesil el mengiterebis e a Fern a omes e oureng el kmo, "Hai, uleikum me ak dengchokl er se el kot el ngar er a bab el kingall ngak me a Henry."



XX KO EL DOSEBANG

"Alii! Alii! Kom rongesak?" ng millekoi a chad el ngar er a olekeungel el kmal mle klou a ngerel. "A merreder el ta er a oungerachel er tia el himbiokai a kmal dmeu a rengul el lolecholt er a telungalek er a Homer me a cheremir el merael a chisel el babii. Tirka a ngar er a torak el me er tia el medal a olekeungel me ak ulengit er kemiu el chad el ngar er a kurangd me moledaes er a mo sebechel tia el torak el merael er ngii. Ng chelsel a mekesai el bung e te mo okerdii ngika el babii er tia el mederir tireka el chad er a nguked. Me ak Imuut el lolengit me moledaes me bo lesebechel tia el torak el me er tiei. Kom kmal mesaul!"

A Wilbur er a rrenges aika el tekoi e ng kmal mlo dmeu a rengul e ng di ng ko er a merur e dirrek el mla changar er tia el seked me ng ko er a mlo chetelaol a bdetul. Tia el torak a lomekall er ngii a Arable el kmal mekekakil me ng diak lesbechii er a rechad el kmal betok el di iliuekl er ngii. Tia er a lebocha lestob er a medal a olekeungel e a Avery a kmal mle mereched el ridekekl el me el otengalii a chesmerel a uriul.

A Edith a mengululau el kmo, "Ak kmal merur e medakt el dechor er tia el mederir e rekmal betok el chad."

"Mocherechur e tia a ungil el tekoi e chetengakl el dengar er ngii," aika a lulekoi a bechil a Arable.

"Mokerdii a cheremiu el babii!" ng millekoi tia el olekeungel.

"Ka debong! Dongider!" ng uleked er a omengider a Homer. Te betok el chad el mla er a kurangd a ngilasech el mo lengeseu er a rua Homer. Me a Avery a dirrek el kmal mle blak a rengul el olengeseu.

"Rungalek, motungii a chelechedal a bilem e mokesengii a olekesengelem e a subelengem a robetung," a delal a Avery a millekoi er a ngelekel.

"E Chedei, ng diak mosekak el kmal mechesang," ng ulenger a Avery el ko er a kmal ngor el mechesang.

"A Chedil, ngkekid a Henry," ng uleldiu a Fern e melutk er a Henry.

"Fern, lak moldiu er tiang e lak molutk er a rechad e ng diak lungil el tekoi," ng millekoi a delal.

"Mei e beskak a ududek!" ng ulengit a Fern e kmo, "A Henry a dilu er ngak el kmo aki lmuut el mo ngar er se el meliuekl el mesil e ng di locha mla mo diak a ududel e le ng chiloit el mechar a tiket er kemam er a chelii."

Me a delal a mekengii a til e ngmai a okai el sens el msang e kmo, "Ngei. E alii keremiid. Ke di mo el telkib e mo osiuklemam er se el debla er ngii er a chelii."

A Fern a ngmai a ududel e remurt el meluduus er tia el meseked el mo er a Henry.

"Ngika kid a cheremel a Homer el olekerd er ngii,"
ng millekoi a olekeungel e kmo, "Me msall e mchiellii a
chad el mo mengedecheduch el kirel."

A Templeton a di berrotel er a eungel a bokso er tia
el lengar er ngii a Wilbur e kmo, "Ngera a belkul aika el
betok el tekoi el ko er a diak a ultutelel. Te remuul a
chelsengsa el mo mengesa a taem me a rokui el tekoi."

A Charlotte a di klebikl er tia el le kiliei er ngii a
Wilbur e orrengea aika el lolekoi a chad er a himbiokai.
Aika el tekoi a rullii me ng kmal di ngii el mo ungil a
rengul er a urerel me a ngelseuil el mo er a Wilbur.

Tia er a lotengellii a Wilbur e tia el seked a di mlo
omrotech me a rulengaok me a ruldiu. Me a Homer a
nguu a lkungel er a bdelul e osus el kmal mo er a eou.
Me a Lurvy a otebedii a hangkats er ngii e smuld a
klsbengel a medal e a Avery a mo reborb er tia el bita er
a Wilbur e melitaiu er a delel a Wilbur el ko er a
ousimang er tia el seked. Me a bechil a Arable me a
bechil a Homer a di dechero ku er tia el bita er a blil a
Wilbur.

Ng mocha mengedecheduch a chad er a olekeungel
el kirel a Wilbur el kmo, "Ng soak el nguu tia el techall el
ouchais er kemiu a remechas me a rubak me a rengalek
me a rokui el chad el kmo tia a ngar er a uchei el
chetengakl el mo er a cheremel a Homer. Ngika el babii
a kmal meketeket er a bo lorael a chisel me ng bita el
beluu el mo er a bita a mla me omes er ngii. Me a kot el
llechukl el mle llechukl el kirel a dirkak a chad el obes er
ngii. E ngika kid el di blechoel ku ongasireng el tekoi el
meluches el kirel. Me tia diak di el klungiaol el kirel a
beluad ng dirrek el mla mo merael a chisel el mo er a
betok el cheroid el beluu me ng uchul e ng meseked tia

el himbiokai er kid er chelechang. Tia a longasireng el tekoi a dirkak a rehakase me a rebadrei el smodii me ng belkul a kmo ngika el babii a ngodech er a rebek el babii el di ua aike el bla dechuiu er a blil a bubuu."

A Wilbur a kmal bekerkerda er a rrengel e okor e outekangel el dechor e meruul er ngii me di lungil a teletelel.

Ng liluut a chad el ngar er a olekeungel el melemolem er a cheldechedechal el kmo, "Momes er ngii el babii el kmal ileakl el cheroid e ungil er a rokui el babii. Ka momes er ngii el meaiu a bedengel e beches el diak domes a mekngit er ngii. E momes aike el dingal el bekekerekard e klebokel."

"Ng se el cheluch el dulusbech er ngii," a bechil a Arable a milengelulau er a Edith.

"Ka di mluut e lolengeng er ngii el kmal ungil a bedengel e mera el kmal klebokel. Se el mle llechukl a mera el smodii a klebekelel ngika el babii. Ng diak lsebeched el kmo aike a lulengaus a bubuu e le rebubuu a di meduch el mengaus e merekong. Ng diak lsebechir el meluches me se el mle llechukl a kmal ongasireng el tekoi."

"Ailecha a di uldesuiu. Ng techa a dilu el kmo ng diak lsebecham el meluches," aika a lulekoi a Charlotte el di ngar er a blil a babii e mengchecheremrum.

"Kom kmal mesaul el me keldibel el rokui e chelecha e ng soak el mo melekoi a tekingel a merreder er tia el beluu. Ak omtechei er a merreder e loba tia el lileakl el nguked el lluich me a kleim el kluk me a medalia el omsa a Homer el kirel a urerel me a

cheremel el babii e 'LILEAKL' e 'KLEBOKEL' e 'NGAR ER EOU A RENGUL' el ngii a uchul e kede kldibel er chelecha me a dirrek el uchul e te betok el chad er a cheroid a mlei me kede rullii tia el himbiokai el kmal mo ungil."

A klemengetel a cheldecheduch me a chetengakl el mo er a Wilbur e ng di dilechor me ng omretela a chochil er a kleald me a diu me a betok el mad el di omes er ngii me ng dimlak lolechesuar e obitelek el taorer er a mederir a rechad.

"Ng mla mekesakl a cheremem e Homer?" ng uleker a ngar er a olekeungel.

A Avery a outubuach er a bita er a bdelul a Wilbur el melaiu er ngii. Me a Homer a rereuchel el meruoru er ngii.

"Ng diak lekelsakl. Ng blechoel el mo ua isei e le ng kmal el ngar er eou a rengul me ng diak lsebechel e lorrengea a betok el chetengakl e le ng taorer er a rrengel," aika a lulekoi a Homer.

A chad er a olekeungel a omes e kmo, "A le ua isei e ng diak lsebeched el omeskemiu a nguked e le ng dirkak a nguked el tuobed el mo er a ulekoad el babii."


"Ngika a dirkak el mad. Ng di mle taorer e le ng di ngera e ng mo merur. Lurvy, bo mngai a ralm el mei," ng uleldurech a Homer.

A Lurvy a metengal e remurt el mo melai a ralm.

A Templeton a me ultom e a lomes e ng telilech a

Wilbur e a kemril a kmeed er ngii. Me ng omes er tia el kemril a Wilbur e kimir a cheril e kmo, "Msal e kukisii!" Ng nguim a cheklul e sola e mengchii a kemril a Wilbur el kmal silisichii. Me tia er a Isa el mo meringel e ng di milkar a Wilbur el suchesokl el mo dechor e kmo, "Ak kii!"

"Ng mla mekiis!" ng uleldiu tia el seked e kmo, "Ng mla mekiis! Ngika ngike el mera el ungil el babii e Homer. Ng ileakl el ngodech er a rebek el babii." Ng kmal dileu a rengrir tirka el meseked el chad me a Homer se el menga el mlo ungil a rengul. E diak a di ta er tirka el chad el milsa a Templeton me ng diak lodengei el kmo ng mla rulii a kedelrir a ureor.



A ta er a chad er a nguked a ngosecha el olab a nguked. Ng odars aika el lluch me a kleim el kluk el msa a Homer e kobsii a medalia er a iklel a Wilbur e oderesii a chimal el mo chaksiub er a Homer. Ta kaiuereked chim e a Wilbur a kmal bekerkerda er a rrengel. Me a Avery a oderesii a a chimal el mo chaksiub er a chad er a nguked me a melai a siasing er tir.



A Arable me a Homer me a rebecherir a kmal mlo ungil a rengrir. Ng dirkak el ta lengai a ungil el nguked er a mederir a rekmal betok el chad me tia se el kmal klou el chetengakl el tekoi el lebocha er ngii.

Te olengasech er a Wilbur er a blil e ngii a merema a Lurvy el cheltekill er a baket el ralm. A Lurvy a kmal suebek a rengul er a Wilbur me ng dimlak lebo lungil el lomes e ochubel a ralm me ng imiit er a Wilbur e subsii a Homer me a Avery. Me tirka el chad a di mlo deblechelech.

"Ngera a chised?" ng uleker a Homer er a lemetcholb, "Ke sochera a Lurvy? Ng diak lsebechem el mesa a babii el kmo ng mla mo mesisiich?"

"Ke ko er a dilu el kmo bo mngai a ralm," ng millekoi a Lurvy el ko er a mad el debsochel a medal.

"Ng dimlak kdu el kmo ak melechob," ng millekoi a Homer e tia el klou el seked a mo kaocherechur. Me a Homer a di mereko el dorakl. E a Avery a bai kmal mlo

soal er a bo ledekimes me ng melelechesokl e meleliloik er tia el mederir a rechad.

"Avery, rungalek mereko e lak mousimang," ng ulengit er ngii a delal.

E ng di tia el seked a dirk oldiu el doroakl el sorir el omes er a Avery a loruul a betok el

oltobed a chur. Ng kilderii tia el baket el ralm el nguu el subsii e meruruul a medal. Me tirka el betok el ngalek a mlo kaiuediu e chocherechur er ngii.

Tia er a longesechii a Wilbur er a torak e ng di kea a kmal cherrodech. Me a delal a Avery a mei el choteklii a Avery el ongesechii er a torak e te merola el mekekokterir el omekall el mo er se el lengar er ngii a rebabii.



XXI ULEBONGEL EL SILS

A rebek el chad a di tilobed el mo osiik er a Fern. A Charlotte me a Wilbur a di tir el ta el ngar er a bliil a babii. A Templeton a mechiuaiu el medal er a bisel a le klebesei. A Wilbur a dirrek el kmal mesaul a bedengel er a delechor er a himbiokai me ng ultuir e di omes er a ngkedel el medalia el dirk klebikl er a iklel.

Ng ultuir a Wilbur e ulemes el mo er a Charlotte e kmo, "Charlotte, ngera me ke ko er a kmal di Imuk?"

"Ng soak el mengelakl er ngak," ng ulenger a Charlotte e kmo, "Ngak a di mla cheklmuk e diak sa el bekedechedechaol el chad."

"Ng merang. E ng di ke ko er a tokubets el kmal di Imuk. Ke socherang?"

"Ng di mesaul a bedengek. E ng di ng kmal ungil a renguk e le ke mlo kot e nguu a nguked er tia el himbiokai. Ak klungiolem me a deuil a rengum e di ua lengak. Ng dirrek el kmal dmeu a renguk el kirem e le chelecha el mo er a medam e ke keldmokl el diak a chad el mo melekoi a kodelem. Te mo ungil el omeka er kau me a rebetok el chad a me oldingel e omes er kau. Ke mo kiei el rokir a Kurismas me ke mes a betok el

ungil el ues. Ke kiei el nguu a Baskau e oieli a ulengull er a skuul se el lemekelda a beluu me ke mo remenges e ngerel a dechedech me a betok el bedengel a charm. A klungiolel a beluulechad obo mues."

Ng mlo merek el mengedecheduch a Charlotte e a Wilbur a mocha merael a iuosech er a medal e dula, "Charlotte, ak ko er a kmal merur, a mle uldesuek el kirem er ak kot el mo medengelkau. Ak ulemdasu el kmo ke rasechebeab el chad el omekoad a mekekerie el charm e menga a resechel."

Ng mlo metetenget a rengul a Wilbur me ng mlo lmuk el telkib e liluut el mo mengedecheduch. "Ak meral merrenga er kau e Charlotte er aika el betok el ungil el omeruul el bla mruul el kirek. A ua ingak el chad el dirkak a ngera el krelie e leko er kau, a diak lekirek a ua ika el ungil el omerelem."

"Wilbur, a de kausechelei e ng diak dosaod a saul," ng ulenger a Charlotte, "A rokui el kurruul a mle soak el meruul el kirem. A klengar er tia el beluulechad a diak lemekemanget. Kede mechell, e ngar el telkib e mo er a kodall me ng soad el remuul a ungil el kirir a rebebil er a rechad me bo el ungil a rengud. Me kemam a rebubuu a ko er a di mechesa el melbetabek a blimam a omuked a kelam me ng dirrek el somam el remuul a ngar er ngii a ultutelel el tekoi."

"Ke kmal mesaul e Charlotte," a Wilbur a chilat er a Charlotte me aika el tekingel e kmo, "Ngak a kmal metitur el mengedecheduch e diak lsebechek el smaod aike el kmal ngar er a renguk el ua ikau. Ng di soak el subedau el kmo ng kmal dmeu a renguk er kau el mla osebelak me ng soak el mo meruul a ngii di el ngera el kirem. Ak meral melekoi e Charlotte."

"Ke kmal mesaul e Wilbur. Ak medengei el kmo ng meral melekoi a rengum er ailecha el tekingem."

"Charlotte, kede locha kmedu el merael el mo remei e le himbiokai a mocha merek. A leko di el ngera me de mereched el mo er a blid me dosterir a resib me a redebar. Ke semeriar el ua ingak ng diak, leko di kngar er a blid kung?"

A Charlotte a liluk el telkib e mekekakil el mengululau el kmo, "Ngak a diak kluut el mo remei."

A Wilbur a di mlekiis el mo dechor e oker, "Ke kmo ng diak morael el mo remei?" ng lilangel a Wilbur e kmo, "Charlotte, ngera a telemall e udelei?"

"Tia a ulebengelel a sils er ngak. A chelsel a ta me a lechub e ng eru el klebesei e ak mad.

Ng mla mo diak a klisichek el mo melemiakl er a mlai el obekid el mo er a blid. Ng dirrek el di kea a udek el otengelak el mo er a chutem."

A Wilbur a di mle obiou er a chutem el lmangel el mengubuchub e kmo, "Charlotte el kmal betik er a renguk el kuusbech er ngii. Ak mekera e chad omdibus er bita er ngak?"

"Wilbur, lak omlangel e kau a kmal melai a mederir a rechad me a recharm el me omes er kau. Msisichii a rengum e bo mchelellakl."

"Charlotte, ng diak sebechek el chad a omdibus. A

Isekum me kedi kiei e ak di kiei el obengkem. Ng diak el sebechek el choitau me di lekau el ta e mad er tiang."

"Lak mongebelung," ng millekoi a Charlotte, "Ng diak el sebechem el di kiei e le rua Lurvey me a Homer a mereku me te mo olengasech er kau er a torak. E Imuut ku, chomkiei er tia e ng diak a mo omeka er kau. Me tia el kurangd a bo lengai a mlai me a klalo er ngii me ng mo medideriik e cheloit."

A Wilbur a rereuchel el turekii er a bita el bliil el mo er a bitang. Ng omais e lotkia bliil a ngisel a Charlotte el ngar er ngii a eim el dart me a tacher me a kleua el ngais el dirk mo omeu. Ng omdesua el kmo a lak lsebechel a Charlotte el merael el obengkemam el mo e remei e ng sebechek el bai ngmai a ngisel.

Ng rirurt a Wilbur el mo er a eungel aika el ngisel a Charlotte e mo locha a ochil er a kboub el leko ng mo melemiakl. Ng chilsngekl el omes e le ng diak lsebechel el mo ngmasech. E a lomes e a rua Homer me a Lurvey a dumiang. Ng ulsiik a roel el mereched el ngmai aika el ngais er a uchei er a lemei a rua Homer.

"Ngar er ker ngika el Templeton?" ng uleker a Wilbur.

"Ng mechiuaiu er a eungel aike el bokso el ngar er se el urrukel," ng ulenger a Charlotte.

A Wilbur a rirurt el mo er tia lemechiuaiu er ngii a Templeton e mo terob el okisii e tuchelii a Templeton el mo merael er a bab.

"Templeton! Morrenges e kulekoi!"

A Templeton a ko er a mle rrau a rengul me ng ulemes e ngosecha rengul me ng kmo, "Ngera chised e sechelei? Ngak, ng diak lsebechek el mechiuaiu e kulengull el diak moluchel er ngak me kbibiroi?"

"Morrenges er ngak e Templeton. A Charlotte a kmal smecher e di kesai el klebesei e ng mad. Ng di kiei e kid a mo remei me ng soak el ngmai a ngisel a doracl. Ng diak lsebechek el melemiakl me ak olengit er kau me mchedechuul aike el ngais el ngmai el meskak. Ak kmal lolengit er kau me morechedau el ngmasech el ngmai e a rechad a merekung. Alii, ng kmal di kea taem e Templeton."

A Templeton a ouuas e melamet er ngii e olab a chesemel el mo el mei e chisngekl el omes aika el ngais el ngar er a kboub e kmo, "Kede kuk mocha er ngii el oderuchel me ng Templeton mrelii tia, mesei, mrurt el mo er a ongebitel e mngai a llel a babier el mei. Templeton, me ta er a kereel me kuusbech er ngii me a rokui el ureor a di kirel a Templeton."

"Ak olengit er kau me morechedau e Templeton e ng kmal di kea a temed," ng millekoi a Wilbur.

E a Templeton a okor e dengchokl e meledes a ochil el diak lorrechad. E se el loreched a Wilbur e ng mesuub er ngii.

"Ng turka renguk el di ngar er a oderuchel. A debelid e kom kmo, 'Templeton, mrelii sei, tia, e morechedau.' chomomdasu e ak bekord el blii a oderecheliu. Ngera ko mla meskak el kirel a urerek? Kom di meduch el oderechak e dirkak a ta el ungil el tekoi el mdeliu el kirek," aika tekingel a Templeton.

"Templeton, ak olengit er kau me lak mongeremrum e morechedau el ngmasech e mngai aike el ngais e ng mochu diak a taem. A bolak dengai aika el ngais e ak ultebechel el mad er a kngtil a renguk el kirel a Charlotte me a rengelekel."

A Templeton okor e oisois a ochil e olsebesebek a medal el di ua lak a ngerang.

Ng dengchokl a Templeton el telkib e kmo, "Ke mesaod er a mad er a kngtil a rengum. Ak uoi chubkau el di meduch el me er ngak e le ngar er ngii a telemall e uoi dirkak rengesau me a lechub e krengesii a ngii di le chad el mo mekngit a rengul el kirek. A uldesuiu a di kmo a Templeton a diak a belkul el domdasu er ngii e le ng di ta er a rebeab."

A Wilbur a kmal ngosecha a rengul me ng uleldiu, "Templeton, bekiis el mo meruul aika el kulekoi e bo moruul a teletelem e lak mongebelu el ko er a ngalek."

A Templeton a omtebutek a medal e meruruul er a delengcheklel e kmo, "Ng techa ngke mle oderuchel el mo er a ongebitel?" ng uleker, "Ng diak lengak el Templeton. Ng techa ulsebelii a klengar er a Charlotte, ng diak lebediu el ngais el ngak a kildmeklii a ulechisii a ngelekel a Homer. Ng diak lengak a milengchii a kemrim me ke mekiis er se er a omtaorer er a himbiokai. Ke ko el mla mo dengchokl e omdasu el kmo ngak el Templeton a dirrek el tureka renguk er a oderuchel me a ureor? Chomomdasu e ak beab el sibmiu er a rokui el ureor?"

A Wilbur a diluko e di kea lodengei a ldung e a Templeton rongesii. Ng dechor el omdasu el telkib e

lotka el kmo a Templeton a kmal chad er a blengur e soal a betok el kall.

"Templeton," ng ulemekedo a Wilbur el kmal ngor el omengeluch, "Me e derellii a iaksok er kid el ua tia kid. Ke mo ngmasech e nguu se el blil a ngisel a Charlotte el me meskak e chelecha el mo er a medad e se el lebe lolecha kelek a Lurvey e kau a kot el mo omengur el kma aike el rokui el soam e ak mochu omengur el menga a derengem."


Ng mlekiis a Templeton el mo dechor e kmo, "Ke meral melekoi? Ailecha ng mera el tekingem?"

"Chochoi. Msall e krellii a kerus el olecholt er a kmo ak mo otirakl aike el blak dung," ng ulenger a Wilbur.

"Ng ungia ku me ak mochu ngmasech el mo nguu a blil a ngisel a Charlotte," ng millekoi a Templeton e melemiakl el mo er a bab. Ng melemiakl e kurusii er a klungel a delel e le ng dimlak a kokil er a lolngot er a kurangd er a klebesei. Ng mo kmeed er a blil a ngais me a Charlotte a olsesei el mo er a cheroid me bo lungil besul a Templeton el melubet er a blil a ngais.

A Wilbur a dechor er a eou e ambai er a Templeton el kmo, "Alii, ke kmal mo kerekikl e mekekoku me ng diak mtemellii a chimo er ailecha el ngais."

A Templeton a mekekakil el lolab a ungelel el melubet er tia el blil a ngais. Ng berekereked me ng melubet e kmo, "Tia di ua dolubet a seboseb el mo bereked er a ngered." Ng chodechulii el ngubetii e nguu el me metengel el loia er a medal a Wilbur.



A Wilbur a ta el lultuu e telil er a deuil a rengul e kmo, "Ke kmal mesaul e Templeton e a sulem a diak kubes el mo er a medad el rak."

"Ng dirrek el kmal diak kubes," ng ulenger a Templeton e kmo, "Ng di ua kulemangch a rekodoll. Alii, ng mocha temed el mo er mei."

A Templeton a rirurt el mo mertii er a eungel aika el selumech el bokso e tir a tireka a rua Homer me a Lurvey me a Avery me a Fern. A Wilbur a mla otungii tia el blil a ngais er a ngerel me ng bereked er a bab er a chelsel a ngerel el ngar er a bebul a chural. Ng dirk e mle medengei a tekingel a Charlotte er a louchais er ngii el kmo a blil a ngisel a bubuu a ko er a llet a dait el diak el sebechel el mo dekimes. Ng loia er a chelsel a ngerel e a rua Homer a mocha oltak er ngii er a torak me ng chilsngekl el omes er a Charlotte e merorem a medal el melmesumech. A Charlotte a ulemes er a Wilbur e medengei el kmo ng melmesumech e ua ldu er ngii el kmo ng diak lsebek a rengum er a rengelekem e le kmo kutmeklterir.

"Mechika kung!" ng milengululau a Charlotte er a lolekoi aika lulebongel el tekingel a uluutekangel el oderesii a chimo er a chimal e omiroi el melmesumech er a Wilbur.

Tia er a lorael a Wilbur e a Charlotte a di mle rrek a delengcheklel er a chysel a bliil. Ng dimlak el ta me lomakes me a lechub e lulengedecheduch. A bo le kukuk e a rechad a mlei me te ngmai a charm me a mesil e ng nguubet a tento el mo kairirei. A kurangd a di mlo mededaes el di besbas a cheloit er ngii. A chysel tia mle klou el seked er a Himbiokai e ng dimlak a di ta er tirka el chad el mo medengeli a Charlotte. Ng di mle berrotel a klungiolel a urrelel me a kldachelbil e ng mengoit a telil er a le kea a rechad me a cherodech er a kurangd.

XXII SILS ME A KLEALD

A Wilbur a merema remei er a bliil el teloi er a rebetok el charm. A be lrei e ng dirk oubiungel er a ngkedel er a himbiokai me a ngisel a Charlotte a dirk ngar er a chysel a ngerel. Ng mo soiseb er a bliil e kmo, "Hai . . . ng meral ungil a renguk se el bektuu er a mera el bliil a charm. Ng ungil a bul me a eltel a ungil." Ng omais er a chysel a bliil el telkib e mocha locha aika el ngisel a Charlotte er a urrukel el mededaes e ungil. A resechelil a Wilbur el debar me a sib e di omes er a Wilbur e le ng kmal dmeu a rengrir er ngii el mla me remei.

Aika el meklou el debar a di mlo mengerodech er a deuil a rengrir. Te mo kaokeaongel el oldiu el kmo, "Aki otengau er a kot el ungil el nguked el bla mnguu. Ke kot el ungil e klebokel me ng kmal dmeu a rengmam er a klungiolem."

A Lurvey a mlo chelireuakl e ngubetii tia el medalia el ngkedel a Wilbur el mla er a chiklel e nguu el turecheklii er a deel el ngar er a bebul a bliil a Wilbur. Tia a telecherakl me se el lemei lomes er a Wilbur a rechad e ng sebechir el mesang.

A Wilbur me ng dirrek el di milil er a chysel a bliil e

omngamk er a ngkedel.

A Wilbur a di ulemeka klebesei. Ng kmal mlo klou e kedelebuu e mengchecheldoech a bedengel. Ng kmal mle ungil el omengur e le ng mlo medengei el kmo chelecha el mo er a medal e a Lurvey me a Homer a diak lebo lomekoad er ngii. Te bai kmal mlo ungil el mesiou er ngii e le ng bek el sils el lorael a osengel. A Wilbur a kmal mle ungil a rengul e ng di se el loes aika mle blil a Charlotte el dirk telecherakl er a kboub er a blil e ng mo metetenget a rengul. E le chelsel a klechad er ngii e ng dirkak lebetik er a mo ungil sechelil el kmal mle bekerurau, e medemdemek a cheldechedechal e ungil omerellel el meduch er a betok el tekoi el ua Charlotte.

A temel a sils el lemekeald a beluu a mochu merek me a rua Lurvey a mla mo mengib a kalebasang me a bangkil. A rua a ringngo a di mocha ould. A recharm a mengiis me a remesab a rodech el di beriid er a chutem. A Lurvey a ngilai aika el bangkil me kalabasang el me kudmokl er a chelsel a blil a charm. Te mocha mengetmokl el kirel a kelekolt. A Wilbur a dirkak a ta leoes a snow. Ng di mle tutau e ng omkokl el tuobed el mo omes a snow. A ltobed e a Avery me a Fern a oltitenganged er a bebul a diong el di mla mo kori.

"Ng mera el soak el oltitenganged se el kori bebul a ralm," ng millekoi e ocherechur a Avery.

"A bai kot el ungil se el dengar er aike el btar el meliuekl er a himbiokai. Se el lebo lechelellakl e a Henry a obisur a kingelam me aki meliuekl er a bab e omes er a beluu," a Fern a millekoi e ko er a meleliloik el mo er a tkul tia el diong.

"Olekoi, e kau kede mesaod a snow e kau a dirk ke mesaod a btar me a himbiokai. Ailecha kuk kmal meketeket er a bo lemerek el tekoi," a Avery a millekoi er a Fern e olekesebakl a chimal el ko er a ouklou el chad er ngii.

A Fern a millai a snow er a dingal e kmo, "Ng kmal diak kubes aike el kingelam er a himbiokai."


Se sei el klebesei er a uriul er a Kurismas e a beluu a kmal mlo imis er a kelekolt. Me a recharm a di kiliei er a chelsel a blil a charm e ng di se el lebo er ngii a sils e te tuobed me te omsoes. A resib me a debar me te dirrek el di kiliei er a a chelsel a blil a charm. E se el lebo lemeched a rengrir e te menga kori. A rebek el charm a di kaiuetitech er tia blil a charm e le te chemiis a cheluut me a snow.

Se el lebo le temel a Lurvey el mo melecha a kekel aika el charm e te di mo chacherodech a recharm el oureng a sulel. Tirka mlo tokubets el sorir a kall me te di kiei el di mengiil a temel a blengur.

A Templeton a dirrek el mlo mekerasem el ngar er a iikr me ng rirellii a blil er a eungel a blil a bokso. Ng otamet a simbung me a mechut el mamed el mei me ng rullii a blil el kmal mo ungil. Ngika a edei el taem el lebo lomes er a Wilbur er aike el temel a blengur. A Wilbur a milemolem a tekingel el mecheriei a Templeton me ng kot el mo omengur. Ngika el Templeton a kmal ngemokel e merechorech a rengul me se el lebo lechebangel a kall e ng obes el kmo ng mekekeriei a bedengel. Ng di menga el mo tmurk er a chural me se el lebo lemerek e ng kurusii. Ng dimlak lebo le buil e ng kmal kedelebunga me ng soad el mecheuid er ngii el rengud ng ngelekel a babii er a klungel.

A ta er a klebesei e a ta er a klou el sib a kmal mla mo melemelim a rengul er a kelungel a Templeton me ng mocha ultom er a kakine e kmo, "Templeton, bo mo ngemoes er a omengelem me el sebechem el kiei el chad el meketeket."

"Ng techa soal kiei el mo cherechar," ng ulenger a Templeton e kmo, "Ngak a kuk dilubech el soak a kall me ng diak Isoak chomolengeasek er a mur er ngak," ng millekoi a Templeton e melitaiu er a delel e oltememech er a sib e ngmasech el mo er a dukllel me ng mo ultuil.



A Wilbur a dimlak a ngodech el lemechesa er ngii e ng di mechesa el omekereu aika el ngisel a Charlotte. Ng ngilai el locha er a bita er tia el lemecheuaiu er ngii me se el lebo lebad e ng sebechel a telil el tuobed e mengeald aika el ngisel a Charlotte. A Wilbur a di kiei el mengiil er a beluu el mo mekeald me lomeu aika el ngais.

A ta er a klebesei e ng dirk kekesus e a chimo er a klou el sib a kmo, "Ak ko er a rirengesii a ngerel a dechedech. Ka morrenge, kom remenge ng diak?"

A Wilbur a di tilkeklil el mekiis el mo dechor me a dingal a di decherong. Ng olechederenge e remenge a betok el ngerel a dechedeched el di ngii me a longitakl.

"A temel a sils me a kleald a merema me kede ungia el mo sebeded el mo tuobed," ng millekoi a sib e merael el bedul rikl el kmal dmeu a rengul. A Wilbur a ulemes er a sib er a lorael e a lomes e ngika ta er a ngelekel a sib el okiuellet el teletelel a kmal dirk mlechell.

Ng mekelda a beluu me a snow me a kori a mla toker. A diong a omaoch a ralm er ngii me a mekekeriei el charm a di mesebesebek e melekoi er a bebul aika el kerrekar er a bita er a omoachel.

Ng bekord locha bek el tutau el dosa a beches el ngelekel a sib el mla mechell. A debar a dirk mengaet a ngisel me tirka el bebil er a recharm a meledes a bedengir e melai a ungil el cheluut el me soiseb er a blirir. A mle medechel el telkib er a blil a Charlotte a silebek el tuobed er a rikr.

A ta el tutau el dirk lengilasech a sils e a Wilbur a milekiis el mo dechor er a bita er tia el blil a ngisel a Charlotte. Ng dechor el ko er a blengbangel el diak lodengei a bo loruul e a lomes er tia el blil a ngisel a Charlotte e ng mes a betok el ko er a chelechol el merael. Ng kmal mlo meklou a medal a Wilbur e mocha kmeed e omes. A lomes e ngisel a Charlotte e ng mla

omeu. Tirka a kmal mekekeriei el di ua meklungel a medal a rasm. Me a bedengir a ua bedengel a chab e mechedelekelek me a oubebiduch a ocherir el kmal di ua derir er a Charlotte.

A Wilbur a di mlo mritel e rereuchel er a deuil a rengul. Ng dechor el omes e ng omeu el der se kldei er a ta el taem. E se lomeu e ng tuobed a ngelekel a bubuu e melemiakl el meleliuekl er tia lukir. Te olab a ocherir el ombebiroi er a Wilbur e mesuub el melelidab. A Wilbur a di dilechor e ng omeu a kmal betok er aika el ngais me ng kmo a rengelekel a Charlotte a mocha temir el mechad er a beluulechad.

A Wilbur a kmal mlo semeriar me ng rirurt el iueklii a blii e ousakadats el metilech e ombebelebult er ngii e oldiu e remurt el mo obangel aika el ngelekel a Charlotte e kmo, "Alii!!! Alii!!! Kom rongesak?"

A ta er aika el ngelekel a bubuu a ulenger e ng di kmal mle kekeriei a ngerel me ng dimlak lsebechel a Wilbur el rongesii.

"Ngak a sechelil a delemiu er a Charlotte," ng milengedecheduch a Wilbur e kmo, "Ng kmal ungil a renguk el omes er kemiu el rokui. Ng ngar er ngii a sebechek el ngoseuir el kiriu? Kom ua ngerang?"

Tirka el ngelekel a bubuu a di ulemiroy a chimorir er a Wilbur el ua lolecholt er a Wilbur el kmo te dirrek el dmeu a rengrir el mesa e mo medengeli.

"A le bo er ngii a omousbech me a somiu e ng kmal sebechek el ngosukemiu," aika tekingel a Wilbur.

Tirka el ngelekel a bubuu a di omiroi a chimorir er a Wilbur se el longedecheduch er a Wilbur. Te kmal mle mechesa el di melidab el ngmasech, te metengel e iueklii tia el kboub e le bla er ngii.

A chelsel a mekesai el klebesei e te mocha meruul a blirir el mekekeriei el di blechobech er tia el kboub e le bla er ngii. Tirka di omeka klebesei me te mla mo ua meklungel a redechel a chebouch.

A ta el tutau el kmal mle ungil a eanged me a cheluut a mekelekolt a lesbechii er kid e a Wilbur a milekiis el mo nguu a chesimer er a telia er a bliil. Ng siliseb a cheluut me tirka el ngelekel a bubuu a kmal mlo ungil a rengrir. Te mocha melemiakl el mo er a bebul tia el sersel a bliil a Wilbur e omerk a osengir. A chimo er tir a mlo dechor el telkib e mo terrob el nguu a bdelul el loia er a bebul tia el kakine e ko er a otobed a udel el ruii a ko er a huseng e tukeklii me ng suebek e ng melemesumech er a Wilbur el kmo, "Bek bong," e suebek el remiid.

"E a msal! Kau ke mo er el di diak dekasbesubed e keriedang?" A Wilbur a dirk melekoi a tekingel e ng ngika el bubuu a suebek el remiid. Te ouderta er tir el ngmasech el remuul a huseng er tir e kaiririid. Tia el telkib el chutem a di mlo meseked a bebul er aika el betok el ngelekel a Charlotte el di sobekang.

A Wilbur a kmal mlo suebek a rengul e dirrek el kmal mekngrit a rengul el di dechor e di kea el sebechel kmo ngera er tirka el ngalek.

Ng lilangel e kmo, "Mluut el mei e rengelekei. Ak olengit er kemiu me mluut el mei e tia kid a blid."

E tirka el ngelekel a bubuu a di ua ngera el mocha cheroid e di chemur a ngerir el melmesumech er a Wilbur el kmo, "Ki bebong."



A ta er tirka el mlo okiu uriul a mlo dechor e mengedecheduch er a Wilbur er a uchei er a loltobed a udel el meruul er a huseng er ngii. Ng dilung, "Wilbur, kemam ousbech el merael er chelecha el lemekeald a eolt. Ng temam el suebek el mo osiik a delengcheklam er a chelsel a beluulechad."

A Wilbur a kmal mechas a rengul e rrau a rengul me ng uleker, "Me ko mo er ker?"

"Se el lengikemam a eolt el mo er ngii se ia kibo er ngii. Ng sebecham el kmal mo er a bab, eou, ngebard, ongos, diluches, dimes. Ngii di leker el lengikemam a eolt el mo er ngii a mo beches el belumam."

"Me kemiu kom di remiid el rokui e choitak me ng di ngak el ta el kiei? chokmo ng kiei a Charlotte e ng locha diak deua isei."

Tia el bebul tia el blil a charm a di mui er aika el dart el ngelekel a bubuu el di suebek. A resuebek er a eou me a bab me a tirka di ua le klou el eabed el mla dokedekii tia el telkib el chutem. A Wilbur a dilechor el omes aika el bubuu er a lokokil el suebek e ulerrenges a ngerir el melmesumech er ngii el telkib e mo diak Irengesterir. Ngika a kmal mlo lengoech a bedengel er a kngtil a rengul er a resechelil el di mla remiid me ng chilitii el mo bad el Imangel el mo lieta medal.

A lebekiis a Wilbur e ng mochu ngmelt a sils. Ng milekiis e omes er tia el blil a ngisel a Charlotte e chisngekl el omes er a rikl e ng medideriik el diak a di chimo er aika el ngelekel a Charlotte el lesang. Ng milekiis e merael el mo bedul se el lebla er ngii a Charlotte me ng dechor e ko er a melatk er a Charlotte. Ng dechor e rongesii a kekeriei el ngor el melekoi.

"Alii, alii!!!" ng millekoi a ngor el ngar er a didil a charm, "Ngak tiei el ngar er a bab."

"Me ngak me ak ngar er tiei," ongeru el ngor a millekoi.

"Me ngak me ak dirrek el ngar er a bab," tia a tekingel ongedei er a ngor, "Aki di kiliei el tedei e le ng somam el kiei er tia el obengkem. Ng kmal somam omerellem me a cheldechedechem."

A Wilbur a mlo merirekrik e omes el mo er a bab e

mes a kldei el blil a bubuu el lemechesa el meruul tirka el tedei el ngelekel a Charlotte. Ng melanges el mo er tir e oker, "A belkul aike el tekingiu ng kmo kom di mereko el kiei er a chelsel tia blil a charm me ng sebechek el kmo kede kausechelei el mo er a medad el rak?"



"Ng ua isei, ng kmal ua isei," te ulenger tirka el bubuu.

"Ka molecholt a ngkliu e ng kmal soak el mo medengei," ng uleker a Wilbur e omritel er a deuil a rengul.

"Ng sebechek el ochotii a ngklek chokmo ke

subedak el kmo ngera me ke omritel el ta el chad," ng millekoi a ta er a bubuu.

"Ak omritel er a deuil a renguk," ng ulenger a Wilbur.

"Mada ng ngklek a Deureng," ng ulenger a bubuu.

"Ngera a mle uchul a ngklel a demal a delak el mechas?" ng uleker ongeru el bubuu.

"Ng 'A'," ng ulenger a Wilbur.

"Mada ng ngklek a Ana."

"E ngak a mekerang?" ng uleker ngika el ongedei el ngelekel a bubuu. "Ng soak chomdibechii a ungil el ngakl el mo ngklek el diak Isa el kemanget me a diak le betok a chedechedelel me a diak leko er a ngklir a remelingai."

A Wilbur a dechor el omdasu el telkib e kmo, "E a ngakl el Nellie? Ng ungil ng diak?"

"Chochoi. Ng ko er a kmal soak el ngakl a Nellie," ng ulenger a bubuu. "Ng sebeciu el omekedo er ngak el kmo, 'Nellie.'"

A Wilbur a kmal mlo ungil a rengul el mocha er ngii a resechelil. Ng ulemdasu el kmo tia a ta er a kmal ungil sils er a klengar er ngii me ng mle soal el mo dmu sesei er a cheldechedechal.

Ng ulemuchel er a cheldechedechal el kmo, "Deureng, kau me a Ana me a Nellie, ng kmal dmeu a

renguk er kemiu el bocha dedak el kiei. A delemiu er a le kiei e aki kiliei er tia el terung. Ng kmal mle ungil redil el mellomes e ngar er eou a rengul. Ng ulsebelak e riruul a kmal betok el kirek. Ng kmal diak kbo kubes er ngii me a rokui el mle ungil el omerellel. Me ak klechad er kid me a klausechelei er kid a kulemolem el mo er a medad e le ng di ua omdelemiu er a renguk."

"Ng dirrek el kmal soak tia delengchokl me a delongeled el kmal ungia e Wilbur," ng millekoi a Deureng.

"Ngak me ak ta er a kmal soak tia delengchokl me a klausechelei er kid," ng ulelsich a Ana.

"Me ngak me ak dirrek el olsiich a di osisiu el tekoi," ng millekoi a Nellie e mechesa el omekoad er a rekas el mla obuked er a blil.

Tia a kmal mle ungil el sils er a Wilbur me ng dengchokl el di klikmechur e le ng medengei el kmo a klengar er ngii a melemolem el mo ungil el mo er a medal klebesei.

A Wilbur a kiliei el melai a sils me a buil me a rak el dmeu a rengul el ngar er a blil e le ng di mla er ngii a rebetok el sechelil. A Fern a mlo klou er redil me ng mlo diak lebe loldingel er a Wilbur e le ng mlo mechesa a ureor el klou. E ng di rengelekel a Charlotte a di mle kiei me te omechell me a rebebil er a rengelekir a suebek el remiid e ng di ngar er ngii a kmo te tedei te teua el di kiei el meruul a blirir er a di osisiu el basio el le kiliei er ngii a delrir er a Charlotte.

A rua Homer a kmal mle ungil melecholb e omeka er a Wilbur e le rechad a dirk omais el me oldingel e omes

er ngii. Ng dirkak lobes aike el tekoi el mle lechukl er a blil a Charlotte el kirel a Wilbur er a lengar er a himbiokai. A Wilbur a kmal mle soal tia el delengcheklel el teloi er a rebetok el charm. Te smonga el di kaiuekeed e chadcheduch me a sils a di diak lolechesuar e ng mocha ngmelt. Te di kiei e ng mocha temel a kelekolt. A deuil a rengul a Wilbur e rirelii me ng kmal mlo smau e semeriar el kiei el teloi er a rebeab me a resib me a debar me a kerebou me aika el bebil er a recharm.

A Wilbur a kmal dimlak lobes er a Charlotte. A deuil a rengul el kiliei el obengterir a rengelekel a dimlak el sebechel el mo ua ia a delongelel ngii me a Charlotte er a cherechar. A Wilbur a di mle medechel er a rengul a kmo, "A rengelekel a Charlotte a kmal klebokel e ungil e ng di diak a ta er tir el mo nguu a deruchellel a delrir er a renguk. A Charlotte a kmal mle kot er a rekot el di uldak a klungiolel a beluulechad. Ng mle mellomes, e ngar er a eou a rengul, e meduch el mengaus e meluches. Ng dirrek el milak a diak dobes el klausechelei."

ULLEBONGEL